

গাউছেজামান হযরত ছৈয়দ মৌলানা
আবদুল লতিফ শাহ চন্দনাইশী মাইজভান্ডারী
বাবাজানের (কঃ)

জীবনী ও কারামত



প্রকাশক

সাজ্জাদানশীনে গৌছেজামান শাহজাদা ছৈয়দ
মোহাম্মদ মকছুদুল আলম আল চন্দনাইশী মাইজভান্ডারী
চন্দনাইশ দরবার শরীফ

লেখক

আলহাজ্ব শাহজাদা ছৈয়দ মাওলানা আবু সাদাত মুহাম্মদ
দায়েম আল চন্দনাইশী মাইজভান্ডারী ।

পৃষ্ঠপোষক

শাহজাদা ছৈয়দ আবু সাদাত মোহাম্মদ কায়েম
আল চন্দনাইশী মাইজভান্ডারী ।

সার্বিক সহযোগিতায়

১. মোহাম্মদ বখতিয়ার উদ্দিন সোহেল
২. মোহাম্মদ সালাহউদ্দিন রুবেল

প্রকাশনায় ও মুদ্রণে

সলিউশন শিক্ষা প্রতিষ্ঠান

প্রথম প্রকাশ-

১৬ ফাল্গুন , ০১ মার্চ ২০২৩

প্রাপ্তিস্থান :

চন্দনাইশ দরবার শরীফ

২নং ওয়ার্ড, চন্দনাইশ পৌরসভা, চট্টগ্রাম।

হাদিয়াঃ

উৎসর্গ

আমার পরম শ্রদ্ধাস্পদ বাবাজান “গাউছে জামান হযরত হৈয়দ মৌলানা আবদুল লতিফ শাহ” বাবাজান কেবলা চন্দনাইশী মাইজভান্ডারী (ক:) যাঁর মহান জীবনাদর্শ ও বেলায়ত আমাকে তাঁহার “জীবনী ও কেরামত” লেখার কঠিন কাজে অনুপ্রাণিত করিয়াছে। আমি তাঁহার ‘জীবনী ও কেরামত’ লেখার হুকুম পেয়ে চির ধন্য হয়ে গাউছুল আজম হৈয়দ মাওলানা গোলামুর রহমান বাবাভান্ডারী কেবলা কাবার (ক:) চরণে “জীবনী ও কেরামত” বইটি উৎসর্গ করিলাম।

ছোট শাহজাদা হৈয়দ মোহাম্মদ মকছুদুল আলম, আল্ চন্দনাইশী মাইজভান্ডারী

প্রকাশকের বাণী

পরম দয়ালু-দয়াময় আল্লাহর নামে শুরু করছি যার প্রেম লীলার মধ্য দিয়ে ত্রি-ভুবন সৃষ্টি হয়। আর স্বরন করছি তার প্রিয় হাবিব রাসুলকে (সা:) যার শানমান প্রচার করার জন্য গাউস, কুতুব, আবদাল এবং অলিআল্লাহ যুগে যুগে আর্বিভাব হয়। শ্রষ্ঠারবাণী ও স্বীয় আচরণে তারা মানব জাতিকে উন্নত চরিত্র গঠনের শিক্ষা দেন। শিক্ষা দেন কিভাবে আল্লাহর সাথে মানব জাতির রুহানি সম্পর্ক সৃষ্টি হয়। তাই আমাদের সবার উচিত আল্লাহর আউলিয়াদের প্রতি সম্মান প্রদর্শন করা। হযরত মুহাম্মদ (সঃ) এর নবুয়্যাত পরবর্তী উত্তরস্বরী আল্লাহর আউলিয়াদের মধ্যে দিয়ে বেলায়তি যুগ শুরু হয়। আমাদের ক্ষুদ্র জ্ঞান দিয়ে তাদের সম্পর্কে জানা এবং বুঝা অসম্ভব। তথাপি হেদায়তের উদ্দেশ্যে গাউছে ভান্ডারির বেলায়তি শক্তি সম্পর্কে জানার জন্য এই পুস্তকটি। এ পুস্তকের মধ্যে দিয়ে গাউছে ভান্ডারি সম্পর্কে কিছু জানানোর প্রয়াস করছি। বাবা ভান্ডারি কেবলা আলমের রুহানি ফয়েজ প্রাপ্ত সন্তানদের মধ্যে চন্দনাইশী বাবাজান (ক:) সম্পর্কে জানার ও জানানোর জন্য চেষ্টা করছি। যিনি বাবা ভান্ডারীর খলিফাদের মধ্যে অন্যতম ছিলেন। তিনি শ্রষ্ঠার সৃষ্টিকে প্রেম লীলার মধ্যে দিয়ে গাউছিয়তের বেলায়তি শক্তির প্রকাশ ঘটিয়ে জাতি, ধর্ম ও বর্ণ নির্বিশেষে সবার কাছে গাউছিয়তের প্রেম লীলার বাণী পৌছিয়ে দিয়েছেন। (আমিন)

ছোট শাহজাদা হৈয়দ মোহাম্মদ মকছুদুল আলম আল্ চন্দনাইশী মাইজভান্ডারী।

লেখকের বাণী

আল্লাহর দরবারে হাজারো শুকরিয়া যে, এ অধমকে তার বন্ধুর জীবনী লিখার জন্য দয়া করেছেন এবং সৃষ্টি করেছেন অধম্য জজবা । যে জজবার কারণে প্রায় ২২ বছর যাবৎ । অনেক বার চেষ্টা করা সত্ত্বে বিভিন্ন সঙ্গত কারণে লিখার কাজে মনোনিবেশ করা সম্ভব হয়নি । কিন্তু দীর্ঘ এ সময়কাল সঠিক উৎস থেকে বাবজান কেবলা চন্দনাইশী মাইজভাণ্ডারী (কঃ) এর জীবন বৃত্তান্ত ও কারামত সমূহ সংগ্রহ করতে কোন ধরনের চেষ্টার ক্রটি রাখিনি । কারণ আশেকানে মাইজভাণ্ডারীদের চাহিদা ছিল খলিফায়ে বাবা ভাণ্ডারী (কঃ) বাবজান কেবলা চন্দনাইশী মাইজভাণ্ডারী (কঃ) সম্পর্কে জানা । অবশেষে ২০২২ সালে আমার মধ্যে যে জজবা পুনরায় তাগিদ দিতে থাকে যে, শত ব্যস্ততার মাঝে বাবজান চন্দনাইশীর (কঃ) জীবনী লেখার কাজ শেষ করা । তাই আমি জীবনী ও কারামত সম্পর্কিত বর্ণনা সুচারু রূপে বিশ্লেষণ পূর্বক লেখার কাজ শুরু করি । লিখতে গিয়ে মাঝে মধ্যে ভয় হয়েছিল যে, আশেকানদের আমার উপর বিশ্বাসের মর্যাদা রক্ষা করতে পারবো কিনা । যেহেতু ফিতনা ফাসাদের এ যুগে ধর্মীয় বিষয় , নবী ও অলীদের জীবনী প্রচার করতে গিয়ে অনেক মিথ্যা বর্ণনার আশ্রয় গ্রহণ করা হয় । এক অলীর জীবনী অন্য আরেকজন অলীর জীবনী ও কারামতকে চালিয়ে দেয়ার চেষ্টা করা হয় । কোন কোন ক্ষেত্রে সঠিক ও সত্য তথ্যের অভাবে অনেক আল্লাহর অলীর মর্যাদাকে খাটো করা হয়েছে । দেখা গেছে যে, কোন আল্লাহর অলীর প্রকৃত ঘটনা বর্ণনায় অতি আবেগ প্রবণ হয়ে কিংবা কোন দরবারে মর্যাদাকে ক্ষুণ্ণ

করার উদ্দেশ্য মিথ্যা তথ্য সন্নিবেশ করা হয়েছে । অথচ ঐ আল্লাহর অলীর পক্ষ থেকে প্রকৃত ঘটনা ছিল ভিন্নরূপ । যা মোটেই কাম্য নয় এবং ধর্মীয় ও আকিদগত এবং তরীকা সম্পর্কিত হিংসা বিদ্বেষ সৃষ্টি করেছে । এ রূপ লিখনী ছিল খোদার ভয়ের অভাব , আদবের অভাব এবং ইচ্ছাকৃত ফিতনা সৃষ্টি করা । আমি অধম লেখক উপরিউক্ত বিষয়গুলো মাথায় রেখে বাবাজান কেবলা চন্দনাইশী মাইজভাণ্ডারী (কঃ) এর জীবনী লেখার কাজ সময় নিয়ে করতে থাকি যাতে কোন ধরনের ভুল বুঝাবুঝির ঘটনা না ঘটে । সকলে যেন এ জীবনী গ্রন্থ পাঠ করে প্রকৃত সত্য অনুধাবন করতে পারেন এবং একজন আল্লাহর অলীর জীবনী থেকে শিক্ষা গ্রহণ করে সঠিকভাবে আমল করতে পারেন এবং রহানী এলম হাছিল করতে পারেন । এছাড়া আমি এ গ্রন্থ লিখতে ভাষাগত যতটুকু সহজ ভাবে লিখা যায় সে চেষ্টায় করেছি যাতে সর্বসাধারণ পড়তে যেন কোন অসুবিধার সম্মুখীন না হয় । আল্লাহ পাক আমার এ প্রচেষ্টাকে কবুল করুক । (আমিন)

আলহাজ্ব শাহজাদা ছৈয়দ মাওলানা আবু সাদাত মুহাম্মদ
দায়েম আল চন্দনাইশী মাইজভাণ্ডারী ।

পৃষ্ঠপোষকের বাণী

মহান রাব্বুল ইজ্জতের দরবারে লাখো লাখো শোকরানা আদায় করছি ও রাসূল করিমের (সাঃ) দরবারে সালাত ও সালাম পেশ করছি এবং গাউছুল আজম মাইজভান্ডারী (কঃ), গাউছুল আজম বাবাভান্ডারী (কঃ) ও গৌছেজামান বাবাজান কেবলা চন্দনাইশীর(রঃ) কদম পাকে ভক্তি ও তাজিম করছি এজন্য যে, মহান আল্লাহর অলী গৌছেজামান হযরত ছৈয়দ মাওলানা আব্দুল লতিফ শাহ বাবাজান কেবলা চন্দনাইশী মাইজভান্ডারী(রঃ) এর জীবনী গ্রন্থ প্রকাশনায় পৃষ্ঠ পোষকতার দায়িত্ব আমার উপর অর্পিত হয়েছে। তাই অধম বিভিন্ন তথ্য উপাত্ত সংগ্রহ করার ক্ষেত্রে প্রকাশক, লেখক ও সার্বিক তত্ত্বাবধানে নিয়োজিত ব্যক্তিদের উক্ত জীবনী গ্রন্থ রচনায় নিষ্ঠার সাথে ভক্তি নিয়ে সহযোগিতা করার জন্য মনোনিবেশ করেছি। প্রসংস্ক্রমে উল্লেখ্য যে, বাবাজান কেবলা চন্দনাইশী(রাঃ) এর পর্দাকরার পর থেকে বিভিন্ন দরবার ও অনেক তরিকত পিপাসু ব্যক্তি বর্গ বাবাজানের জীবনী জানতে চেয়ে আওলাদ গণের শরানাপন্ন হয়েছেন। কারণ বাবাজান কেবলা চন্দনাইশী মাইজভান্ডারী এর শেয়ার সমূহে তরিকত জগতে এক আধ্যাত্মিক জ্ঞান ভান্ডারের রাজ রহস্য লুকায়িত। উক্ত শেয়ার সমূহ যারা মনোযোগ সহকারে বার বার পড়েছেন আল্লাহর রহমতে তাদের হৃদয় চক্ষুর দ্বার উন্মুক্ত হয়েছে। মাইজভান্ডারী তরিকা সম্পর্কে সম্যক জ্ঞান ও তারা খুজে পেয়েছেন। এছাড়া বাবাভান্ডারী কেবলা কাবার খলিফাগণের মধ্যে বাবাজান চন্দনাইশী(কঃ) অন্যতম মশহুর খলিফা যার কারামাত বিভিন্ন জায়গায় অনেক তরিকত পহী লোকজন সহ

জনসাধারণ গভীর ভাবে শুনছেন। বাবাজান চন্দনাইশী (রাঃ) ও বাবাভান্ডারী কেবলা কাবার (কঃ) নিকট থেকে খেলাফাত লাভ করার পর মাইজভান্ডারী তরিকা প্রচার ও প্রসারের ক্ষেত্রে যে প্রতিকূলতার সম্মুখীন হয়েছেন তা তিনি তাঁর কোরান হাদীস ফিকাহ ও আধ্যাত্মিক জ্ঞান ও শক্তির মাধ্যমে অনুকূল পরিবেশ সৃষ্টি করেছেন। ফলে মাইজভান্ডারী তরিকত জগতে বিষয়গুলো বেশ আলোড়ন সৃষ্টি করেছে। উপরিক্ত বিষয়গুলোর কারণে বাবাজান কেবলা চন্দনাইশী (রাঃ) এর জীবনীর বিষয়ে যখন বিভিন্ন জায়গা থেকে চাহিদা বাড়তে থাকে তখন আওলাদগণের পক্ষ থেকে সিদ্ধান্ত হয় যে, অতি দ্রুততম সময়ে তাঁর জীবনী রচনা করার। সকলে মিলে আমাকে পৃষ্ঠপোষকতার দায়িত্বে দিলে আমি তা সঠিক ভাবে পালন করার চেষ্টা করেছি। যতদূর সম্ভব বিচার বিশ্লেষণ করে লেখক মহোদয়কে সাহায্য করেছি। আল্লাহ পাক আমার এ প্রচেষ্টাকে কবুল করার মধ্যে দিয়ে আমাকে অপরিসীম দয়ায় বাঁচিয়ে রাখুক আমীন।

পৃষ্ঠপোষক :- শাহজাদা ছৈয়দ আবু সাদাত মোহাম্মদ কায়েম

আল্-চন্দনাইশী মাইজভান্ডারী।

চন্দনাইশী বাবাজানের (ক:) আওলাদগন



পুত্র
↓

কন্যা
↓

- ১) শাহজাদা ছৈয়দ মাওলানা মোহাম্মদ জহুরুল আলম শাহ আলু চন্দনাইশী মাইজভান্ডারী (রাহ:)
- ২) শাহজাদা ছৈয়দ মোহাম্মদ নজমুল আলম শাহ আলু চন্দনাইশী মাইজভান্ডারী (রাহ:)
- ৩) শাহজাদা ছৈয়দ মোহাম্মদ মকছুদুল আলম শাহ আলু চন্দনাইশী মাইজভান্ডারী (মাদা:)

শাহজাদী মোস্তাফা খাতুন

সূচিপত্র

১. ভূমিকা
২. জন্মস্থান পরিচিতি
৩. ছাত্র জীবন
৪. বৈবাহিক জীবন
৫. বাবাজানের পীর অন্বেষণ ও খেলাফত লাভ
৬. দরবার শরীফ প্রতিষ্ঠায় বাবাজান
৭. বাবাজানভারীর জাহেরী হুকুমে বাবাজান চন্দনাইশীর (ক:) সন্ধিপ সফর
৮. বাবাজানভারী কেবলার (ক:) নির্দেশে বার্মায় সফর
৯. বাবাজানভারী কেবলা কাবার (ক:) ভিন্ন রকম নির্দেশ পালন
১০. বাবাজানভারী কেবলা কাবার (ক:) জাহেরী হুকুমে চন্দনাইশ দরবার শরীফে ওরশ উদযাপন
১১. বাবাজান চন্দনাইশীর (ক:) কারামত অধ্যায়
১২. বাবাজান কেবলা চন্দনাইশী মাইজভান্ডারী (ক:) এর দৈহিক ও স্বভাব বৈশিষ্ট্যের বর্ণনা
১৩. বাবাজান কেবলা চন্দনাইশী মাইজভান্ডারী (ক:) এর ওফাত
১৪. বাবাজান কেবলা চন্দনাইশী (ক:) সম্পর্কে মহামনীষীদের মন্তব্য
১৫. বাবাজান কেবলা চন্দনাইশীর (ক:) পীরি শাজরা
১৬. উপসংহার

ভূমিকাঃ

সমস্ত প্রশংসা আল্লাহ্ রাব্বুল ইজ্জতের যিনি সমগ্র সৃষ্টিকে সূচারূপে সৃজন করেছেন। তিনিই পালন কর্তা, বিচার কর্তা ও মুক্তিদাতা এবং সাথে সাথে রহমত ও জালালিয়তের অধিকারী, যার প্রশংসার অন্ত নাই। এই অনন্ত গুণের অধিকারী সৃষ্টির মাঝে মানুষকে একমাত্র ধারণ ক্ষমতা দিয়ে পরিপূর্ণতা দিয়েছেন। আল্লাহ পাক বলেন: (আরবী)
অর্থ:-আল্লাহর রঙ্গে রঞ্জিত হও। এই রহস্যময় গুণের বর্ণনার মধ্যে অনুধাবন করা যায় যে, মানুষ সৃষ্টির সেরা জীব। আর সৃষ্টির সেরা জীবের প্রথম উদাহরণ স্বরূপ উপস্থাপন করা যায় আমাদের প্রিয় রাসুল (সাঃ) যিনি আকায়ে মওলা, তাজেদারে মদিনা, সরকারে দোআলম, শ্রেষ্ঠ মুরশিদ হযরত মুহাম্মদ মুস্তাফা আহমদ মুজতবা (সাঃ) যার অন্যতম মোজেযা হচ্ছে সমগ্র সৃষ্টির মাঝে আউলিয়া-এ কেরাম যারা আল্লাহর গুণে গুণান্বিত হয়ে আল্লাহর মারফত হাছিলের মধ্যে দিয়ে মানুষকে হেদায়তের পথ দেখিয়েছেন। পরিচয় করে দিয়েছেন ও দিবেন। আল্লাহর সাথে মানবের মিলন ও পরিপূর্ণতায় মানুষ খুঁজে পেয়েছেন মুক্তির অন্যতম উপায়। আর এসব সৃষ্টির সেরা মানুষের জীবন চরিত্র জানা, বুঝা ও গ্রহণ করা মানুষের জন্য যেরূপ কল্যাণময় তদ্রূপ মুক্তির বার্তা। এসব আউলিয়াদের মধ্যে যার জীবন চরিত্রকে উপস্থাপন করতে যাচ্ছি তিনি হচ্ছেন মাইজভান্ডারী তরিকার অন্যতম ধারক ও বাহক গাউছেজামান হযরত ছৈয়দ মাওলানা আব্দুল লতিফ শাহ্ বাবাজান কেবলা চন্দনাইশী মাইজভান্ডারী (রঃ)। যিনি চন্দনাইশ দরবার শরীফের প্রতিষ্ঠাতা এবং যার জীবনী জানার মাধ্যমে আমরা তথা ত্বরিকত পন্থী মানুষেরা মুক্তির বার্তা পেতে পারি এবং আধ্যাত্মিকতা হৃদয়ঙ্গম করে কল্যাণের পথ প্রশস্ত করতে পারি। দেরিতে হলেও বাবাজান কেবলা চন্দনাইশী মাইজভান্ডারীর (কঃ) জীবনী প্রকাশনার চেষ্টার ফল স্বরূপ মহান আল্লাহর দরবারে শোকরানা আদায় করছি

এবং সাথে সাথে প্রিয় নবী (সাঃ) এর অসংখ্য দরুদ পেশ করছি। আমিন ছুম্মা আমিন।

জন্ম স্থান পরিচিতি

ভারতীয় উপমহাদেশে ব্রিটিশ সময়কালে চাটগাঁ (বর্তমান চট্টগ্রাম) জেলার অন্তর্গত তৎকালীন পটিয়া মহকুমার অধীন (বর্তমান চন্দনাইশ থানাধীন) চন্দনাইশ গ্রামে মহান আল্লাহর সান্নিধ্য প্রাপ্ত ও হযরত শাহজালাল শাহ (রঃ) এর পূর্ব বংশীয় হযরত নূরুদ্দীন শাহ (রঃ) এর বংশে ছৈয়দ আলী হোছেনের ঘরে গৌছেজামান হযরত ছৈয়দ মাওলানা আব্দুল লতিফ শাহ বাবাজান কেবলা চন্দনাইশী মাইজভান্ডারী (রঃ) ১৮০০ সালের শেষ দশকে জন্মগ্রহণ করেন। বর্তমান চন্দনাইশ গ্রাম পাকিস্তান আমলে জোয়ারা ইউনিয়নের অন্তর্ভুক্ত ছিল। শোনা যায় চন্দনাইশ গ্রাম চন্দন নামের এক সুভাষিত গাছের নামে নামকরণ করা হয়। পরবর্তীতে বাংলাদেশ স্বাধীনের পর চন্দনাইশ গ্রাম পটিয়া থানা থেকে পৃথক হয়ে চন্দনাইশ থানায় রূপান্তরিত হয়। চন্দনাইশ শব্দটি বাবাজান কেবলা চন্দনাইশীর নিকট এত শ্রুতিমধুর ছিল যে, চন্দনাইশ শব্দটির প্রবল আকর্ষণ হেতু চন্দনাইশ থানা সৃষ্টির বছর পূর্বে চন্দনাইশী বাবাজান নিজ দরবারের নাম চন্দনাইশ দরবার শরীফ নামে পরিচিত হতে বেশি পছন্দ করেছেন। এছাড়া চন্দনাইশী বাবাজানের (কঃ) অনেক ভক্তের মুখে শোনা গেছে যে, পাকিস্তান আমলে চন্দনাইশী বাবাজান(কঃ) বছবার বলেছেন, চন্দনাইশ একদিন স্বাধীন থানায় পরিনত হবে। পরবর্তীতে দেখা যায় এত প্রসিদ্ধ নাম থাকা সত্ত্বেও চন্দনাইশ নামক উপজেলা সরকারি ভাবে নামকরণকৃত হয়, যা বাবাজান কেবলা চন্দনাইশীর বেলায়তী ক্ষমতার বহিঃপ্রকাশ।

ছাত্র জীবন

বাবাজান কেবলা চন্দনাইশীর (রাঃ) নিজ জবানে বর্ণিত, যা পরবর্তীতে উনার ভক্ত মুরিদান কর্তৃক বর্ণিত এবং উনার আত্মীয় স্বজনের কাছ থেকে জানা যায় যে, বাবাজান কেবলা চন্দনাইশী মাইজভান্ডারী (রঃ) প্রাথমিক শিক্ষা জীবন শুরু

করেন নিজ গ্রামের হযরত শাহ আমিনুল্লাহ (রঃ) ও হযরত নজিবুল্লাহ শাহ (রঃ) নামক দুইজন অলি আল্লাহর হাতে। ঐ সময় তিনি প্রখ্যাত অলিদ্বয়ের নজরে পড়েন এবং তাদের পরামর্শে কোরআন, হাদীস, ফিকহ ও আরবী ভাষায় জ্ঞান অর্জনের জন্য চট্টগ্রাম শহরে মাদ্রাসায় ভর্তি হন। তিনি জামাতে উলা কৃতিত্বের সাথে লেখাপড়া শেষ করেন। তিনি চট্টগ্রাম শহরে মাদ্রাসায় পড়াকালীন অবসর সময়ে বিভিন্ন আউলিয়া গণের মাজারে সফর করতেন। আমানত শাহ (রঃ), মিসকীন শাহ (রঃ), গরীব উল্লাহ শাহ (রঃ) তথা অন্যান্য আউলিয়া কেরামগণের মাজার জিয়ারত করতে বেশি ভালোবাসতেন। এভাবে তিনি জীবদ্দশায় থাকা আউলিয়া গণের ছোহবতে গিয়ে আধ্যাত্মিক জ্ঞান অর্জনের চেষ্টা করতেন। একদিন তিনি জানলেন যে, মাইজভান্ডার দরবার শরীফে দুজন আল্লাহর অলি আছেন। যাদের কাছে বিভিন্ন হক্কানী আলেমগণ গমন করেন। তাই ছাত্র অবস্থায় থাকাকালীন একদিন তিনি মাইজভান্ডার শরীফে যাওয়ার মনস্থির করেন। সেই উদ্দেশ্যে ফজরের নামাজ পড়ে মাইজভান্ডার শরীফের উদ্দেশ্যে রওনা দেন। তখনকার সময়ে হযরত কেবলা আলম মাইজভান্ডারী (কঃ) জীবদ্দশায় ছিলেন না। তখন বাবা ভান্ডারী কেবলা মাইজভান্ডারী (কঃ) বারো বছর পাহাড় – জঙ্গল সফর শেষে মাইজভান্ডার দরবার শরীফে হযরতের স্থলাভিষিক্ত হন। ঐ দিন চন্দনাইশী বাবাজান (রাঃ) ঠিক দুপুরের সময়ে মাইজভান্ডার দরবার শরীফে উপস্থিত হন। চন্দনাইশী বাবাজান ওয়ু করে জোহরের সালাত আদায় করে হযরতের রওজা শরীফ জিয়ারত করে বাবা ভান্ডারী (কঃ) এর হুজুরা শরীফের দিকে গমন করেন। চন্দনাইশী বাবাজান হুজুরা শরীফে প্রবেশ করার সাথে সাথে বাবা ভান্ডারী কেবলা (কঃ) মেহমান এসেছেন বলে আপ্যায়ন করার জন্য খাদেমদের ডাকতে থাকেন। সেই সময় বাবা ভান্ডারী (কঃ) এর আম্মাজান নিজে বাটি ভর্তি সেমাই নিয়ে হুজুরা শরীফে প্রবেশ করেন এবং বাবা ভান্ডারী নিজ হাতে চন্দনাইশী বাবাজানকে সেমাই খাইয়ে দেন। খাওয়া শেষে চন্দনাইশী বাবাজানের এলেম জগতে অদ্ভুত অবস্থার সৃষ্টি হয়। আধ্যাত্মিক জগতে

পরিপূর্ণভাবে প্রবেশ করলে লেখাপড়া জগতের ব্যাঘাত ঘটবে চিন্তা করে বাবা ভান্ডারী (কঃ) এর নিকট থেকে ইলমে উন্নতি লাভের দোয়া চেয়ে হুজুরা শরীফ থেকে বিদায় গ্রহণ করার অনুমতি চাইলে বাবা ভান্ডারী কেবলা (কঃ) চন্দনাইশী বাবাজান (কঃ) কে ইলম অর্জনে সফলতা লাভের জন্য দোয়া করেন এবং ইশারায় চট্টগ্রাম শহরে চলে যেতে বলেন। মাইজভান্ডারী তুরীকার বেশ কিছু বিষয়ে চন্দনাইশী বাবাজানের মনে প্রশ্ন জাগলেও একজন মহান আল্লাহর অলীর সান্নিধ্যকে সম্মান জানিয়ে কোনোরূপ মন্তব্য না করে মাইজভান্ডার দরবার থেকে চট্টগ্রাম শহরের উদ্দেশ্যে রওনা দেন। পথে চন্দনাইশী বাবাজান এর মনের মধ্যে মাইজভান্ডারী তুরিকত জগতের বিভিন্ন রকম প্রশ্ন তাড়া দিতে থাকে, কিন্তু চন্দনাইশী বাবাজান বাবা ভান্ডারী কেবলা কাবা এর ব্যাপারে মনের মধ্যে কোনো কৌতুহল না রেখে নিজকে সংযত করেন। অবশেষে চট্টগ্রাম শহরে পৌঁছে পুনরায় মাদ্রাসার লেখাপড়ায় মনোনিবেশ করেন। বাবা ভান্ডারী কর্তৃক সেমাই খাওয়ার পর চন্দনাইশী বাবাজান লেখাপড়া জগতে কুরআন, হাদিস, ফিকহ, ইজমা, কিয়াছ এবং আরবী, উর্দু ও ফারসী ভাষার বিষয়ে এমন গভীরতা অর্জন করতে থাকেন যে, অনেক সময় ওস্তাদগণ হতভম্ব হয়ে যেতেন। চন্দনাইশী বাবাজান (রঃ) নিজেই বলেছেন যে, বিভিন্ন সময় ওস্তাদগণ অন্যান্য ছাত্রদেরকে জ্ঞান দানের ক্ষেত্রে তাঁর কাছ থেকে জেনে নিতে বলতেন অর্থাৎ কোনো বিষয় না জানলে চন্দনাইশী বাবাজানের কাছে থেকে জেনে নিতে বলতেন)। এক পর্যায়ে ওস্তাদরা চন্দনাইশী বাবাজানকে ভারতে কলিকাতা আলীয়া মাদ্রাসায় যাওয়ার জন্য বলতে থাকেন। চন্দনাইশী বাবাজান ওনাদের পরামর্শক্রমে ভারতে চলে যাওয়ার প্রস্তুতি গ্রহণ করেন। যা বাবাভান্ডারী কেবলা কাবা (কঃ) কর্তৃক নিজ হাতে সেমাই খাওয়ানোর ফল স্বরূপ। যাই হোক চন্দনাইশী বাবাজান অবশেষে উচ্চতর ইসলামী ডিগ্রী লাভের জন্য ভারতে চলে যান যেখানে তিনি দীর্ঘ ৭ বছর অবস্থান করেন। তৎমধ্যে ৪ বছর ছিল ছাত্রত্বকালীন সময় এবং বাকী ৩ বছর কর্মজীবন। উল্লেখ্য যে, চন্দনাইশী বাবাজানের ছাত্র জীবনে মাইজভান্ডার শরীফে

বাবাভান্ডারী কেবলা কাবার ছোহবতে প্রথম যাত্রা ছিল আল্লাহর অলীর প্রতি তাজিম এবং ফয়েজ বরকত হাছিল করা। কিন্তু বায়াত গ্রহণ করার মকছুদ ছিল না। এভাবে তিনি বাবাভান্ডারী কেবলা কাবার ফয়েজ বরকত এর উছিলায় ভারতে গিয়ে কোরআন, হাদীস এবং আরবী ও ফারসী ভাষায় উপর পাণ্ডিত্য অর্জন করেন।

বৈবাহিক জীবন

বাবাজান কেবলা চন্দনাইশী শিক্ষা দীক্ষা সমাপ্তি পূর্বক কলিকাতার মাদ্রাসায় তিন বছর অধ্যাপনা করে নিজ দেশে তথা নিজ গ্রামে ফিরে আসেন এবং আত্মীয়-স্বজনের অনুরোধে বিবাহের জন্য প্রস্তুতি গ্রহণ করেন। অবশেষে বাবাজান চন্দনাইশ গাছবাড়ীয়া সংলগ্ন খলিফা পাড়া নিবাসী হযরত শাহ আলীউজ জামান (রঃ) নামক বিখ্যাত আল্লাহর অলির একমাত্র কন্যা আমানতুর রহীমের সাথে বিবাহ বন্ধনে আবদ্ধ হন। বাবাজান চন্দনাইশী (রঃ) এর সন্তান সন্ততি ছিল ১০ জনের উপরে যাদের প্রত্যেকে আমাতুর রহীমের গর্ভেই আসেন। কিন্তু আল্লাহর হুকুমে প্রথম ৭ জন ছেলে সন্তান প্রতিবারই ভূমিষ্ঠ হওয়ার পরপরই মারা যান। পরবর্তীতে খোদার অপরিসীম দয়ায় আমাতুর রহীমের গর্ভে আসা বাকী সন্তানরা জীবন লাভ করেন যাদের নাম বাবাজানের আওলাদগণের পরিচয় পরিচ্ছেদে উল্লেখ করা হয়েছে। বাবাজানের বৈবাহিক জীবন ছিল সুখকরও শান্তিময়। বৈবাহিক জীবনে সুন্দরভাবে ও সুনতি রূপে বাবাজান চন্দনাইশী (রঃ) জীবন যাপন করেন। বাবাজানের স্ত্রীও বাবাজানের জীবনের শেষ দিন পর্যন্ত ভালোভাবে দেখাশুনা করেন এবং চন্দনাইশ দরবার শরীফের খেদমত করে যান।

বাবাজানের পীর অন্বেষণ

চন্দনাইশী বাবাজান কেবলা ছোটকাল থেকে লেখাপড়ার পাশাপাশি রিয়াজত ইবাদত ও সাধনা করাকে বেশ পছন্দ করতেন। কলিকাতা মাদ্রাসা থেকে নিজ দেশে আসার পর বহুদেশের দূর-দূরান্ত স্থানে ওয়াজ-নছিহত করার উদ্দেশ্যে

সফর করতেন। তৎকালীন সময়ে বড় মাপের আলেম হিসেবে বাবাজানের বেশ সুনাম ছিল। কিন্তু বাবাজান স্বাধীন একজন আল্লাহর অলির সান্নিধ্য গিয়ে বায়াত গ্রহণ করে আধ্যাত্মিকতা সাধন করার জন্য ব্যাকুল থাকতেন। বাবাজান যেখানে যেতেন সেখানে উপস্থিত হয়ে সেখানকার অবস্থা পর্যবেক্ষণ করতেন, কোন আল্লাহর অলি জাহেরীভাবে এ ধরা ধামে থাকলে চন্দনাইশী বাবাজান তাদের সাথে দেখা করতেন। তারা ও বাবাজান কেবলকে মুজতাহিদ মাওলানা হিসেবে অন্যভাবে দেখতেন। চন্দনাইশী বাবাজানের সাথে যখন কোন আউলিয়ার সাথে দেখা হতো তখন ওনারা বুঝতে পারতেন যে, চন্দনাইশী বাবাজান একজন বড় মাপের মাওলানা। সে কারণে চন্দনাইশ বাবাজানকে তারা মুজতাহিদ মাওলানা বলতেন। কিন্তু বাবাজান মহান পীরের হাতে বায়াত হওয়ার জন্য অবিচল। এই উদ্দেশ্যে বার্মা, ভারতসহ বহু দেশের বিভিন্ন পীরের নিকট গমন করতেন, বিভিন্ন পীর সাহেবদেরকে পরীক্ষা করার জন্য। সে সময় বহু দেশে অন্যান্য তুরিকার ন্যায় ছড়িয়ে পড়ে ছিল মাইজভাণ্ডারী তুরিকা ডংকা। মাইজভাণ্ডার দরবার শরীফের মসনদে তখন আসীন ছিলেন গাউছুল আজম হযরত ছৈয়দ মাওলানা আহমদ উল্লাহ মাইজভাণ্ডারী প্রকাশ হযরত কেবলা (ক.) এর ভ্রাতুষ্পুত্র গাউছুল আজম হযরত ছৈয়দ গোলামুর রহমান মাইজভাণ্ডারী প্রকাশ বাবাজান (ক.)। এছাড়াও গাউছুল আজম মাইজভাণ্ডারী খলিফাবন্দ ও বাবা ভাণ্ডারী কেবলার বেশ খলিফাবন্দ বিভিন্ন জায়গায় দরবারসহ সমাসীন ছিলেন। এ সকল মহান আল্লাহর অলিগন মাইজভাণ্ডারী তুরিকার ফয়েজ দানে ও আধ্যাত্মিক শরাফত প্রতিষ্ঠায় রত ছিলেন। চন্দনাইশী বাবাজান কেবলা মাইজভাণ্ডারী তুরিকার বেশকিছু বিষয় নিয়ে দ্বিমত ছিলেন বিধায় মাইজভাণ্ডারী তুরিকার প্রতি মনোযোগ না দিয়ে অন্য তুরিকার বিষয়ে সাধনায় মগ্ন ছিলেন। কারণ চন্দনাইশী বাবাজান মাইজভাণ্ডারী তুরিকার বিরোধী ছিলেন। অন্য দিকে চন্দনাইশী বাবাজান স্বাধীন ও মহান পীর অশ্বেষণের লক্ষ্যে বিভিন্ন জায়গায় সফর করতে থাকেন। ভারতের আজমগড় শহরের একজন পীর সাহেব যিনি আজম গড়ি শাহ নামে পরিচিত

বার্মার রেঙ্গুন শহরে আসলে বাবাজান চন্দনাইশী আজমগড়ি সাহেবের ভক্তদের অনুরোধে তিনি রেঙ্গুন শহর ভ্রমণ করেন এবং আজমগড়ি সাহেবের সাথে সাক্ষাতের জন্য অপেক্ষায় থাকেন। ঠিক সেই সময় জনৈক মাইজভাণ্ডারী ভক্ত আজম গড়ির শাহের সামনে উপস্থিত হলে আজম গড়ি শাহ তাকে মাইজভাণ্ডারী “শের” শোনাতে বলেন। উক্ত ভক্ত মাইজভাণ্ডারী কালাম এর গান শুরু করলে হযরত আজমগড়ি শাহ অবর নয়নে কাঁদতে থাকেন। চন্দনাইশী বাবাজান কেবলা দূর থেকে তা দেখে আজমগড়ি শাহের সাথে সাক্ষাৎ না করে বায়াতের ইচ্ছা ত্যাগ করে পুনরায় নিজ দেশে ফিরে আসেন এবং পুনরায় মহান কোন পীরের তালাশে থাকেন। এভাবে তিনি অনেক দিন কাটিয়ে দেন। বাবাজান অবশেষে বেলায়ত সাধনার পাশাপাশি পীর অশ্বেষণে ৪০ রাত্রি মোরাকাবা করার সিদ্ধান্ত গ্রহণ করেন। বহরম পাড়া মসজিদে খতিব থাকাকালীন সময়েই তিনি এই সিদ্ধান্ত গ্রহণ করেন। উল্লেখ্য যে, সাতবাড়ীয়া বহরম পাড়া জামে মসজিদে খতিবের দায়িত্ব পালন কালে উক্ত এলাকায় সাতবাড়ীয়া দরবার শরীফের প্রতিষ্ঠাতা হযরত সৈয়দ হাফেজ মাওলানা ফজলুর রহমান শাহ মাইজভাণ্ডারী (রঃ) ও উনার ভক্তদের সাথে মাইজভাণ্ডারী তুরিকার বেশকিছু তুরিকা বিষয়ক আমল নিয়ে ফতোয়া বিরোধেও জড়িয়ে পড়েন। চন্দনাইশী বাবাজান তখন মাইজভাণ্ডারী তুরিকা মানতেন না। তাই হযরত সৈয়দ হাফেজ মাওলানা ফজলুর রহমান শাহ মাইজভাণ্ডারী এর ভক্তবৃন্দদের ছেলে মেয়েরা যখন চন্দনাইশী বাবাজানের কাছে কোরান শিক্ষার জন্য আসতো, ঐ সময় চন্দনাইশী বাবাজান ঐ সব ছেলে মেয়েদের রাগান্বিত হয়ে বেত দিয়ে প্রহার করতেন। এমনকি তিন একবার মাইজভাণ্ডারী জনৈক ভক্তের পাকা কবর ভেঙ্গে দেন। কারণ চন্দনাইশী বাবাজান মাইজভাণ্ডারী তুরিকার বিরূপ ছিলেন বিধায় হাফেজ ফজলুর রহমান শাহ (রঃ) ও উনার ভক্তদের সাথে চন্দনাইশী বাবাজান রীতিমতো ধর্মীয় যুদ্ধে লিপ্ত হন এবং মাইজভাণ্ডারী তুরিকার বিরুদ্ধে ওয়াজ নসিহত করতে থাকেন। হাফেজ ফজলুর রহমান শাহ মাইজভাণ্ডারী (রঃ) এর ভক্তগণ উনাদের পীর সাহেবকে তাদের

অতিষ্ঠতার কথা জানান। হাফেজ ফজলুর রহমান শাহ (রঃ) ওদের বলেন তারা যেন চন্দনাইশী মাওলানা এর সাথে কোনো ধরনের বেয়াদবি না করেন। কারণ হাফেজ ফজলুর রহমান শাহ মাইজভান্ডারী (রঃ) একজন আল্লাহর অলি, তিনি ভালোভাবেই জানতেন চন্দনাইশী বাবাজান অতি শীঘ্রই গাউছুল আজম সৈয়দ গোলামুর রহমান শাহ প্রকাশ বাবা ভান্ডারীর খলিফা হতে যাচ্ছেন। কিন্তু হাফেজ ফজলুর রহমান শাহ মাইজভান্ডারী (রঃ) ভক্তদের নিকট গোপনীয় বিষয়টি সরাসরি প্রকাশ না করে রহস্যপূর্ণ ভাবে প্রকাশ করতে ইচ্ছা পোষণ করলেন। হাফেজ ফজলুর রহমান শাহ মাইজভান্ডারী (রঃ) তার এক ভক্তের মাধ্যমে চন্দনাইশী বাবাজান (রঃ) এর নিকট দাওয়াত প্রদান করেন। চন্দনাইশী বাবাজানও উক্ত দাওয়াত কবুল করে সাতবাড়িয়া দরবার শরীফ যাওয়ার ইচ্ছা প্রকাশ করেন। এদিকে হাফেজ ফজলুর রহমান শাহ মাইজভান্ডারীর ভক্ত মুরিদগণও ভাবতে থাকলেন তাদের বাবাজান সেই রাতে চন্দনাইশী বাবাজান কে ইচ্ছেমতো শাসন করে জব্দ করবেন যাতে চন্দনাইশী বাবাজান আর কোনদিন মাইজভান্ডারী তরিকার বিরুদ্ধে কথা বলতে না পারেন। রাত ঘনিয়ে এলে চন্দনাইশী বাবাজান কেবলা যথাসময়ে সাতবাড়িয়া দরবার শরীফে গমন করেন। উক্ত দরবার শরীফে প্রবেশের সাথে সাথে হাফেজ ফজলুর রহমান শাহ মাইজভান্ডারী চন্দনাইশী বাবাজান কেবলার সাথে মুসাফাহা করে হুজরা শরীফের নিজ আসনে বসান এবং প্রয়োজনীয় আহারাди চন্দনাইশী বাবাজানের সামনে পেশ করার জন্য ভক্তদের নির্দেশ দেন। চন্দনাইশী বাবাজান কেবলা অনিচ্ছাসত্ত্বেও সৌজন্যতার খাতিরে তা গ্রহণ করেন। আহারের পর হাফেজ ফজলুর রহমান শাহ মাইজভান্ডারীর হুকু বাবাজানের নিকট উপস্থিত করলেন। বাবাজান তা থেকে হুকু না টেনে অন্য একটি হুকু পেশ করতে বলেন। হাফেজ ফজলুর রহমান মাইজভান্ডারী এর নির্দেশক্রমে ভক্তদের একজন চন্দনাইশী বাবাজানের সামনে একটি তামাক সজ্জিত হুকু পেশ করেন। বাবাজান চন্দনাইশী তা থেকে হুকু টানতে থাকেন এবং কোনো রকম তর্ক বিতর্ক ব্যতীত হাফেজ শাহ মাইজভান্ডারী এর সাথে

বিভিন্ন বিষয় নিয়ে কথা বলতে থাকেন। উপস্থিত সবাই এসব দেখে রাগে প্রজ্বলিত হতে থাকেন। কিন্তু তাদের পীর ও মুরশিদ হযরত হাফেজ ফজলুর রহমান শাহ এর সামনে কোনো কথা বলতে পারেন না। যাইহোক, রাত বেশি হওয়াতে চন্দনাইশী বাবাজান কেবলা উক্ত দরবার শরীফ থেকে বের হয়ে নিজ স্থানে গিয়ে প্রতিদিনের মতো পুনরায় পীর অন্তেষণের জন্য ৪০ রাত্রির মোরাকাবার ধারাবাহিকতা রক্ষা করতে থাকেন। এদিকে চন্দনাইশী বাবাজান কেবলা সাতবাড়িয়া দরবার শরীফ থেকে প্রস্থান করার পর হাফেজ ফজলুর রহমান শাহ (রঃ) নিজ ভক্ত-মুরিদ দের বলেন যে, অনতি বিলম্বে চন্দনাইশে জোয়ারা ইউনিয়নে গাউসুল আজম হযরত মাওলানা ছৈয়দ গোলাম রহমান বাবা ভান্ডারী (কঃ) এর আরেকটি স্টেশন প্রতিষ্ঠিত হতে যাচ্ছে। কারণ খুব শীঘ্রই হযরত মাওলানা সৈয়দ আব্দুল লতিফ শাহ মাইজভান্ডারী মাইজভান্ডার শরিফের বাবা ভান্ডারীর হাতে বায়াত গ্রহণ পূর্বক খেলাফতে অধিষ্ঠিত হবেন। এছাড়াও তিনি বলেন যে হযরত মাওলানা সৈয়দ আব্দুল লতিফ শাহ একজন উপযুক্ত মুজতাহিদ ও খোদা প্রেমিক পরহেজগার আলেম। এরূপ খোদা প্রেমিক কখনো বাবা ভান্ডারী মাইজভান্ডারী সংস্পর্শে না গিয়ে থাকতে পারবেন না এবং তিনি মাইজভান্ডারী তরিকা অনুসরণ করে অমূল্য রত্ন আহরণ পূর্বক বেলায়তী ধারা অব্যাহত রাখবেন। হযরত হাফেজ সৈয়দ ফজলুর রহমান শাহ(রঃ) মাইজভান্ডারী এর থেকে বাবাজান কেবলা চন্দনাইশী সম্পর্কে এসব বাণী শ্রবণ পূর্বক সাতবাড়িয়া দরবার শরীফের ভক্ত আশেকগন বাবাজান কেবলা চন্দনাইশীকে শ্রদ্ধা ও ভক্তি করতে শুরু করেন। অপরদিকে বাবাজান কেবলা চন্দনাইশীর ৪০ রাত্রির মোরাকাবার ধারাবাহিকতা চলতে থাকে। এভাবে বাবাজান কেবলা চন্দনাইশী ৩৯ রাত্রির ধ্যান শেষ হয়ে যায় এবং তিনি (চন্দনাইশী বাবাজান কেবলা) ৩৯ রাত্রিতে ৩৯ জন পীরের সাক্ষাৎ লাভ করেন। কিন্তু এতে চন্দনাইশী বাবাজান কেবলা পীর অন্তেষণে ক্ষান্ত হতে পারেননি, তাই চল্লিশতম রাত্রিতে ধ্যান মগ্ন থাকা অবস্থায় হযরত গাউছুল আজম সৈয়দ গোলামুর রহমান শাহ বাবা ভান্ডারী (কঃ) চন্দনাইশী বাবাজান

(রঃ) এর সামনে উপস্থিত হন এবং তিনি (বাবা ভাভারী) চন্দনাইশী বাবাজান কেবলাকে বলেন, “আমি ছাড়া আমার ছেলেকে আর কে সাক্ষ্য দিতে পারে?” এ বলে তিনি চন্দনাইশী বাবাজান কেবলাকে পরদিন মাইজভাভার শরীফে উনার সাথে দেখা করতে বলেন। বাবাজান চন্দনাইশী ঐ অবস্থায় অপলক দৃষ্টিতে তাকিয়ে থাকেন। বাবা ভাভারী মাইজভাভারী তুরিকা মতে তাজিম করতে বলে হঠাৎ অদৃশ্য হয়ে যান। তারপর চন্দনাইশী বাবাজান কিছুক্ষণ পর স্বাভাবিক হালতে ফিরে এসে তাহাজ্জুদ নামাজ পড়ার জন্য দাঁড়িয়ে যান এবং পরের দিন বাবা ভাভারীর (কঃ) সাথে সাক্ষাৎ পূর্বক বায়াতের সিদ্ধান্ত গ্রহণ করেন। সৌভাগ্যক্রমে পরবর্তী দিনে ফটিকছড়ির আঁধার মানিক অঞ্চলে চন্দনাইশী বাবাজান কেবলার ওয়াজ মাহফিলের দাওয়াত ছিল, তাই চন্দনাইশী বাবাজান কেবলা (রঃ) সিদ্ধান্ত নেন যে, সকালে ফটিকছড়ির উদ্দেশ্যে রওনা দিয়ে প্রথমে মাইজভাভার শরীফ গমন পূর্বক বাবাভাভারী (কঃ) এর সাথে সাক্ষাত করে আঁধার মানিক অঞ্চলে ওয়াজ করতে যাবেন। যাইহোক চন্দনাইশী বাবাজান কেবলা (রঃ) রাতের বিশ্রামে চলে যান। পরের দিন ফজরের নামাজের পর ফটিকছড়ির উদ্দেশ্যে রওনা দেন। তৎকালীন সময়ে যেহেতু যানবাহনের তেমন কোন ব্যবস্থা ছিল না, তাই কিছু পথ হেঁটে আর কিছু পথ নৌকা যোগে রওনা হন। পথিমধ্যে দেরি হয়ে যাওয়াতে ফটিকছড়িতে পৌঁছাতে প্রায় সন্ধ্যার কাছাকাছি হয়ে যায় ফলে চন্দনাইশী বাবাজান কেবলা (রঃ) সিদ্ধান্ত নেন যে, প্রথমে মাইজভাভার শরীফে গিয়ে বাবাভাভারী (কঃ) কেবলা আলমের সাথে দেখা করতে গেলে দেরি হয়ে যাবে আবার ঐ দিকে আঁধার মানিকে ওয়াজ করতে হবে এবং মানুষজন অপেক্ষারত থাকলে বিব্রতকর অবস্থায় পড়তে হবে। তাই চন্দনাইশী বাবাজান কেবলা (রঃ) প্রথমে ওয়াজের মাহফিলে চলে যান এবং সেখানে ওয়াজের নসিহত সম্পন্ন করেন। ওয়াজের শ্রোতাগণ ও চন্দনাইশী বাবাজান কেবলার (রঃ) বেশ সমাদার পূর্বক রাত্রি যাপন করতে বলেন। বাবাজানও সিদ্ধান্ত গ্রহণ করেন যে, রাত্রি বেলা মাইজভাভার শরীফে গিয়ে বাবা ভাভারী কেবলা আলমের

বিশ্রামের ব্যাঘাত ঘটতে চান না তাই আঁধার মানিকে অবস্থান করেন। পরের দিন ফজরের নামাজের পর চন্দনাইশী বাবাজান (রঃ) বাবাভাভারী (কঃ) সাথে সাক্ষাতের উদ্দেশ্যে রওনা দিতে চাইলে উক্ত এলাকার জনগন চন্দনাইশী বাবাজানকে আরেকটি রাত যাপন করার জন্য বিশেষভাবে অনুরোধ করেন। কিন্তু তিনি বাবাভাভারী কেবলা আলমকে নিজের মুর্শিদ হিসেবে পাওয়ার জন্য মনের মধ্যে খোদায়ি প্রেম অনুভব করতে থাকেন। তাই চন্দনাইশী বাবাজানের নিকট আর ভালো লাগছে না। তাই জনগণের শত অনুরোধ সত্ত্বেও মাইজভাভার শরীফের উদ্দেশ্যে রওনা দিলেন। অবশেষে মাইজভাভার শরীফে পৌঁছে চন্দনাইশী বাবাজান পুকুরে ওয়ু করে গাউছুল আজম মাইজভাভারি কেবলা বাবার রওজা শরীফে ঢুকে জিয়ারত করেন। জিয়ারত অবস্থায় চন্দনাইশী বাবাজান (রঃ) এর অস্থিরতা আস্তে আস্তে শান্ত হয়ে যায়। জিয়ারত শেষে তিনি বেশ খানিকটা সময় হযরতের রওজায় অবস্থান করেন। তারপর ধীরে ধীরে রওজা শরীফ থেকে বের হয়ে বাবাভাভারী কেবলা আলমের হুজরা শরীফের দিকে কিছুক্ষণ লক্ষ্য করে হুজরা শরীফে বাবাভাভারী (কঃ) সাথে সাক্ষাতের জন্য অগ্রসর হন। বাবাভাভারি কেবলা আলমের আসনের সামনে বেশ খাদেম, আশেক, খলিফা ও ভক্তবৃন্দদের দন্ডায়মান অবস্থায় দেখতে পান। চন্দনাইশী বাবাজান (রঃ) কোনো রূপ সংকোচ না করে বাবাজান কেবলা আলমের হুজরা শরীফে ঢুকে পড়েন। হুজরা শরীফে ঢুকতে না ঢুকতেই আসনে বসা বাবাভাভারী (কঃ) মুচকি হেসে বলেন, মাওলানা সাহেব কি ব্যাপার প্রথমে আমার কাছে এসে তারপর ওয়াজে যাওয়ার কথা ছিল। বাবাভাভারী কেবলা (কঃ) আলমের জবানপাকে এরূপ কথা শুনে চন্দনাইশী বাবাজান (রঃ) প্রকম্পিত হৃদয়ে হঠাৎ মনে করেন যে, বাবাভাভারী কেবলা আলম (কঃ) মনের কুটিরে যে বিষয় থাকে তাও জানতে পারেন। ভাবতে ভাবতে চন্দনাইশী বাবাজান (রঃ) বাবা ভাভারি কেবলা কাবার পদ যুগলে লুঠিয়ে পড়েন এবং এ অবস্থায় বাবাভাভারি কেবলা (কঃ) চন্দনাইশী বাবাজানের উপর এমন ফয়েজ বর্ষণ করেন যে, চন্দনাইশী বাবাজান এর

ওয়াজদের হালত শুরু হয়। উপস্থিত বাবাজানি কেবলা কাবার ভক্ত ও খাদেমগণ যথা হেদায়ত আলী শাহ (প্রকাশ লক্ষীর বাপ) , রহম আলী শাহ সহ অন্যান্য ভক্ত ছেমা শুরু করেন আর চন্দনাইশী বাবাজানও এমন ওয়াজদ করতে থাকেন যে ,এ অবস্থায় দিবা শেষ হয়ে রাত্রিও প্রায় শেষ হয়ে যায় কিন্তু ওয়াজদ ও ছেমা শেষ হয় না। অবশেষে প্রায় ভোর রাতে ওয়াজদ সহকারে ছেমার পরিসমাপ্তি ঘটে। চন্দনাইশী বাবাজান (রঃ) ও এক পর্যায়ে বাবাজানি কেবলা আলমের সামনে লক্ষীর বাপ, রহম আলী সহ অন্যান্য জলিলুর কদর ভক্তদের সাথে নীচে বসে পড়েন। চন্দনাইশী বাবাজান (রঃ) এর চৈতন্য ফিরে আসলে তিনি নিজেকে বস্ত্রহীন অবস্থায় দেখতে পান। বাবাজান কেবলা আলম (রঃ) নিজ ভ্রাতা মাওলানা ছৈয়দ গোলাম ছোবহান শাহ মাইজভান্ডারী (কঃ) কে বাবাজানি কেবলার (রঃ) ব্যবহৃত লুঙ্গি (যা সিলাই বিহীন) ছিল ও উনার গায়ের চাঁদর যা ছিল তা দেওয়ার জন্য নির্দেশ প্রদান করেন। হযরত হেদায়ত আলী শাহকে (প্রকাশ লক্ষীর বাপ) চন্দনাইশী বাবাজানের সামনে খাবার দিতে বলেন। বাবাজানির হুজরা শরীফে সবার সাথে বসে বাবাজানির (কঃ) সামনে চন্দনাইশী বাবাজান খাবার গ্রহণ করেন। চন্দনাইশী বাবাজান (রঃ) বাবাজানির দিকে অবাক দৃষ্টিতে তাকিয়ে থাকেন। বাবাজানি কেবলা (কঃ)ও চন্দনাইশী বাবাজানের চোখের দিকে দীর্ঘ সময় ধরে দৃষ্টি দিয়ে তাকিয়ে থাকেন। ওনাদের এরূপ দেখা দেখি বাবাজানির (কঃ) বড় ছেলে শাহজাদা হযরত ছৈয়দ মাওলানা খায়রুল বশর (কঃ) হযরত হেদায়ত আলী (রঃ) ও রহম আলী শাহ (রঃ) সহ উপস্থিত ভক্তবৃন্দ যারা সে সময় বাবাজানি (কঃ) হুজরা উপস্থিত ছিলেন, সকলে চন্দনাইশী বাবাজানের উপর বাবাজানি (কঃ) এর দৃষ্টি দান প্রত্যক্ষ করে বাবাজানি কেবলা (কঃ) এর দিকে তাকিয়ে থাকেন। কিন্তু কেউ কারো সাথে কথা বলেননি। দীর্ঘ সময় পর্যন্ত পরিস্থিতি স্থির থাকে। অনেকক্ষণ পর বাবাজানি (কঃ) চন্দনাইশী বাবাজান (রঃ) কে মাইজভান্ডারী তুরিকার রীতি অনুযায়ী বায়াতী কর্মকাণ্ড পরিচালনা করতে বলে নিজ বাড়িতে তথা চন্দনাইশে

চলে যাওয়ার নির্দেশ প্রদান করেন। চন্দনাইশী বাবাজান বাবাজানি কেবলা আলমের কদম পাকে তাজীম করে নিজ গ্রামে চলে আসার জন্য দাঁড়িয়ে যান এবং বাবাজানি (কঃ) এর কাছ থেকে বিদায় গ্রহণ করেন। এভাবে চন্দনাইশী বাবাজান বাবাজানি কেবলা আলমের কাছ থেকে খেলাফত লাভ করেন এবং মাইজভান্ডার দরবার শরীফ থেকে বিদায় গ্রহণ পূর্বক নিজ গ্রাম চন্দনাইশে চলে আসার জন্য রওনা দেন।

চন্দনাইশের উদ্দেশ্য রওনা হওয়ার সময় খেলাফত রক্ষার বিষয়ে পরীক্ষা

চন্দনাইশী বাবাজান (রঃ) যখন বাবাজানি কেবলা (কঃ) এর কাছ থেকে খেলাফত লাভ পূর্বক চন্দনাইশের উদ্দেশ্য রওনা দেন তখন বাবাজানি কেবলা কাবার (কঃ) বড় ভাই হযরত মাওলানা ছৈয়দ আবদুস ছোবহান শাহ মাইজভান্ডারী (কঃ) চন্দনাইশী বাবাজান (রঃ) কে তিনটি স্থানে পরীক্ষা নেন যে চন্দনাইশী বাবাজান বাবাজানি (কঃ) কেবলা কাবা কর্তৃক প্রদত্ত খেলাফত রক্ষা করতে পারবেন কিনা।

প্রথম স্তরঃ চন্দনাইশী বাবাজান (রঃ) যখন বাবাজানি কেবলা (কঃ) হুজরা শরীফ থেকে বের হয়ে গাউছুল আজম হযরত ছৈয়দ মাওলানা আহমদ উল্লাহ প্রকাশ হযরত কেবলা কাবার মাজার অতিক্রম করেন তখন বাবাজানির বড় ভাই আধ্যাত্মিক রহস্যপূর্ণ বিষয়ে প্রশ্ন করার জন্য ডাক দেন চন্দনাইশী বাবাজান ও খুবই সূচতরভাবে উক্ত রহস্যপূর্ণ বিষয়ের উত্তর প্রদান করেন এবং প্রথম স্তরের পরীক্ষায় চন্দনাইশী বাবাজান (কঃ) বেলায়তের আলোকে উত্তীর্ণ হন।

দ্বিতীয় স্তরঃ - প্রথম পরীক্ষায় পাশ করে দ্বিতীয় পর্যায়ের পরীক্ষায় অবতীর্ণ হন মাইজভান্ডার দরবার শরীফের জামে মসজিদ অতিক্রম করার পর সেখানেও চন্দনাইশী বাবাজান (রঃ)মাওলানা হৈয়দ আবদুস ছোবাহান শাহ মাইজভান্ডারী কর্তৃক পরীক্ষায় যা উচ্চ মার্গের ছিল তাতে সফলকাম হন।

তৃতীয় স্তরঃ ২য় পর্যায় সফলকাম হওয়ার পর ৩য় পর্যায় পরীক্ষার সম্মুখীন হন ফটিকছড়ি নাজির হাটে। সে পর্যায় চন্দনাইশী বাবাজান হযরত হৈয়দ গোলাম ছোবাহান শাহ মাইজভান্ডারীর (কঃ) নিকট নিজেকে এমন ভাবে আত্ম প্রকাশ করেন যে, অবশেষে তিনি বললেন, “মাওলানা সাহেব আপনি বাবা ভান্ডারী (কঃ) কর্তৃক প্রদত্ত খেলাফত রক্ষা করতে পারবেন।” এভাবে পরপর তিনটি পরীক্ষায় সফলকাম হয়ে সোজা নিজ গ্রাম চন্দনাইশে চলে আসেন এবং বাড়িতে বেশ কয়েকদিন বিশ্রাম নেন।

দরবার শরীফ প্রতিষ্ঠায় বাবাজান

চন্দনাইশী বাবাজান বাবা ভান্ডারী কেবলা (কঃ) থেকে খেলাফত লাভ করে নিজ বাড়িতে অবস্থানকালে প্রথম কয়েকদিন কারো সাথে মাইজভান্ডারী ত্বরিকা বিষয়ক কিছু প্রকাশ করেননি শুধু নিশ্চুপ ছিলেন। ওনার স্ত্রীও চন্দনাইশী বাবাজান (রঃ) এর কাছ থেকে কোন কিছু জানতে চাননি। কিন্তু বেলায়তের যে আলোতে চন্দনাইশী বাবাজান (রঃ) আলোকিত সে আলোর বিচ্ছুরন ঘটতে থাকে। স্বপ্নে অদিষ্ট হয়ে বিভিন্ন জায়গা থেকে বেশ কিছু মানুষ বাবাজানের সাথে দেখা করতে আসে এবং বায়াতের ইচ্ছাও পোষণ করেন। বাবাজান তাদের বায়াত গ্রহণ করান। পরবর্তী জুমাবার সময় তিনি সাতবাড়ীয়া বহরম পাড়া মসজিদের জুমা পড়ানোর উদ্দেশ্যে যান এবং ইমামতি শেষে উপস্থিত এলাকার মুসল্লিদের পরিষ্কার ভাবে জানিয়ে দেন যে, তিনি আর সামনে জুমা পড়ানোর জন্য আসবেন না এবং তাদের আরেকজন ইমাম রাখার ব্যাপারে বলেন। সকলের অনুরোধ শর্তেও তিনি শুধু “না” শব্দ বলেন। সকলে চন্দনাইশী বাবাজান (রঃ) এর কাছে আরজ করেন যে, তারা বাবাজানের সাথে

কোন ধরনের বেয়াদবি করেছেন কিনা? চন্দনাইশী বাবাজান তাদের সকলকে অভয় দান পূর্বক বলেন তিনি আর খতীবের দায়িত্ব পালন করতে চান না বরং তিনি স্বীয় বাড়িতে অবস্থান করবেন কোন এক শক্তির নির্দেশে। বাবাজান যে বাবা ভান্ডারী কেবলা কাবা (কঃ) এর হুকুমে চাকরী করতে চান না তা সকলের নিকট আপাতত গোপন রাখেন। সে এলাকার মুসল্লীগনের মধ্যে অনেকে চন্দনাইশী বাবাজানকে আগে থেকে পীরের মতো মান্য করতেন। যাইহোক চন্দনাইশী বাবাজানকে তারা আপ্যায়নের জন্য চেষ্টা করেন। বাবাজান তখন প্রিয় একজন মুসল্লীর ঘরে আহার পর্ব সেরে নিজ এলাকায় তথা গ্রামের দিকে অগ্রসর হন। পথিমধ্যে স্বীয় পীরভাই হযরত হৈয়দ হাফেজ মাওলানা ফজলুর রহমান শাহ হাফেজ নগরী মাইজভান্ডারী (রঃ)এর দরবারের পাশ দিয়ে অতিক্রম করার সময় তাঁর সাথে দেখা করার মনস্থির করে উক্ত দরবারে প্রবেশ করেন। হাফেজ শাহ মাইজভান্ডারী (রঃ) স্বীয় আসনে বসা অবস্থায় ভক্তদের উদ্দেশ্যে বলেন, জোয়ারার মাওলানা সাহেব আসছেন আপ্যায়নের ব্যবস্থা করতে হবে। হাফেজ শাহ কেবলার ভক্তগণ হুজরা শরীফ থেকে বের হয়ে দেখলেন যে, ঠিকই চন্দনাইশী বাবাজান (রঃ) হাফেজ নগর দরবার শরীফের দিকে আসছেন। তাই তারা তাদের পীরের নির্দেশ মোতাবেক আহারের আয়োজন করতে থাকে। কিন্তু তারা চন্দনাইশী বাবাজান কে নীরব প্রকৃতির স্বভাবের অবস্থায় দেখতে পান। অন্যন্য সময়ের মতো মাইজভান্ডারী তরিকার বিরোধিতার স্বভাবে দেখতে পান না। যাইহোক চন্দনাইশী বাবাজান হাফেজ শাহ মাইজভান্ডারী সাথে হুজুরার আসনে বসে সৌহাদ্দপূর্ণ আলাপে লিপ্ত থাকেন। অবশেষে খাওয়া দাওয়া শেষে চন্দনাইশী বাবাজান নিজ গ্রামের উদ্দেশ্যে রওনা হন। চন্দনাইশী বাবাজান (রঃ) উক্ত হাফেজ নগর দরবার শরীফ থেকে প্রস্থানের পর উক্ত দরবারের কয়েকজন ভক্ত তাদের পীর সাহেবকে জিজ্ঞাসা করেন যে, চন্দনাইশী বাবাজানকে তাদের অন্য রকম মনে হলো কেন? হাফেজ শাহ কেবলা (রঃ) মুচকি হেসে বলেন, চন্দনাইশের মাওলানা সাহেবের মাধ্যমে চন্দনাইশে বাবা ভান্ডারী কেবলার (কঃ) আরেকটি

ষ্টেশনের সূচনা হলো, এবং তিনি ওনার সকল আশেকবৃন্দকে চন্দনাইশী মাওলানাকে মান্য করার নির্দেশ প্রদান করেন। তিনি বলেন যে, চন্দনাইশী মাওলানা এখন আর মাওলানা সাহেব নাই। তিনি এখন তাঁর পীর ভাই ও বাবাভান্ডারী উচ্চ মাপের খলিফা নির্বাচিত হয়েছেন। যাইহোক, চন্দনাইশী বাবাজান নিজ বাড়িতে এসে অবস্থান করতে থাকেন। প্রতিদিন বিভিন্ন অঞ্চল থেকে কোনো না কোনো পীর অশ্বেষী মানুষ চন্দনাইশী বাবাজান কেবলা (কঃ) এর সাক্ষাত লাভ ও বায়াত গ্রহণের ইচ্ছায় আসতে থাকে। চন্দনাইশী বাবাজান (রঃ) ও তাদেরকে বায়াত করাতে থাকেন। তিনি নিজ মুর্শিদ গাউছুল আজম হযরত ছৈয়দ মাওলানা গোলামুর রহমান প্রকাশ বাবা ভান্ডারী মাইজভান্ডারী (কঃ) কাছে প্রায় সময় আসা যাওয়া করতে থাকেন। দীর্ঘ আট-দশ বছর এভাবে বাবাভান্ডারী মাইজভান্ডারী (কঃ) এর ছোহবতে আসা যাওয়ার পদ্ধতিতে চন্দনাইশ দরবার শরীফ প্রতিষ্ঠিত হয়। উল্লেখ্য যে, চন্দনাইশী বাবাজান বাবাভান্ডারীর নিকট হতে বায়াত গ্রহণ ও খেলাফত লাভ করেছিলেন বাবাভান্ডারীর নিকট তাঁর দ্বিতীয় বার গমনের পর। যা বাবাভান্ডারী কেবলাকাবা মাইজভান্ডারীর (কঃ) ইন্তেকালের প্রায় ৮-১০ বছর পূর্বের ঘটনা। প্রথম বার যে তিনি মাইজভান্ডারী দরবার শরীফ বাবাভান্ডারী কেবলার ছোহবতে গিয়েছিলেন তা ছিল তাঁর ছাত্র জীবনকালীন ঘটনা। প্রথম বার যাত্রায় চন্দনাইশী বাবাজানের একমাত্র উদ্দেশ্য ছিল প্রকৃত আল্লাহর অলির নৈকট্য লাভ পূর্বক ইলম জগতে উন্নতি সাধন করা।

বাবাভান্ডারীর জাহেরী হুকুমে বাবাজান চন্দনাইশীর (কঃ)

সন্ধিপ গমন

চন্দনাইশী বাবাজান কেবলা নিজ দরবারে তরিকায় মাইজভান্ডারী প্রচার ও প্রসার করতে থাকলে ও তিনি প্রত্যেক মাসের মধ্যে মাইজভান্ডার শরীফ নিজ

মুর্শিদ বাবাভান্ডারী কেবলা মাইজভান্ডারী ছোহবতে গমন করতেন। একদিন বাবা ভান্ডারী এর সাথে ছোহবতে গেলে হুজরা শরীফ ঢুকতে না ঢুকতে বাবা ভান্ডারী কেবলা কাবা (কঃ) চন্দনাইশী বাবাজানকে জটিল কিছু বিষয়ে সমাধানের জন্য তরিকা প্রচারকল্পে সন্ধিপে যাওয়ার জন্য হুকুম প্রদান করেন। চন্দনাইশী বাবাজান আর কোন বাক্য আলাপ না করে বাবাভান্ডারী (কঃ) কে তাজিম পূর্বক হুজরা শরীফ থেকে বের হয়ে সোজা নিজ বাড়ি তথা চন্দনাইশ দরবার শরীফ চলে আসেন। নিজের কিছু ভক্ত মুরিদগণকে নিজ দরবারে অবস্থান করতে নির্দেশ দেন এবং বাবাভান্ডারী কেবলার (কঃ) এর হুকুমে সন্ধিপে যাওয়ার কথা ব্যক্ত করেন। ওনার কিছু ভক্ত মুরিদ চন্দনাইশী বাবাজানের সাথে সন্ধিপে যাওয়ার কথা বললেও তিনি কাউকে সাথে না নিয়ে কোন রকম দেরি না করে সন্ধিপের উদ্দেশ্যে রওনা দেন। বেশ কয়েকদিন পর চন্দনাইশী বাবাজান সন্ধিপে পদার্পন করলে উৎসুক অনেক লোক বাবাজানকে সাদরে গ্রহণ করেন। মনে হলো যেন তারা চন্দনাইশী বাবাজানকে আগে থেকে চিনত। বাবাজান সেখানে বেশ কিছুদিন অবস্থান পূর্বক তরিকায় মাইজভান্ডারী সম্পর্কে জ্ঞান দান করেন। অনেক লোক বাবাজানের হাতে বায়াত গ্রহণ করেন। সে সময় বাবাজানের কাছ থেকে বিশেষ বিশেষ ক্ষেত্রে কারামত প্রকাশিত হতে দেখা যায়। যা সেখানকার লোকজনই বর্ণনা করেন। মাইজভান্ডারী তরিকার বিরুদ্ধে বাকীরা এমন কিছু জটিল বিষয় নিয়ে বাবাজানকে প্রশ্ন করে আটকাতে চাইলে বাবাজান তার অলৌকিক শক্তির ও তাছাউফের এলেমের মাধ্যমে জটিল বিষয়ের সমাধান প্রদান করেন। এভাবে চন্দনাইশী বাবাজান সন্ধিপে কয়েক সপ্তাহ কাটিয়ে চলে আসতে চাইলে আশেক ভক্তগণ বাবাজানের কদমে পড়ে কান্না করতে থাকেন। কিন্তু বাবাজান তাদের স্বাভাবিক প্রদান পূর্বক তাদের বাবাজানকে স্মরণের নির্দেশ প্রদান করেন এবং তরিকা অনুসারে জীবন পরিচালনা করতে বললেন যাতে পবিত্র আত্মার অধিকারী হওয়া যায়। তারপর চন্দনাইশী বাবাজান সন্ধিপ ত্যাগ করে মাইজভান্ডার শরীফে বাবাভান্ডারী (কঃ) এর ছোহবতে আসার উদ্দেশ্যে রওনা

দেন। কয়েক দিন পর মাইজভান্ডার শরীফে এসে বাবাভান্ডারী সামনে তাজীম করার সাথে সাথে বাবাভান্ডারী কেবলা (কঃ) উনাকে আকিয়াব শহরে যাওয়ার নির্দেশ প্রদান করেন। চন্দনাইশী বাবাজান পীরের নির্দেশ মোতাবেক পুনরায় চন্দনাইশ নিজ দরবারে এসে কয়েকদিন অবস্থান পূর্বক বার্মার উদ্দেশ্যে রওনার প্রস্তুতি গ্রহণ করেন।

বাবাভান্ডারী কেবলার নির্দেশে বার্মায় গমন

সন্ধিপ সফর শেষে চন্দনাইশী বাবাজান (কঃ) নিজ পীরের নির্দেশ মোতাবেক বার্মায় সফরের উদ্দেশ্যে প্রস্তুতি গ্রহণ শুরু করেন। প্রস্তুতি গ্রহণকালে নিজ দরবারের ভক্ত আশেকগণকে বাবাজানের জাহেরী অনুপস্থিতিতে স্বীয় হুজুরা শরীফে ছেমা মাহফিল চালু রাখতে বলেন। এবারও বার্মায় সফরে তিনি নিজ ভক্তদের কাউকে সঙ্গী করলেন না। অনেকে বাবাজানের সাথে যাওয়ার ইচ্ছা পোষণ করলেও তিনি সবাইকে স্বীয় দরবারে আসা যাওয়ার ও ত্বরিকতের জিকির আজকার চালিয়ে যেতে বলেন। অবশেষে চন্দনাইশী বাবাজান বার্মার উদ্দেশ্যে রওনা হয়ে সেখানে পৌঁছেন। বার্মার আকিয়াব শহরে গেলে সেখানকার বেশ তরিকত পিপাসু মানুষ বাবাজানের শরণাপন্ন হয়। বাবাজান তাদেরকে তরিকতের বিভিন্ন বিষয় নিয়ে জ্ঞান দান করতে থাকেন। অনেক লোক চন্দনাইশী বাবাজানের কারামত দর্শন পূর্বক বায়াত গ্রহণ করেন। বাবাজান সেখানে অনেক মাস অবস্থান করেন এবং ভক্তদেরকে নিয়ে মাইজভান্ডারী তরিকা অনুসারে ছেমা মাহফিল করতে থাকেন। ভক্তদের শত অনুরোধে সত্ত্বেও চন্দনাইশী বাবাজান নিজ দেশের নিজ গ্রামে চলে আসার জন্য তৈরী হতে থাকেন এবং সেখানকার ভক্তদের হায়াতী জিন্দেগীতে মাইজভান্ডারী তরিকা অনুশীলন করতে নির্দেশ দেন। তিনি শেষ পর্যন্ত চন্দনাইশ দরবার শরীফে ফিরে আসেন।

বাবাভান্ডারী কেবলা কাবার ভিন্ন রকম নির্দেশ পালন

বার্মা থেকে ফেরার পর চন্দনাইশী বাবাজান মাইজভান্ডারী তরিকার প্রচার-প্রসার কর্মকাণ্ডে ব্যস্ত হয়ে পড়েন। প্রতিদিন দূর দূরান্ত থেকে হাজত-মকসুদ পূরণার্থে বিভিন্ন জায়গা থেকে লোকজন আসতে থাকে চন্দনাইশী বাবাজান নিজ ভক্ত আশেকদের সময় দিতে থাকেন। দিন দিন চন্দনাইশ দরবার শরীফের ব্যাপকতা বৃদ্ধি পেতে থাকে। এদিকে বাবা ভান্ডারী কেবলা কাবার (কঃ) আরেক নির্দেশ চন্দনাইশী বাবাজানের উপর জারি হয়। নির্দেশ ছিল চন্দনাইশী বাবাজান তিন বছর একাধারে প্রতিদিন রাতে বাবা ভান্ডারী কেবলা কাবার (কঃ) সামনে হাজির হওয়া এবং হাজির হয়ে কোন কিছুর আহার ব্যতীত পুনরায় চন্দনাইশে নিজ দরবারে ফিরে আসা এবং দিনের বেলায় স্বীয় আশেক ভক্তদের সময় প্রদান করা। চন্দনাইশী বাবাজান দমার পাত্র ছিলেন না। তিনি বাবা ভান্ডারী কেবলা কাবার (কঃ) নির্দেশ মোতাবেক একাধারে তিন বছর এরূপ হুকুম পালন করতে থাকেন। এরূপ হুকুম পালন করার সময় চন্দনাইশী বাবাজানের (কঃ) বহু কারামত প্রকাশিত হয় যা মাইজভান্ডারী তরিকার অনেক লোকদের বর্ণনায় পাওয়া যায়।

বাবাভান্ডারী কেবলা কাবা নির্দেশিত জাহেরী হুকুমে চন্দনাইশ দরবার শরীফে ওরশ উদযাপন

৩ বছরব্যাপী রাত্রিকালে মাইজভান্ডার দরবার শরীফে বাবাভান্ডারীর নিকট হাজিরা প্রদানের অধ্যায় শেষ হলে বাবাভান্ডারী কেবলা কাবা (কঃ) চন্দনাইশী বাবাজানকে স্বীয় দরবার শরীফে মাঘের ২২ তারিখে বিশাল পরিসরে নিজ ভক্তদের নিয়ে ওরশ শরীফ উদযাপনের জন্য ইশারায় নির্দেশ দেন। যদিও এর

আগে চন্দনাইশী বাবাজান ওরশ মাহফিলের আয়োজন করত ছোট পরিসরে । যাই হোক হুকুম মোতাবেক ১৯৩৫ সালে চন্দনাইশী বাবাজানের ভক্ত মুরিদগণ বিশাল আয়োজনের মাধ্যমে মাঘের ২২ তারিখে ওরশ শরীফ উদযাপন করেন যা চন্দনাইশী বাবাজানের হায়াতী জিন্দেগীর ১৯৮২ সাল পর্যন্ত উক্ত মাঘের ২২ তারিখ ওরশ শরীফ অনুষ্ঠিত হতে থাকে । পরবর্তীতে ১৯৮২ সালের পর থেকে বিশাল আকারের উক্ত ওরশ শরীফ চন্দনাইশী বাবাজানের ওফাতের তারিখে অর্থাৎ ১৬ই ফাল্গুনে অনুষ্ঠিত হতে থাকে যা বর্তমান সময় ও চলমান । উক্ত ওরশ শরীফে দরবারে ভক্ত আশেকগণ উপস্থিত হয়ে মহা সমারোহ অনুষ্ঠান সম্পন্ন করার মধ্য দিয়ে বাবাজানের কলবী ফয়েজী হাসিল করে থাকেন । ২২মাঘ থেকে ১৬ ফাল্গুন ওরশ শরীফের তারিখ পরিবর্তন ছিল চন্দনাইশী বাবাজানের আধ্যাত্মিক হুকুম যা চন্দনাইশী বাবাজানের আওলাদগণ ভক্ত অনুসারীদের নিয়ে সম্পাদন করে থাকেন । এছাড়াও ২২শে আশ্বিন চন্দনাইশী বাবাজানের (ক:) খোশ শরীফ সম্পাদিত হয় যা ছিল বাবাজান চন্দনাইশীর (ক:) আধ্যাত্মিক ইশারা । দরবারের আওলাদ ও আশেকবন্দ বাবাজান চন্দনাইশী কর্তৃক প্রবর্তিত ২২ মাঘ তথা গাউছুল আজম মাইজভান্ডারীর (ক:) ওরশ, ১লা চৈত্র তথা স্বীয় মুর্শিদ গাউছুল আজম বাবা ভান্ডারী কেবলার (ক:) ওরশ শরীফ স্বল্প পরিসরে সম্পাদন করেন । উক্ত দরবার শরীফে ১২ই রবিউল আওয়াল ১১রবিউস সানী ৬ই রজব যা চন্দনাইশী বাবাজানের জাহেরী জীবদ্দশায় ওরশ পালন করা হতো তার ধারাবাহিকতা এখনো রক্ষা করা হয় ।

কারামত অধ্যায়

আল্লাহর আউলিয়াগণ হতে আল্লাহ প্রদত্ত বেলায়তি শক্তির মাধ্যমে যে অস্বাভাবিক ঘটনাবলী প্রকাশিত হয় তা কারামাত । কোরআন হাদীছ গবেষণার মাধ্যমে কারামাতের সত্যতা অনুধাবন করা যায় । কারামাত হচ্ছে আধ্যাত্মিক ও সূক্ষ্ম বিষয় । যদিও বা কারামাত তথাকথিত মৌলভীগন যারা বদ আকীদা সম্পন্ন , অস্বীকার করে, কিন্তু আহলে সুন্নাত ওয়াল জামাত যারা কোরান হাদীছের ইবারাত ও তাফছিরের মাধ্যমে ছাবেত করেছেন যে (আরবি) অর্থাৎ আল্লাহর অলিগণের কারামাত হক । এ প্রসঙ্গে আল্লাহর কোরানের বাণী (আরবি) অর্থাৎ ইজ্জত আল্লাহ,তাহার রাসূল (স:) ও মোমেনীন তথা আউলিয়াগণের জন্য বরাদ্দ । কিন্তু মুনাফেকগণ তা অনুধাবন করে না । উল্লেখিত আয়াত দ্বারা যে ভাবে আল্লাহর কুদরত, রাসূল (স:) এর মোজিয়া বুঝা যায় তেমনিভাবে আউলিয়াগণের কারামাত তথা সম্মান সহজে অনুধাবন করা যায় । অপরদিকে হাদীছে কুদসীতে আল্লাহ বলেন, (আরবি) অর্থাৎ আমার আউলিয়াগণ আমার চাদরের নীচে যাদেরকে আমি আল্লাহ ছাড়া আর কেহ চিনতে বা বুঝতে পারে না । অতএব আউলিয়াগণের কারামাত যে সত্য তা বিরুদ্ধবাদীরা যতই অস্বীকার করুক না কেন মিথ্যা প্রতিপন্ন হতে পারে না । এছাড়া যুগে যুগে আউলিয়াগণ এ পৃথিবীতে জন্মগ্রহণ করেছেন ইসলাম প্রচার ও প্রসার কল্পে । ধর্ম ও তরিকত প্রচার ও প্রসার করতে গিয়ে বিভিন্ন প্রতিকূলতার শিকার হয়েছেন । কিন্তু আল্লাহর পক্ষ থেকে তাঁদের দ্বারা কারামাত সংঘটিত হওয়াতে প্রতিকূল পরিবেশকে অনুকূল পরিবেশে সুসজ্জিত করেছেন । তাছাড়া ইসলাম প্রচার ও প্রসার দ্রুততার সাথে সংঘটিত হয়েছে ।

যেমন : বড়পীর আব্দুল কাদের জিলানী গিলানী শায়য়ান লিল্লাহর হাজারো কারামাত প্রদর্শনের কারনে আধ্যাত্মিক বাদী আল্লাহ ওয়ালাদের পরিবেশ সৃষ্টি হয়েছে। খাজা মঈন উদ্দীন হাছান ছনজরী (র:) ভারত মহাদেশে ইসলাম প্রচার করেছেন কোন দেহ শক্তির মাধ্যমে নয় আল্লাহ প্রদত্ত বেলায়তী ক্ষমতার বদৌলতে। হযরত শাহ জালাল শাহ (র:) বঙ্গদেশে হিন্দুদের মুসলমান বানিয়েছেন অলৌকিক শক্তির মাধ্যমে। হযরত গৌছুল আজম মাইজভান্ডারী (ক.) প্রকাশ হযরত কেবলার কারামাতের কাছে তৎকালীন মহান জলিলুল কদর ওলামাগণ নতি স্বীকার করতে বাধ্য হয়েছেন এবং খলিফা নিযুক্ত হয়ে বিভিন্ন জায়গায় দরবার শরীফ প্রতিষ্ঠা করেছেন। গৌছুল আজম সৈয়দ গোলামুর রহমান বাবাজান মাইজভান্ডারী (ক.) এর কারামাত জন্মলগ্ন থেকে শুরু হয়। জীবনের শেষ পর্যন্ত আল্লাহর পক্ষ থেকে বাবাজান কেবলার মাধ্যমে এমন সব কারামাত প্রকাশিত হয় যে, তার হায়াতে জীন্দেগীর সময়ে তরীকায় মাইজভান্ডারী সর্বদিকে ব্যাপকভাবে ছড়িয়ে পড়ে এবং মাইজভান্ডারী তরিকা পরিপূর্ণভাবে প্রতিষ্ঠা লাভ করে। বাবাজান কেবলাও হযরত কেবলা কাবার খলিফাগণ যারা উক্ত আল্লাহর অলিহয়ের নিকট গিয়ে আল্লাহর আউলিয়া কেরামে পরিণত হয়েছেন এবং তাদের মাধ্যমেও অবিশ্বাস্যও অকল্পনীয় কারামাত সংঘটিত হয়। এসব খলিফাদের মধ্যে গৌছে জামান হযরত হৈয়দ মাওলানা আব্দুল লতিফ শাহ চন্দনাইশী মাইজভান্ডারী (ক.) অন্যতম যার হায়াতে জীন্দেগীতে ও ইন্তিকালের পরে আল্লাহ প্রদত্ত বেলায়তের কারণে অসংখ্য কারামাত সংঘটিত হয়। আমি (লেখক) তার ইন্তিকাল পূর্ববর্তী ও ইন্তিকাল পরবর্তী কিছু সংখ্যক কারামাত বর্ণনা করছি যা জেনে ও বুঝে তরিকত অনুসারীগণ তরীকায় মাইজভান্ডারীর সার নির্জাস

লাভে সচেষ্ট হবেন এবং আত্মার পবিত্রতা লাভে সক্ষম হয়ে আল্লাহর পথের পথিক হবেন।

১.জন্ম গ্রহণের আগেই নামকরণ:

তৎকালীন পাকিস্তান আমলে একদিন চন্দনাইশী বাবাজান কেবলা আলম মাইজভান্ডার শরীফ থেকে রাত্রি বেলায় আসতেছিলেন। আসার পথে দেখতে পান চন্দনাইশ পৌরসভাস্থ কমর আলী সিকদার বাড়ীর জামে মসজিদের কবরস্থানে এক ব্যক্তি কবরের পাশে বসে বসে কান্না করতেছেন। তখন চন্দনাইশী বাবাজান উনার পাশে দিয়ে স্বীয় দরবারে যাচ্ছিলেন ঐ সময় কান্নারত ব্যক্তিকে জিজ্ঞেস করলেন, “বদি আলম তুমি কান্না করতেছ কেন?” উত্তরে বদি আলম বললেন, “আমার স্ত্রীর সন্তান প্রসব হওয়ার পর পরই সন্তান গুলো মারা যায়।” তখন চন্দনাইশী বাবাজান বদি আলমকে বলল, “আমার সাথে আসো।” চন্দনাইশী বাবাজান বদি আলম কে সাথে করে নিয়ে নিজ দরবারে আসেন এবং বসতে বললেন। ইতি মধ্যে চন্দনাইশী বাবাজান একজন খাদেম কে বললেন, “আমাকে খাবার দাও।” খাদেম বাবাজানকে খাবার দিলেন। ওখান থেকে বাবাজান অল্প আহার শেষ করে বাকি আহার গুলো বদি আলমকে খেতে দেন। বদি আলম বাবাজান প্রদত্ত উক্ত তবারোক আহার করলেন। বাবাজান তখন বদি আলমকে বললেন, “তোমার স্ত্রীর একটি ছেলে সন্তান হবে। তার নাম বখতিয়ার মিয়া রাখবে।” ঠিক এক বছর পর বদি আলমের স্ত্রীর কোলজোড়ে একটি ছেলে সন্তান আসে। বদি আলম এরপর বাবাজানের প্রতি বিনয়ী, শ্রদ্ধাশীল এবং আশেক ভক্তে পরিণত হয়ে পড়েন। বখতিয়ার মিয়া বড় হওয়ার পর তার বাবা তাকে বারংবার চন্দনাইশী বাবাজানের উক্ত কারামাত স্বরণ করিয়ে দিতেন এবং তাকে চন্দনাইশ দরবার শরীফে আসা যাওয়া করতে বলতেন। বখতিয়ার মিয়াও নিজ পিতার সেই

নির্দেশ অক্ষরে অক্ষরে পালন করতেন এবং চন্দনাইশ দরবার শরীফের আশেক ভক্তে পরিনত হয়ে পড়েন।

বর্ণনাকারী : বখতিয়ার মিয়া।

ঠিকানা : কমর আলী শিকদার বাড়ী, ৭নং ওয়ার্ড, চন্দনাইশ পৌরসভা, চন্দনাইশ, চট্টগ্রাম।

২.এসএসসি পরীক্ষায় ফেল

সাতকানিয়া কালিয়াইশ ইউনিয়ন নিবাসী জনাব ওসমান গণি মাস্টার যখন এসএসসি পরীক্ষা দিচ্ছিলেন ঐ সময় ওসমান গণি মাস্টার দোয়ার জন্য চন্দনাইশী বাবাজানের কাছে আসেন। উত্তরে চন্দনাইশী বাবাজান বললেন, “এই এসএসসি পরীক্ষাতে তুমি পাস করবে না।” এ কথা শোনার পর ওসমান গণি মাস্টার মন খারাপ করে দরবার থেকে চলে যান। ওসমান গণি মাস্টার বাবাজানের কথা বিশ্বাস করতে না পেরে দোয়ার জন্য আরো অনেক দরবারে যান। কিন্তু দেখা গেল চন্দনাইশী বাবাজানের বাণী অনুযায়ী ওসমান গণি মাস্টার ঐ এসএসসি পরীক্ষায় ফেল করেন। ঐ ঘটনা পর থেকে ওসমান গণি মাস্টার চন্দনাইশী বাবাজানকে বিশ্বাস করতে শুরু করেন। এবং আজীবন চন্দনাইশী বাবাজানের স্বরণে থাকেন। তিনি বাবাজানের উক্ত কারামাত দরবারের আওলাদ ও অন্যান্য মাইজভান্ডারী ভক্তদের প্রায় সময় বলতেন।

বর্ণনাকারীঃ- ওসমান গণি মাস্টার বি এ বি এড, কালিয়াইশ ইউনিয়নের চেয়ারম্যান সাব্বির আহমদ ওসমানীর পিতা।

গ্রামঃ- কালিয়াইশ ইউনিয়ন, সাতকানিয়া, চট্টগ্রাম

৩.স্বপ্নযোগে হজ্জ পালন

ফতেহ মুহাম্মদ চৌধুরীর বাড়ি জনাব আবদুর রহমান চন্দনাইশী বাবাজানের পরম ভক্ত ছিলেন। উনি সবসময় দরবারে আসতেন। উনার দরবারে আসা

যাওয়া করাটা কিছু ত্বরিকা বিরোধী মানুষের ভালো লাগতো না। একদিন ত্বরিকা বিরোধী মানুষগুলো আবদুর রহমানকে হেয় করে বললেন, “তুমি হজ্জ করতেছনা কেন?” তখন মাগরিবের সময় ছিল, ঐ কথা শুনার পর আবদুর রহমান চন্দনাইশী বাবাজানকে গিয়ে ত্বরিকা বিরোধী মানুষগুলোর কথা খুলে বললেন। কথাগুলো শুনার পর চন্দনাইশী বাবাজান আবদুর রহমানকে বললেন, “তোমার হজ্জ আজ রাতেই হয়ে যাবে।” এ কথা শুনার পর আবদুর রহমান দরবার থেকে বাড়িতে ফিরে যান। আবদুর রহমান রাতে খাওয়া দাওয়া শেষ করে নিদ্রায় যান। যখন তিনি গভীর নিদ্রায় মগ্ন, তখন তিনি স্বপ্নে দেখতে পান যে, মক্কা শরীফ তাওয়াফ করতেছেন এবং এর পর মদিনা শরীফে মহানবী হযরত মুহাম্মদ (সঃ) এর রওজা মোবারক জেয়ারত করতেছেন। ছাঁপা ও মারুয়া পাহাড়ে সায়ী করতেছেন। এরপর মিনাতে শয়তানকে পাথর নিক্ষেপ করেছেন। এ দৃশ্য দেখার পর হঠাৎ আবদুর রহমানের নিদ্রা ভেঙ্গে যায়। পরদিন সকালে আবদুর রহমান চন্দনাইশী বাবাজানের কাছে আসেন। চন্দনাইশী বাবাজান আবদুর রহমানকে দেখেই বলে উঠলেন, “আবদুর রহমান তুমি কি হজ্জ করেছ।” এ কথা শুনার পর চন্দনাইশী বাবাজানের প্রতি আবদুর রহমানের ভক্তি আরো প্রবল হয়।

বর্ণনাকারী : -আবদুর রহমান, ০৭নং ওয়ার্ড, চন্দনাইশ পৌরসভা, চন্দনাইশ, চট্টগ্রাম।

৪.কলেরামুক্ত এলাকা

ধোপাছড়ি নিবাসী জনাব মনিরুজ্জামান, চন্দনাইশী বাবাজান কেবলা এর ছোট ছেলে এবং অন্যান্যদের বর্ণনা করেন যে, ভক্তরা যদি দরবারে আসেন তাহলে বাবাজানের হুকুম ব্যতীত দরবার হতে বের হতে পারতেন না। তৎকালীন পাকিস্তান আমলে জনাব মনিরুজ্জামান দরবার শরীফে থাকতেন। ঐ সময় চন্দনাইশ সহ পার্শ্ববর্তী এলাকায় (আনোয়ারা) কলেরা মহামারী প্রবল বেগে

ছড়িয়ে পড়ে। অনেক মানুষ মৃত্যুমুখী হয়ে পড়ে। মনিরুজ্জামান বলেন, আনোয়ারা থানার অধীন খাসখামা গ্রামে মহামারী নামক মৃত্যুর প্রকোপ এত বৃদ্ধি পেতে থাকে যে, প্রতিদিনই দুই-এক জন মানুষ মৃত্যুমুখী হয়ে পড়ে। ঐ অবস্থা থেকে মুক্তির আশায় খাসখামা গ্রামের মানুষ চন্দনাইশী বাবাজান কেবলার স্মরণাপন্ন হয় এবং বাবাজানকে তাদের গ্রামে যাওয়ার জন্য অনুরোধ করেন। বাবাজান তাদের করুণ অবস্থা দেখে তাদের বলেন, “তোমরা গ্রামে ফিরে যাও, আমি রাতে তোমাদের এলাকায় যাব।” এই আশ্বাস পেয়ে তারা চলে যায় যা জনাব মনিরুজ্জামান প্রত্যক্ষ করেন। জনাব মনিরুজ্জামানও বাবাজানকে খাসখামা গ্রামে যাওয়ার জন্য অনুরোধ করেন। বাবাজান মনিরুজ্জামানকে নিয়ে যাবে বলে আশ্বাস দেন। ইতোমধ্যে রাত্রি ঘনিয়ে আসলে মনিরুজ্জামান বাবাজানকে খাসখামা গ্রামে যাওয়ার কথা আবার স্মরণ করিয়ে দেন। বাবাজান তাকে হুজুরা শরীফের সামনে দায়রা শরীফে বিশ্রাম করতে বলেন। তারপর বাবাজান হুজুরা শরীফে প্রবেশ করে দরজা বন্ধ করেন দেন। মনিরুজ্জামান সাহেব সারারাত অপেক্ষা করতে থাকেন কখন বাবাজান খাসখামা গ্রামে যাওয়ার জন্য হুজুরা শরীফ থেকে বের হবেন? রাত পেরিয়ে ভোর হয়ে আসলে বাবাজান হুজুরা শরীফের দরজা খুলে বেরিয়ে আসেন। মনিরুজ্জামান বাবাজানের জালালিয়ত চেহারার দিকে তাকিয়ে কোনো কিছু আর বলতে পারেন না। পরের দিনই খাসখামা গ্রামের সেই মানুষগুলো আবারও দরবারে আসেন। মনিরুজ্জামান তাদের সাথে বাবাজানের করা ওয়াদার জন্য অস্তির হয়ে পড়েন। কিন্তু তিনি দেখলেন তারা এসেই প্রথমে বাবাজানের কদম চুম্বন করেন। এবং বাবাজানের নিকট শোকরানা জ্ঞাপন করেন। তারা বাবাজানকে বললেন, বাবাজান কথামতো তাদের গ্রামে যাওয়াতে গ্রামের মৃত্যুর প্রকোপ কমে এসেছে। তবে বাবাজান খাসখামা গ্রামের কারো বাড়িতে প্রবেশ না করায় এবং কোনো আপ্যায়ন গ্রহণ না করায় তাদের মন খারাপ হয়েছে, পরে তাদের গ্রামে শান্তি ফিরে আসায় তারা বাবাজানকে নজরানা আদায় করে বিদায় নিয়ে ফিরে যান। এদিকে

মনিরুজ্জামান অবাক হয়ে চিন্তা করেন যে বাবাজান তো সারা রাত হুজুরা শরীফে ছিলেন। তাহলে তিনি খাসখামা গ্রামে কখন গেলেন আবার কখনই বা ফিরে আসলেন। পরে মনিরুজ্জামান বুঝতে পারেন যে আল্লাহ প্রদত্ত বেলায়তি ক্ষমতার অধিকারী বাবাজান একই সাথে খাসখামা গ্রাম এবং হুজুরা শরীফে অবস্থান করে ছিলেন। এর পর মনিরুজ্জামান আরো প্রবল ভাবে বাবাজানের প্রতি আকৃষ্ট হয়ে পড়েন এবং পরবর্তীতে নিজেকে আরো উত্তম রূপে বাবাজানের খেদমতে নিয়োগ করেন।

বর্ণনাকারী : মনিরুজ্জামান, ধোপাছড়ি ইউনিয়ন, চন্দনাইশ।

৫. ঘূর্ণিঝড় থেকে রক্ষা

মিজির দোকান নিবাসী জনাব কোরবান আলী একটা গাছের দোকানে কাজ করতেন। তখন নাফ নদী দিয়ে গাছ পারাপার করতেন। তেমনি একদিন তিনি সহ আরো কয়েকজন মিলে নাফ নদী দিয়ে নৌকা করে গাছ নিয়ে আসছিলেন। হঠাৎ সমুদ্রে প্রবল ঘূর্ণিঝড়ের সৃষ্টি হওয়ায় নাফ নদীতে পানির চাপ বেড়ে যায় এবং পানিতে প্রবল ঘূর্ণির সৃষ্টি হয়। যার ফলে নৌকাসহ কোরবান আলী ও অন্যরা সবাই প্রবল পানির নিম্নচাপে ডুবে যায়। পানির প্রবল চাপে কোরবান আলী আধমরা হয়ে পড়েন, সঙ্গীরা কে কোথায় ভেসে গেছে তার কোনো হদিস পায় না কোরবান আলী। কোরবান আলী এমন বিপদ সংকট মুহূর্তে বাবাজানকে স্মরণ করেন। তখন বাবাজান সেখানে উপস্থিত হন এবং কোরবান আলীকে একটা গাছ দেখিয়ে আদেশ করেন, “তুমি ঐ গাছে উঠে পড়ো।” কোরবান আলী অনেক কষ্টে ঐ গাছের উপর শুয়ে পড়েন এবং জ্ঞান হারিয়ে ফেলেন। গাছটি পানির স্রোতে নাফ নদীর তীরে ভেসে আসলে কোরবান আলীর জ্ঞান ফিরে আসে। তখন কোরবান আলীর শরীরে কোনো

কাপড় ছিলো না। তৎকালীন নাফ নদীর তীরবর্তী অঞ্চলের কিছু উপজাতি মানুষ কোরবান আলীকে উদ্ধার করে সুস্থ করে তোলেন এবং তাকে তার বাসায় ফেরার ব্যবস্থা করে দেন। এই ঘটনার পর কোরবান আলী চন্দনাইশী বাবাজানের প্রতি আরো বিনয়ী হয়ে উঠেন।

বর্ণনাকারী : ফজল করিম পিতা কোরবান আলী

গ্রাম : মধ্যম চন্দনাইশ মিঞ্জির দোকান, ৭নং ওয়ার্ড, চন্দনাইশ, চট্টগ্রাম।

৬.বি.এ.বি.টি পাস ঘোষণা

১৯৫৪ সালে সাতকানিয়া উপজেলার কালিয়াইশ নিবাসী জনাব ওসমান গনি মাষ্টার বি.এ পরীক্ষা দিয়ে চট্টগ্রাম থেকে বাড়িতে যাওয়ার পর মারাত্মক রোগে আক্রান্ত হন। কিষ্টিত আরোগ্য হওয়ার পর চন্দনাইশী বাবাজান তাকে দেখতে যান। ওসমান গনি মাষ্টারের টেবিলের উপর রক্ষিত ছিল খাতা ও কলম। বাবাজান নিজ হস্ত মুবারক দিয়ে খাতার উপর তিনবার করে লিখেন, মোহাম্মদ ওসমান গনি বিএবিটি তখনও ফল প্রকাশের আড়াই মাস বাকী ছিল এবং বাবাজান ওসমান গনি মাষ্টারের ভবিষ্যৎ বাণী করেন, “তোমার জন্য পদবী হবে বিএবিটি।” এরপর ওসমান গনির বিএবিটি পাশ করা সম্ভব হলেও চট্টগ্রাম বিশ্ববিদ্যালয়ের ইসলামের ইতিহাস বিভাগে ১৯৬৭ সালে এমএ পরীক্ষার জন্য নাম রেজিস্ট্রি করেও পরীক্ষা দিতে পারেননি। ১৯৭১ সালে তৎকালীন পূর্ব পাকিস্তান সরকার থেকে সবেতনে ডিপুটিশন পেয়েও এমএ পাশ করা সম্ভব হয়নি তার। এছাড়া আরও অনেক পরীক্ষা দেন তিনি কিন্তু কোনো ফল পান নি। বাবাজানের কথা মতো ওসমান গনি বিএবিটি পদেই

থেকে গেলেন। চন্দনাইশী বাবাজানের ভবিষ্যৎ বাণী অটল রয়ে গেল চিরতরে।

বর্ণনাকারীঃ ওসমান গনি (বিএ.বিটি)

গ্রামঃ কালিয়াইশ ইউনিয়ন, সাতকানিয়া, চট্টগ্রাম।

ওয়ার্ডঃ ০৫

৭.ফাঁসির রায় থেকে মুক্তি

আহলা দরবার শরীফের হযরত কাজী আসাদ আলী (রাঃ) এর এক ভক্ত। যিনি ছিলেন একজন দারোগা। বাড়ি বোয়ালখালি, চট্টগ্রাম। তার এক মেয়েকে চন্দনাইশ দরবার শরীফের পার্শ্বে ফতেহ মোহাম্মদ চৌধুরী বাড়িতে বিয়ে দেন। তারা চন্দনাইশী বাবাজান কেবলা এর নিকট আসা যাওয়া করতেন ও ভক্তি শ্রদ্ধা করতেন। দারোগা সাহেব হঠাৎ ষড়যন্ত্রের স্বীকার হয়ে আসামী হত্যা মামলায় আটকা পড়েন। সকল প্রকার আনা অভিযোগ তার বিরুদ্ধে প্রমাণিত হয়, যার কারণে চাকুরীতে উপস্থিত না হয়ে পালিয়ে বেড়ান। ধরা পড়ার ভয়ে পালিয়ে ও গোপনে থাকতেন। এমতাবস্থায় তিনি চন্দনাইশী বাবাজান কেবলার শরণাপন্ন হয়ে বলেন, “বাবাজান আমি আহলা দরবার শরীফের কাজী আসাদ আলী শাহ মাইজভানারীর (রাঃ) মুরিদ। বর্তমানে আমার পীর সাহেব এ ধরাধামে (পৃথিবীতে) নেই। এ বিপদ সংকুল সময়ে আমি ওনার মাজার শরীফে যেতে পারছি না আর্জি দেওয়ার উদ্দেশ্যে। পালিয়ে থাকতে হয় পুলিশি ওয়ারেন্ট হওয়ায়। বোয়ালখালীতে প্রতিদিন আমার ব্যাপারে খোঁজ খবর নেয়া হচ্ছে। কিন্তু বাবাজান আমি নির্দোষ, তাই আমাকে

বাচান। আমার বিরুদ্ধে এমন সব প্রমাণ উপস্থাপন করা হয়েছে যে, ধরা পড়ার সাথে সাথে আমার মৃত্যুদণ্ড কার্যকর হবেই। কোনো উপায় না পেয়ে এ গভীর রাতে আপনার কদমে এসে হাজির হয়েছি। দয়া করে আমাকে বাচান।” চন্দনাইশী বাবাজান দারোগার অবস্থা দেখে খুবই দয়াপরায়ণ হয়ে বলেন, “চিন্তা করিওনা বরং সারেভার করো।” বাবাজানের কথামত পরদিন সকালে ক্রন্দনরত অবস্থায় পুলিশের হাতে নিজেকে সারেভার করেন। তাকে আদালতে পেশ করা হলে আগে থেকে মামলা বিচারাধীন থাকতেই কিছু দিনের মধ্যে মামলার রায় দেয়া হয় দারোগা সাহেবকে ফাসিতে ঝুলিয়ে মৃত্যুদণ্ড কার্যকর করার, কিন্তু আশ্চর্যের বিষয় যে, জজ সাহেব যখনই মৃত্যু দণ্ডের রায় লিখতে যান তখনই মৃত্যু দণ্ডের রায় না লিখে বেকসুর খালাসের বিষয় লিখেন। পরপর তিন বার এরূপ হওয়াতে জজ সাহেব হতভম্ব হয়ে আসামী (দারোগার) দিকে তাকিয়ে থাকেন। আদালত শেষ করার পর দারোগাকে ডেকে জিজ্ঞেস করেন আপনি কি কোন আল্লাহর অলির কাছে গিয়েছেন কিনা? জবাবে তিনি বলেন, “আমি চন্দনাইশী বাবাজান এর কাছে গিয়ে ছিলাম।” এই কথা শোনার পর জজ সাহেব দারোগাকে চলে যেতে বলেন। এভাবে দারোগা চন্দনাইশী বাবাজানের বেলায়তী শক্তির মধ্যে দিয়ে মৃত্যুদণ্ডের হাত থেকে রক্ষা পান। খালাস পেয়ে দারোগা বাড়িতে না গিয়ে চন্দনাইশী বাবাজান কেবলার কদমে এসে তাজীম ও চুম্বন করেন এবং অজোর নয়নে বাবাজানের পা-দুখানি সিক্ত করেন। এর পর থেকে দারোগা সাহেব যতদিন বেঁচে ছিলেন প্রতিবছর একবার হলেও চন্দনাইশী বাবাজান কেবলার দরবারে এসে হাজিরা দিতেন।

বর্ণনাকারী : মোহাম্মদ ছাদেক হোসেন, পিতা-বদি আলম চৌধুরী, ফতেহ মোহাম্মদ চৌধুরী বাড়ী, চন্দনাইশ, চট্টগ্রাম।

৮. জীবজন্তু থেকে রক্ষা।

চন্দনাইশ নিবাসী জনাব মমতাজ। তিনি ও তার বাবা চন্দনাইশ দরবার শরীফে আসা-যাওয়া করতেন। চন্দনাইশী বাবাজান কেবলাকে অত্যন্ত ভক্তি প্রদর্শন করতেন। তিনি বলেন তার ছোটবেলায় বাবার সাথে চন্দনাইশ সৈয়দাবাদ পাহাড়ি এলাকায় বাঁশ ও লাকড়ী সংগ্রহ করতে যেতেন। একবার সৈয়দাবাদ এলাকায় পাহাড়ে গাছ, বাঁশ সংগ্রহের উদ্দেশ্যে তার বাবাসহ যান। পাহাড়ি অঞ্চলে প্রয়োজনীয় সংগ্রহ জনিত কাজে এত ব্যস্ত ছিলেন যে, দিনের সূর্য ডুবে যায়। আর সূর্য ডোবার পর পাহাড়ি এলাকায় থাকাটা খুবই বিপদজনক হয়ে পড়ে কারণ সে সময় বাঘ ও হাতি ঐ সব এলাকায় বিচরণ করত এবং মানুষ নামক প্রাণীর সুঘ্রান পেলে তাকে ছিড়ে খেতো। মমতাজ ও তার বাবা সূর্য ডোবার কারণে পাহাড়ি অঞ্চল থেকে বেরিয়ে আসার চেষ্টা করেন। পথিমধ্যে তাদের সামনে বাঘের উপস্থিতি দেখে তারা একেবারে ভেঙে পড়েন। তাদের পথ আগলে রাখতে তারা সামনের দিকে এগোতে পারছেন না। তারা মনে মনে চিন্তা করলেন যে, তাদের জীবন আজ শেষ। তাই তারা বাপ ছেলে দুজন দুজনকে জড়িয়ে ধরে কান্না শুরু করে দিলে দেখতে পান যে, চন্দনাইশী বাবাজান তাদের সামনে উপস্থিত এবং বাবাজানের উপস্থিতি দেখে বাঘ এখান থেকে চলে যায় এবং চন্দনাইশী বাবাজান কেবলা মমতাজ ও তার বাবাকে বাবাজানের পিছনে পিছনে আসতে বলে হাঁটতে থাকেন। যখন তারা পাহাড়ি অঞ্চল পেরিয়ে জনসমাগম অঞ্চলে

এসে পৌঁছায় তখন বাবাজান মমতাজ ও তার বাবার সামনে থেকে হঠাৎ অদৃশ্য হয়ে যান। তারা চন্দনাইশী বাবাজান কেবলকে দেখতে না পেয়ে এদিক ওদিক খোঁজে তারা সোজা বাড়ি চলে আসেন। একটুও বিশ্রাম না করে তারা চন্দনাইশী বাবাজান কেবলার হুজুরা শরীফে দ্রুত চলে আসেন ও বাবাজানকে তাজীম করেন। বাবাজান মুচকি হেসে জিজ্ঞেস করলেন, “তোমরা ভয় পেয়েছো কি?” উত্তরে কোন কথা না বলে মমতাজ এবং তার বাবা চন্দনাইশী বাবাজানের কাছে শুকরিয়ার নজরানা আদায় করেন। দরবারে অন্যান্য ভক্তদের জিজ্ঞেস করলেন, “তিন-চার ঘণ্টা আগে বাবাজান কোথায় ছিলেন?” তারা উত্তরে বললেন, “বাবাজান সারাদিন হুজুরা শরীফে অবস্থান করছিলেন, কোথাও যান নি।” তখন মমতাজের বাবা বুঝতে পারলেন আল্লাহর অলিগন বেলায়তি শক্তির বদৌলতে যেকোনো সময় যেকোনো স্থানে উপস্থিত হয়ে মানুষকে রক্ষা করেন।

বর্ণনাকারীঃ মমতাজ,মিজির দোকান, চন্দনাইশ, চট্টগ্রাম।

৯.চন্দনাইশী বাবাজানের উপদেশ

বাড়ি মোগলটুলী আখ্ৰাবাদ, চট্টগ্রামের জনাব মোঃআবুল চন্দনাইশী বাবাজান এর মুরিদ ছিলেন। চট্টগ্রাম বন্দরে কর্মের খাতিরে তাকে জাহাজের মালামাল স্থানান্তরের জন্য অনেক সময় ক্রেনের উপরে উঠে কাজ করতে হতো। তিনি একবার ক্রেনের সর্বোচ্চ স্থানে উঠে কাজ করতে থাকেন। কাজের চাপে তিনি ভুলে গিয়েছিলেন যে তিনি ক্রেনের সর্বোচ্চ স্থানে আছেন। দুর্ভাগ্যক্রমে তিনি ৫০-৮০ ফুট উচ্চতা থেকে পড়ে যান। মাটিতে পড়ার আগে তিনি অনুভব করেন যে কেউ তাকে ধরে মাটিতে বসিয়ে দিচ্ছেন। তিনি দেখতে পান চন্দনাইশী বাবাজান তার হাত ধরে তাকে মাটিতে বসিয়ে দিচ্ছেন। কিন্তু

কিছুক্ষণ পর চন্দনাইশী বাবাজান অদৃশ্য হয়ে যান। তখন আবুল মিয়া কাঁপতে থাকেন এবং বুঝতে পারেন কেবলমাত্র বাবাজানের দয়ায় তিনি ৫০-৮০ ফুট উচ্চতা থেকে পড়ার পরেও বেঁচে আছেন। স্বাভাবিক হওয়ার পরে তিনি চন্দনাইশী বাবাজানের কদমে চলে আসেন। তিনি বাবাজানের সামনে যেতে না যেতেই বাবাজান মুচকি হেসে বলে উঠেন, “কিরে আবুল মিয়া! এত উপরে কাজ করো, দেখে শুনে করতে পার না? কাজ করার সময় হোশ-জ্ঞান ঠিক রেখে কাজ করো।” তখন জনাব আবুল মাথা নিচু করে বলেন, “ঠিক আছে।” এরপর থেকে আবুল মিয়ার বাবাজানের প্রতি আরো ভক্তি-বিশ্বাস বেড়ে যায়।

বর্ণনাকারীঃ মোঃ আবুল মিয়া,মোগলটুলী, চট্টগ্রাম।

১০.চন্দনাইশী বাবাজান ও খাজা আজমীর (রাঃ)এর রহানী সম্পর্ক

সলিমা সিরাজ মাদ্রাসার জনৈক কর্মচারী যিনি চন্দনাইশী বাবাজানের (কঃ) ভ্রাতুষপুত্র মাওলানা ইসমাঈল সাহেবের স্ত্রীর ভাই ছিলেন। তিনি বর্ণনা করেন পাকিস্তানি আমলের প্রথম দিকের সময় তিনি ভারতবর্ষের আজমীর শরীফে গিয়েছিলেন খাজা আজমীর (রাঃ) এর মাজার জিয়ারতের উদ্দেশ্যে। একই বছর চন্দনাইশী বাবাজান (কঃ) ও ভারতের আজমীর শরীফে গিয়েছিলেন এবং বেশ কিছু দিন আজমীর শরীফে অবস্থান করেছিলেন। সেই সময় আজমীর শরীফের খাদেম জনাব আব্দুল গনি গরদজির সাথে চন্দনাইশী বাবাজান (কঃ) এর একটা ঘটনা ঘটে। ঘটনাটি হলো, চন্দনাইশী বাবাজান (কঃ) সারাদিন যেন কোথায় অবস্থান করেন কেউ জানত না এবং সময় সময় খাজা বাবার রওজা শরীফের পাশের রুমে এসে অবস্থান করতেন। কারো সাথে তিনি কথা-বার্তা বলতেন না এমনকি কোনো খাদেমদের বাড়িতেও অবস্থান করতেন না।

খাদেমদের কর্তৃক খাওয়া-দাওয়ার ব্যবস্থা করলেও চন্দনাইশী বাবাজান তাও গ্রহণ করতেন না। কারণ তিনি সবসময় খোদায়ী ধ্যানে মগ্ন থাকতেন। খাওয়া দাওয়ার প্রতি কোনো মোহ ছিল না। তবে তিনি দিনের যে কোনো সময় হঠাৎ খাজা বাবার রওজার পাশে এসে অবস্থান করতেন। এ ব্যাপারটা নিয়ে খাদেমদের মধ্যে বেশ সমালোচনা হতে দেখা যায়। এক সময় খাজা আজমীর (রাঃ) এর খাদেম আব্দুল গণি গরদজি চন্দনাইশী বাবাজান (ক:) সম্পর্কে কটু মন্তব্য করে বলেন, চন্দনাইশী বাবাজানের আচরণ না কি যাযাবরের মতো। এই কথা শুনে চন্দনাইশী বাবাজান (ক:) জালালী হালতে গিয়ে উক্ত খাদেম কে জিজ্ঞাস করেন, “তুমি বহুদিন তো খাজা সাহেবের খেদমত করতেছো, তুমি কখনো কি খাজা সাহেবের দেখা পেয়েছ?” উক্ত খাদেম চন্দনাইশী বাবাজানের কথা শুনে বিচলিত হয়ে গেলেন। বাবাজান আবার বলে উঠেন যে, “আমি খাজা সাহেব (রাঃ) কে বলে দিয়েছি তোমাকে দর্শন দিতে আর আমি কে তা খাজা সাহেব (রাঃ) তোমাকে বলে দিবেন।” এই কথা শুনে খাদেম সাহেব চন্দনাইশী বাবাজানের সামনে থেকে চলে যান। সে রাতে উক্ত খাদেম খাজা বাবাকে স্বপ্ন দেখেন। খাদেমকে খাজা বাবা বলেন, “তুমি কার সাথে বেয়াদবি করেছ। তুমি জান উনি কে?” এভাবে স্বপ্নে খাজাবাবা উক্ত খাদেমকে চন্দনাইশী বাবাজানের (ক:) পরিচয় তুলে ধরেন। খাদেমের স্বপ্ন ভেঙে গেলে অস্থির অবস্থায় রাতে বের হয়ে উক্ত খাদেম চন্দনাইশী বাবাজানকে (ক:) খুঁজতে থাকেন। অবশেষে তিনি চন্দনাইশী বাবাজানকে খাজা সাহেবের দরবারের আঙ্গিনায় দেখতে পান এবং চন্দনাইশী বাবাজানের কদমে লুঠিয়ে পড়েন। তিনি বলেন, “সত্যিই আমি খাজা বাবাকে কখনো দেখিনি কিন্তু গতকাল আপনি বলার সাথে সাথে খাজা বাবা আমাকে স্বপ্নে দেখা দেন। আপনার পরিচয় প্রদান করেন। আপনি আমাকে ক্ষমা করে দেন।” চন্দনাইশী বাবাজান তাকে ক্ষমা করে দিলে তিনি বাবাজানকে বাসায় নিয়ে গিয়ে পরিবারের সকলকে নিয়ে বাবাজানের হাতে বায়াত হওয়ার আকুল আবেদন করলে বাবাজান সকলকে কবুল করেন এবং বলেন যে, “খাজা

সাহেবের কাছে যত মেহমান আসবে তাদেরকে বিনয়ের সহিত সম্মান করবে।” চন্দনাইশী বাবাজানের বেলায়তী শক্তির রূপ দেখে ঐ খাদেম চন্দনাইশী বাবাজানের প্রতি বিনয়ী হয়ে পড়েন। ঐ খাদেম চন্দনাইশী বাবাজানের (ক:) আশেক হয়ে যান।

বর্ণনাকারীঃ আলী আজম শাহ, ডবল মুরিং, চট্টগ্রাম।

১১. “ভক্তিতেই মুক্তি”

জনাব মোঃ শাহাবুদ্দিন, পিতা: বজল আহমদ। বাড়ী: চকরিয়া, কক্সবাজার। তিনি চন্দনাইশী বাবাজানের বড় ছেলের বড় মেয়ের স্বামী। ১৯৮০ সালে তিনি গাছবাড়িয়া কলেজে অধ্যয়নরত অবস্থায় চন্দনাইশ দরবার শরীফে অবস্থান করতেন। ধীরে ধীরে চন্দনাইশী বাবাজানের বেলায়তী কর্মকাণ্ড দেখে তিনি বাবাজান কেবলার প্রতি গভীরভাবে আকৃষ্ট হয়ে বাবাজানকে নিজের মুর্শিদ হিসাবে গ্রহণ করেন। তাঁর কেরামতের প্রতি তিনি অটল বিশ্বাসী ছিলেন। তিনি বলেন ১৯৮০ সালে তার বোনের বাড়ী বাশখালী থেকে চকরিয়া গমনকালে রাতের গভীরতম সময়ে চকরিয়া রাজাখালী গ্রামে আসেন। ঐ স্থান দিয়ে রাতে চলাচল করা খুবই কঠিন ব্যাপার ছিল। কারণ রাতে ঐ স্থানে সাধারণ মানুষ চলাচল করতে গিয়ে ভীত সন্ত্রস্ত হয়ে পড়ত। জনাব শাহাবুদ্দিন বর্ণনা করেন যে, তিনি রাতে হেঁটে ঐ জায়গা পাড়ি দেন এবং ভয়ে তার রুহ প্রায় শুকিয়ে যায়। হঠাৎ তিনি চন্দনাইশী বাবাজানকে স্মরণ করার সাথে সাথে চন্দনাইশী বাবাজান তার সামনে উপস্থিত হয়ে যান। জনমানব শূণ্য ঐ স্থানে গভীর রাতে তিনি বাবাজান কেবলাকে দেখে সাথে সাথে তাজিম করেন। পরক্ষণে চন্দনাইশী বাবাজান কেবলা অদৃশ্য হয়ে যান। বাবাজানকে দেখে শাহাবুদ্দিন কোনো কিছুকে পরোয়া না করে অত্যন্ত সাহসীকতার সাথে নিজ বাড়ী রাজাখালীতে চলে যান এবং অন্তরে এক প্রশান্তি অনুভব করেন। বর্তমানেও

তিনি বিপদ-সংকট কালীন চন্দনাইশী বাবাজানের (ক:) উপর বিশ্বাস রাখতে ভালোবাসেন।

বর্ণনাকারী : মোঃ শাহাবুদ্দিন, পিতা: বজল আহমদ। বাড়ী:

চকরিয়া,কক্সবাজার

১২."কবর বাসীর জন্য দোয়া"

একদিন চন্দনাইশী বাবাজান বিশেষ আমন্ত্রণে ধোপাছড়ি যান। ধোপাছড়ি গিয়ে দেখতে পেলেন উনার ভক্ত কালা মিয়ার বাবা মারা গেছেন। চন্দনাইশী বাবাজান কালামিয়ার অনুরোধে জানাযার নামাজের ইমামতি করেন। জানাজার নামাজে ইমামতি করার পর আবদুর রহমান, হাজী ইসমাইল ও কালামিয়ার মায়ের আত্মীয়-স্বজনরা কবরের পাশে হুজুর রাখার জন্য চিন্তা ভাবনা করেন। ঐ সময় চন্দনাইশী বাবাজান আত্মীয়-স্বজনকে বললেন, “হুজুরের টাকা গুলো আমাকে দাও, আমি থাকবো।” ঐ সময় কবরের পাশে হুজুর থাকার জন্য এক আনা বা দুই আনা দিত কিন্তু চন্দনাইশী বাবাজান ওনার পীর হওয়াতে ওনাকে সাত আনা নজরানা দেন, ঐ সাত আনা নিয়ে চন্দনাইশী বাবাজান সোজা দরবারে চলে আসেন। যখন সন্ধ্যা হয় তখন আবদুর রহমান ও হাজী ইসমাইল (আবদুর রহমান ও হাজী ইসমাইল দুই জনই মাইজভান্ডারী তরিকার বিরোধী ছিলেন) বাবাজানের আশেক মনিরুজ্জামান (চেনুর বাপ) এবং আবদুল আজিজ (পাখির বাপকে) বলতে লাগলেন, “আপনাদের পীর কোথায়? টাকা নিয়ে চলে গেছেন?” তখন চেনুর বাপ এবং পাখির বাপ বললেন, “টাকা কি আমরা নিয়েছি? টাকা যাকে দিয়েছো তাকে গিয়ে বল।” অথচ রাত যখন ১২টা ঐ সময় চন্দনাইশী বাবাজান দরবারে ছিলেন, কিন্তু চন্দনাইশী বাবাজান বেলায়তি শক্তির মাধ্যমে ১০ মাইল দূরবর্তী ধোপাছড়ির কবরের পাড়ে উপস্থিত হন। তখন চন্দনাইশী বাবাজান জোরে জোরে কি যেন বলতে লাগলেন। কারো আওয়াজ শোনার পর আবদুল আজিজ এবং মনিরুজ্জামান ঘর হতে বের হয়ে দেখেন চন্দনাইশী বাবাজান। তারা বাবাজানকে

জালালিয়াত হালতে দেখতে পেয়ে হতভম্ব হয়ে যান। আবদুর রহমান ও হাজী ইসমাইল ও এদৃশ্য দেখে অবাক। কারণ সূদূর জংগল পাড়ি দিয়ে ১০ মাইল অতিক্রম করে রাত ১২ টায় ধোপাছড়ি উপস্থিত হওয়া অসম্ভব। চন্দনাইশী বাবাজানের জালালিয়াত রূপ দেখে সবাই বুঝতে পারেন যে, চন্দনাইশী বাবাজান বেলায়তি শক্তির অধিকারী। তাই তারা বাবাজানের কাছে তাদের ভুলের জন্য ক্ষমা চান। তারা কবরস্থানের সব বাসিন্দাদের জন্য আযাব মাফ হওয়ার ব্যবস্থা করে দিতে বলেন। এরপর থেকে এলাকাবাসীরা বাবাজানের প্রতি বিনয়ী হয়ে পড়েন।

বর্ণনাকারী : মনিরুজ্জামান , গ্রাম : ধোপাছড়ি,চন্দনাইশ,চট্টগ্রাম।

১৩. “ঘরে আগুন”

২২শে মাঘ ওরশ শরীফে আসার জন্য মনিরুজ্জামানের ছেলে শফি আর চন্দনাইশী বাবাজানের কিছু ভক্ত নিয়ে ধোপাছড়ি বাসীরা একটি গরু হাদিয়া কিনেন। ঐ সময় গাড়ির ব্যবস্থা না থাকায় উনারা গরু হাদিয়া নিয়ে হাঁটা শুরু করলেন। হাঁটতে হাঁটতে সৈয়দাবাদ আমতলী নামক জায়গায় পৌঁছালে কিছু লোক উনাদেরকে উদ্দেশ্য করে চন্দনাইশী বাবাজানকে নিয়ে কিছু অকথ্য ভাষায় কথা বলেন। ঐখান থেকে এক ভক্ত যখন প্রতিবাদ করেন, তখন উনারা চন্দনাইশী বাবাজানের এক ভক্তকে মারধর করেন। যখন দুপক্ষের মধ্যে মারধর শুরু হয়, এলাকার কিছু লোক এসে মারামারি থামিয়ে দেন। তারপর ধোপাছড়ি বাসীরা গরু হাদিয়া নিয়ে দরবারে চলে আসেন। দরবারে প্রবেশ করার আগমুহূর্তে তারা শুনতে পান সৈয়দাবাদ আমতলীর জনৈক ব্যক্তিদের ঘর পুড়ে যায়। যখন দরবারে প্রবেশ করে তখন শফি শুনতে পেলেন ঐ ব্যক্তিদের মধ্যে এক জনকে পুলিশ ধরে নিয়ে গেছেন। অপরদিকে ঘটনা গুলো পর ঐ ব্যক্তির বুঝতে পারেন যে তাদের ভুল হয়ে গেছে। তখন তারা চন্দনাইশী বাবাজানের এক ভক্তের কাছে এসে বললেন, “আমরা ভুল করে

ফেলেছি। আমাদের চন্দনাইশী বাবাজানের কাছে নিয়ে যান। আমরা বাবাজান থেকে ক্ষমা চাওয়ার জন্য আসছি। আপনি একটু বাবাজান থেকে ক্ষমা চাওয়ার ব্যবস্থা করে দেন।” উনি তাদেরকে চন্দনাইশী বাবাজানের কাছে নিয়ে আসেন। তখন চন্দনাইশী বাবাজান বললেন, “তোমরা তো আমার সাথে কিছু করো নাই যাদের সাথে করেছো তাদের থেকে ক্ষমা চাও।” শফির বাবা মনিরুজ্জামান তাদেরকে বললেন, “ক্ষমা করার মালিক বাবাজান। আপনারা চন্দনাইশী বাবাজান থেকে ক্ষমা চান।” তাদের ক্ষমা চাওয়ার মূর্ত্তে চন্দনাইশী বাবাজান কালাম করেন “শুধু আমার দরবার নয়। কোনো দরবারের সাথে কেউ এই রকম কোনো বেয়াদবি করলে তার পুরো বংশ নির্বংশ হয়ে যাবে।”

বর্ণনাকারী : মোহাম্মদ শফি পিতা মনিরুজ্জামান , গ্রাম : ধোপাছড়ি
৪নং ওয়ার্ড, ধোপাছড়ি, চন্দনাইশ, চট্টগ্রাম।

১৪. ১৯৬৯ এর ঘূর্ণিঝড়ে রুহানী ছফর

১৯৬৯ সালে একটি ঘূর্ণিঝড় হয়েছিল। অনেক লোক সেই ঘূর্ণিঝড়ে মারা যায়। বাতাসে গাছপালা উপড়ে পড়ে গাড়ি চলাচল বন্ধ হয়ে গিয়েছিল। পরের দিন সকালে বাবাজান কেবলা কাবা ১০টা-১১টার সময় উনার ভক্ত জমিলা খাতুনের ঘরে গিয়ে উপস্থিত হয়ে বাসায় বসে চা-নাস্তা পান করেন। বাবাজান কে এমন দুর্ভোগ অবস্থায় উপস্থিত হতে দেখে জমিলা খাতুন হতভম্ব হয়ে যান। বেড়ার ঘরে টিনের ছাউনি ছিল বিধায় ঘূর্ণিঝড়ে ঘরের বেহাল দশা দেখে বাবাজান জমিলা খাতুন কে বললেন, “আমি মোগলটুলী অন্যান্য ভক্তদের একটু দেখতে যাব।” তারপর বাবাজান বিদায় নেন। জমিলা খাতুন এর ঘরের বেহাল দশার কারণে বাবাজানকে থাকার জন্য অনুরোধ করেনি। কিছুদিন পরে

রাস্তাঘাট পরিষ্কার করার পর গাড়ি যখন চলাচল শুরু করল, তখন কাজীর দেউড়ীবাসী সবাই জানতে পারলেন যে বাবাজান ঐদিন স্বশরীরে চন্দনাইশ দরবার শরীফেই উপস্থিত ছিলেন। দরবার ছেড়ে কোথাও যাননি।

বর্ণনাকারী : কাশেম ভাণ্ডারী

গ্রাম : নজড় মোহাম্মদ চৌধুরি বাড়ি, ৫নং
ওয়ার্ড, কানাইমাদারি, চন্দনাইশ, চট্টগ্রাম।

১৫. একই সময়ে দুই জায়গায় উপস্থিত

তখন ১৯৭৬ সাল, কানাইমাদারী নিবাসী জনাব কাসেম বাবাজানের খেদমতে ছিলেন। তিনি দরবারে থাকতেন, বাড়িতে খুব একটা যেতেন না। কাসেম পরিবারের বড় ছেলে ছিলেন। অনেকদিন বাড়িতে যাননি। তাই কাসেমের মা কাসেমকে দেখতে আসেন। মা ছেলে কথা বলতে বলতে মাগরিবের সময় হয়ে যায়। তখন কাসেমের মা কাসেমকে বলেন, “ বাড়িতো ৪/৫ মাইল দূরে, রাতে আমাকে একটু বাড়িতে দিয়ে আসো।” তখন কাসেম উনার মাকে বললেন, “আপনি বাবাজানকে বলেন।” তখন বাবাজান কাসেমের মাকে বললেন, “আমি যাব নাকি কাসেম যাবে?” তখন উনার মা বললেন, “আপনি গেলেই হবে।” কথা শেষ করার পর কাসেমের মা দরবার থেকে বাড়ির উদ্দেশ্যে হাঁটা শুরু করলেন। তখন রাস্তার অবস্থা অনেক খারাপ ছিল। বাবাজান রাস্তায় হাঁটতেছেন আর কাসেমের মা বাবাজানের পিছন পিছন হাঁটতেছেন। কাশেমের মা বাড়ি পৌঁছাতেই বাবাজান অদৃশ্য হয়ে গেলেন। অথচ যখন বাবাজান কাসেমের মায়ের সামনে হাঁটতেছিলেন ঠিক একই সময়ে বাবাজান দরবারে হুজরা শরীফে উপস্থিত ছিলেন। পরবর্তীতে কাশেম তার মার কাছ থেকে ঘটনাটি শুনে অবাক হয়ে যান।

বর্ণনাকারীঃ- কাসেম ভাভারী

গ্রামঃ- নজড় মোহাম্মদ চৌধুরি বাড়ি, ৫নং ওয়ার্ড, কানাইমাদারি,

চন্দনাইশ, চট্টগ্রাম।

ওয়ার্ডঃ- ০৫

১৬. ভক্ত থেকে খারিজ

মিজির দোকান নিবাসী জনাব আলতাজ মিয়া। চন্দনাইশী বাবাজানকে বাবা ভাভারি কেবলায়ে আলমের একজন ফয়েজ প্রাপ্ত রুহানি সন্তান হিসেবে মানতেন। সে কারণে আলতাজ মিয়া বাবাজানকে পীর হিসেবে গ্রহণ করেন। বাবাজান আলতাজ মিয়াকে অনেক বেশি স্নেহ করতেন। বাবাজান উনার ভক্তদের বলতেন, “তোমরা আমার কাছে আসার আগে আলতাজের সাথে দেখা করে আসবে। না আসলে তোমাদের হাজিরা কবুল হবে না।” এ কথা শুনতে শুনতে আলতাজ মিয়ার মনে অহংকার চলে আসে। একসময় আলতাজ মিয়া বাবাজানের নূরানী রূপ দর্শন করেন। আলতাজ মিয়া বাবাজানকে মোহনীয় রূপে দেখার পর থেকে ঐ রূপের জন্য পাগল হয়ে যায়। আলতাজ মিয়া ঐ রূপ দর্শন পাওয়ার জন্য ১০/১২ জনের একটি দল করেন। তাদের ধারণা ছিলো যে, যদি বাবাজানকে কাটতে পারে তাহলে সেই নূরানী রূপ কে পাওয়া যাবে। দলের প্রধান ছিলেন বেদার বকশ ও আলতাজ মিয়া। বেদার বকশ এবং আলতাজ মিয়া তাদের সহকর্মীরা মিলে বাবাজানকে জিজ্ঞেস করেন, “রুহানি রূপ কি কাটা যায়?” বাবাজান বললেন, “হ্যাঁ, কাটা যায়। তলোয়ার দিয়ে কাটা যায়।” কিন্তু আলতাজ মিয়া এবং বেদার বকশ জিজ্ঞেস করে নাই কীসের তলোয়ার দিয়ে কাটা যায়। জাহেরী তলোয়ার দিয়ে নাকি ইশকের তলোয়ার দিয়ে। কথাটা শুন্যর পর আলতাজ আর বেদার বকশ সহ অন্যরা মনে মনে খুশি হয়। এরপর এরা পরিকল্পনা করল বাবাজানকে কীভাবে কাটা যায়। আলতাজ এবং বেদার বকশ বাবাজানকে কাটার পরিকল্পনার কথা

ভক্তদের কানে চলে যায়। এটা শুন্যর পর ভক্তবৃন্দ ক্ষেপে যায় এবং দরবারে অবস্থান করতে শুরু করে। ভক্তবৃন্দ ওদেরকে আক্রমণ করতে চাইলে বাবাজানের আদেশ না পাওয়ায় ভক্তবৃন্দ তাদের কিছু করতে পারে না। যে দিন আলতাজ ও বেদার বকশ বাবাজানকে কাটবে সে দিনই বাবাজান উনার ভক্তবৃন্দের বাড়িতে যাওয়ার নির্দেশ দেন। ভক্তবৃন্দের বাড়িতে যাওয়ার ইচ্ছা না থাকলেও বাবাজানের হুকুম পালন করার জন্য বাড়িতে সবাই চলে যায়। ভক্তবৃন্দগণ সবাই চলে গেলে আলতাজ এবং বেদার বকশ ও তাদের সহকর্মীরা মিলে সুযোগ খুজতে থাকে। সকাল ০৮ টার দিকে বাবাজানকে বর্তমান যেখানে দরবার গেইট বিদ্যমান সেখানে বাবাজানকে দেখতে পাই। তারা বাবাজানের সাথে কাউকে দেখতে না পেয়ে আর দেরি না করে উক্ত খালি জায়গায় ধারালো তলোয়ার দিয়ে বাবাজানকে তিন টুকরা করে ফেলেন। তিন টুকরা করে চলে যাওয়ার সময় ওরা দেখে বাবাজানের তিনটা খন্ড আবার একত্রিত হয়ে যাচ্ছে তা দেখে তারা অবাক হয়ে যায়। এরপর এলাকাবাসীর উপস্থিত হওয়ার আভাস বুঝতে পেরে আলতাজ এবং বেদার বকশ ও তাদের সহকর্মীরা ওখান থেকে পালিয়ে যায়। এদিকে চন্দনাইশী বাবাজান শোয়া থেকে উঠে দাঁড়ান। বাবাজানের গায়ে একটা হাজি রুমাল ছিল। বাবাজানের গলা মোবারক থেকে তখন রক্তক্ষরণ হচ্ছিল। বাবাজান ঐ সময় হাজি রুমাল দিয়ে গলা মোবারক চেপে ধরেন। বাবাজান ঐখান থেকে হেঁটে বাড়িতে যান। ঐ অবস্থায় বাবাজান দায়রা শরীফে খাটের উপর শুয়ে থাকেন। চারদিকে শোরগোল শুরু হলে অন্যরা একজন ডাক্তারকে দরবারে নিয়ে আসেন এবং সেলাই করানো হয়। ঐ সময় গাছবাড়িয়া স্কুলের প্রধান শিক্ষক ছিলেন সামসুল ইসলাম, যিনি বাবাজানের চরণে যেতেন। বাবাজানের এই অবস্থার কথা শুনে দরবারে আসেন। উনার নিজ দায়িত্বে বাবাজানকে পটিয়া মেডিকেলে ভর্তি করা হয়। প্রায় ২ মাস বাবাজানকে পটিয়া মেডিকেলে চিকিৎসা করা হয়। তারপর বাবাজান সুস্থ হয়ে বাড়িতে ফিরে আসেন। গাছবাড়িয়া স্কুলের প্রধান শিক্ষক সামসুল ইসলাম বাবাজানের দয়ায় গাছবাড়িয়া স্কুলের প্রধান শিক্ষক

থেকে কুমিল্লা বোর্ডের কন্ট্রোলার হয়ে যান। অপরদিকে আলতাজ মিয়া পাগল হয়ে যায়। আলতাজ মিয়া রাতে মানুষের বাড়িতে এবং খড়ের স্তূপে আগুন দিতে থাকে ও কখনো গরু আগুন দিয়ে জ্বালিয়ে ফেলছে। যার কারণে এলাকার মানুষ জেগে থাকতেন। এগুলো দেখার পর বেদার বকশ বাবাজানের চরণে এসে বাবাজানের কাছে থেকে ক্ষমা চাই। বাবাজান বেদারকে ক্ষমা করে দেন। বাবাজানের ভক্তবৃন্দ এবং এলাকাবাসীরা বেদারকে মেনে নিতে পারছিলেন না। তখন বাবাজান বেদারকে ভক্তবৃন্দের হাত থেকে বাঁচাতে বেদারকে পটিয়া আমিরুজ্জামান শাহ এর শাহাজাদা ডাক্তার সাহেবের কাছে পাঠিয়ে দেন। অন্যদিকে আলতাজ এর পাগলামি দিন দিন বেড়ে যাচ্ছিলো। একদিন আলতাজ মাথার চুল মুন্ডন করে ফেলে। বাবাজান তার জন্য আপসোস করেন। এভাবে আলতাজ তুরিকা থেকে ধীরে ধীরে খারেজ হয়ে যান। বাবাজানের ইন্তেকালের কিছুদিন পর আলতাজ ও মারা যায়। মারা যাওয়ার পর আলতাজের কবরের উপর খোদার পক্ষ হতে আগুনের টুকরা নিক্ষেপ হয়। আগুনের টুকরা নিক্ষেপ হওয়ার দৃশ্য এলাকার মানুষ স্ব-চক্ষে দেখতে পান। একজন আল্লাহর অলীর সাথে বেয়াদপি করার পরিণতি কি এলাকার মানুষ তা ভালভাবে বুঝতে পারেন।

বর্ণনাকারীঃ- বেদার বকসু।

গ্রামঃ- মির্জির দোকান

১৭. ভিটার মাঝখানে খাল

কানাইমাদারী নিবাসী জনাব আহমদ উল্লাহ (প্রকাম মঞ্জুরের বাপ)। পাকিস্তান আমল চলাকালীন সময়ে যখন ভূমি জরিপ হচ্ছিলো তার আগেই মঞ্জুর আহমদের মা মারা যান। একদিন বিশেষ কারণে মঞ্জুর আহমদের বাবা বোর্ড ঘরে যান। ঐখানে গিয়ে মঞ্জুরের বাবা দেখেন যে, মঞ্জুরের বড় মামা জায়গা জমি জরিপ করতেছেন। মঞ্জুর আহমদের বাবা ঐখানে থাকা কাগজগুলোতে দেখেন তার স্ত্রীর নাম নেই। তা দেখে মঞ্জুর আহমদের বাবা বলেন, “মঞ্জুরের মা তো মারা গেছেন। তার জায়গায় মালিকদের মধ্যে মঞ্জুর আহমেদ এবং তার ভাই-বোনদের নাম নেই কেন?” একথা জিজ্ঞেস করলে মঞ্জুরের মামা বলেন, “আপনাদের জায়গা দিব না বরং আপনাদের ভিটাতে পুকুর দিব।” এই কথা শুনে মঞ্জুর আহমদের বাবা চন্দনাইশী বাবাজানের কাছে এসে আর্জি পেশ করেন এবং বলেন, “মঞ্জুরের মামা নাকি আমার ভিটায় পুকুর দিবে।” চন্দনাইশী বাবাজান বললেন, “তুমি মঞ্জুরের মামাকে বলো তোমার ভিটা খাল হয়ে যাবে।” এই কথা বলার ছয়মাস পর কেশুয়া খাল ভাঙ্গনের ফলে তাদের ভিটা মাটি বিলীন হয়ে যায়।

বর্ণনাকারী : মঞ্জুর মিয়া পিতা আহমদ উল্লাহ

ঠিকানা: খাঁরবাড়ি, ৬ নং ওয়ার্ড, কানাইমাদারি, চন্দনাইশ, চট্টগ্রাম।

১৮. কাশফ ছলব

চন্দনাইশ মির্জির দোকান নিবাসী জনাব আব্দুছ ছোবাহান আওলিয়াকেরামদের ভক্তি ও বিশ্বাস করতেন। একদিন আব্দুছ ছোবাহান একটি কাঁঠাল নিয়ে সাতকানিয়া পেঠান শাহ বাবাজীর চরণে যান। তখন পেঠান শাহ জীবদ্দশায় ছিলেন। আব্দুছ ছোবাহান পেঠান শাহ বাবাজীর কাছে আর্জি পেশ করেন বেলায়েতের শক্তি প্রদান করার জন্য। পেঠান শাহ (রাহ:) আব্দুছ ছোবাহান

এর আর্জি কবুল করেন এবং ফয়েজে এন্ডেহাদি প্রদান করেন। এরপর আব্দুছ ছোবাহান খুবই অস্থির হয়ে যান। কোনো অবস্থায় স্থির হতে না পারায় অপারগ হয়ে চন্দনাইশী বাবাজানের (ক:) কাছে আসেন এবং আর্জি পেশ করেন, “আমি না বুঝে পেঠান শাহর কাছ থেকে বেলায়েতের শক্তি চেয়েছিলাম। আমি এই বেলায়েতের শক্তি সহ্য করতে পারতেছি না, আপনি আমাকে একটু দয়া করুন।” তখন চন্দনাইশী বাবাজান বললেন, “আব্দুছ ছোবাহান তুমি আরেকটু ভেবে দেখো।” আব্দুছ ছোবাহান চন্দনাইশী বাবাজানকে বললেন, “আমি ভেবে দেখেছি।” তখন চন্দনাইশী বাবাজান মিষ্টি খাচ্ছিলেন। ঐ মুহূর্তে ঐখান থেকে আব্দুছ সুবাহানকে অর্ধেক মিষ্টি খেতে দিলে আব্দুছ ছোবাহানের অস্থিরতা কমে যায় এবং তার বেলায়েতের শক্তি ও নিষ্ক্রিয় হয়ে পড়ে। আব্দুছ ছোবাহান বুঝতে পারলেন যে, আল্লাহর অলিদের কাছ থেকে কোন কিছু জোর করে চাওয়া ভুল।

বর্ণনাকারী : বাচা মিয়া, মধ্যম চন্দনাইশ।

১৯. অলি আল্লাহর মধ্যে দিয়ে খোদায়ী শক্তির বহিঃপ্রকাশ

জনাব বুধু মিয়া চন্দনাইশী বাবাজানের একান্ত মুরিদ। তিনি চন্দনাইশ পৌরসভার ৭ নম্বর ওয়ার্ডের অধিবাসী। তিনি বিবাহিত জীবনে বহু বছর পর্যন্ত নিঃসন্তান ছিলেন। বহু বৈদ্য ও ডাক্তার এর নিকট যাওয়া সত্ত্বেও তিনি কোন সন্তান সন্ততির মুখ দেখলেন না। এভাবে ১২ বছর অতিবাহিত হয়ে গেলে তিনি একেবারেই হতাশ হয়ে পড়েন। এমতাবস্থায় তিনি নিজ মুরশিদ চন্দনাইশী বাবাজান কেবলার নিকট এসে নিজের যন্ত্রনার কথা বলা শুরু করলে, চন্দনাইশী বাবাজান বলেন, “বুধু মিয়া ওঝা, বৈদ্য সব প্রচেষ্টা শেষ কিনা?”

জনাব বুধু মিয়া তখন মাথা নিচু করে থাকেন। বাবাজান তখন বলেন “যাও তোমাকে আল্লাহর পক্ষ থেকে সন্তান দান করা হলো।” এর এক বছরের মধ্যে জনাব বুধু মিয়ার স্ত্রীর কোলজুড়ে সন্তান আসে। এভাবে বুধু মিয়া চন্দনাইশী বাবাজান কেবলার শোকরান আদায় করেন। বাবাজানের প্রতি অগাধ ভালোবাসা তার মধ্যে জাগ্রত হয়।

বর্ণনাকারীঃ বুধু মিয়া চন্দনাইশ পৌরসভার ৭ নম্বর ওয়ার্ডের অধিবাসী

২০. পরীক্ষার আগে গ্রেট নির্ধারণ।

কানাইমাদারী গ্রামের আব্দুল মজিদ চৌধুরীর বড় ছেলে নুরুল হক চৌধুরী ১৯৬৯ সালের S.S.C পরীক্ষার্থী ছিলেন। আব্দুল মজিদ চৌধুরীর ছেলে এবং কানাইমাদারী গ্রামের আরও ৪/৫ জন ছেলেসহ পরীক্ষার আগে দরবারে আসেন। নুরুল হক চৌধুরী এবং অন্যান্য ছেলেদের প্রবেশপত্র এবং কলম নিয়ে চন্দনাইশী বাবাজানের (ক:) নিকট যান। তখনকার সময় ফলাফল ঘোষণা হত প্রথম ডিভিশন, দ্বিতীয় ডিভিশন এবং তৃতীয় ডিভিশন অনুসারে। চন্দনাইশী বাবাজান (ক:) ছেলেদের কাছ থেকে জিজ্ঞেস করলেন, “তোমরা কে কোন ডিভিশন অর্জন করে পরীক্ষায় উত্তীর্ণ হতে চাও? তাদের প্রত্যেকে ইচ্ছা অনুযায়ী ডিভিশন কামনা করলে বাবাজান ও তাদেরকে সেরকম পাশের কথা বললেন। পরবর্তীতে যখন পরীক্ষার ফলাফল ঘোষিত হয় তখন দেখা গেল যে, বাবাজান যাকে যেভাবে ফলাফল নির্ধারণ করে দিয়েছিলেন ঠিক সেভাবে তাদের পরীক্ষার ফলাফল ঘোষিত হয়। একটুও এদিক-ওদিক হয়নি।

তারা তাদের পরিবারের সামর্থ্য অনুযায়ী হাদিয়া নিয়ে বাবাজানের সাথে দেখা করলেন এবং শোকরানা আদায় করলেন।

বর্ণনাকারীঃ- আব্দুল মাজিদ

গ্রামঃ- কানাইমাদারী

২১. দেয়ালের মধ্যে বাবাজানের ছবি।

ঢাকা মুন্সীগঞ্জ নিবাসী জনাব আবদুল আলীম ইনকাম টেক্স অফিসার ছিলেন। তিনি চট্টগ্রামে বদলী হয়ে আসার পর ব্যাটারী গলির ভিতরে পুরাতন মসজিদের পূর্ব পাশে ভাড়া বাসায় থাকতেন। তাঁর স্ত্রীর নাম শাহাজাদী বেগম। তাদের চার মেয়ে ও দুই ছেলের সংসার। একদিন আবদুল আলীম সাহেব ডায়রিয়া রোগে আক্রান্ত হয়ে হঠাৎ করে মারা যান। ১৯৭২ সালের ঘটনা, এমন দুঃসময়ে সাহায্যকারী হিসেবে জনাব ইসলাম মিঞা এগিয়ে আসেন। সব রকমের সাহায্য-সহযোগীতা করে দাফন কাফনের ব্যবস্থা করেন। তাই আবদুল আলীম এর স্ত্রী শাহাজাদী বেগম ও তার দেবরেরা মিলে মেজো মেয়ে রেহেনা বেগমকে ইসলামের সাথে বিয়ে দেওয়ার আগ্রহ প্রকাশ করেন। ইসলাম ও তার বড় ভাইগণ দ্বিমত পোষণ না করে বিয়েতে এক বাক্যে রাজী হয়ে যান। তারপর ইসলামের পক্ষ থেকে প্রস্তাব দিলেন যে, “আমাদের বাবাজান কেবলা কাবার অনুমতি নিয়ে বিবাহ পড়ানো হবে।” এতে মেয়ে পক্ষের সবাই রাজী হয়ে গেলেন। একদিন শুভক্ষণে বাবাজানের আগমন হলে তাদের শুভ বিবাহ সম্পাদিত হয়। বিয়ের পর ইসলামের শাশুড়ী শাহাজাদী বেগমকে ইসলামের বড় ভাই আবুল কালাম বাবাজানের কাছে বায়াত গ্রহণ করতে প্রস্তাব দিলে শাহাজাদী বেগম বিনা দ্বিধায় রাজী হয়ে যান। তাঁর স্বামী মারা যাওয়াতে তাঁর দেবরের পরিবারে যৌথ সংসারে ছেলে মেয়েদেরকে নিয়ে থাকতেন। বায়াত গ্রহণ করে যাওয়ার পর সেটি তাঁর স্বশুর বাড়ির লোকেরা জেনে গেলে তাকে নির্যাতন শুরু করে দেন। কারণ তার স্বশুর বাড়ির সকলেই

দরবার বিরোধী ছিলেন। এমনকি কোনো অলিআল্লাহ বা ফকির দরবেশ পর্যন্ত এরা বিশ্বাস করেন না। তাই তাকে শুধু নির্যাতন নয় চট্টগ্রামে মেয়ের বাড়ীতে পর্যন্ত আসতে দিতো না। এদিকে শাহাজাদী বেগমের মন বাবাজানের জন্য এমন ব্যাকুল হয়ে গেল যে, বাবাজানের বিরহে তিনি পাগলের মতো হয়ে খাবার ত্যাগ করেন। নিজ কক্ষে দরজা বন্ধ করে শাহাজাদী বেগম অনশন শুরু করে দেন। শাহাজাদী বেগম অর্ধমৃত অবস্থায় পৌঁছে যায়। হঠাৎ একদিন ঘরের দেওয়ালের মধ্য থেকে আলো তাঁর চোখে এসে পড়ল। তখন শাহাজাদী বেগম চোখ খুলে দেওয়ালের দিকে তাকালে ঐ আলোর মধ্যে চন্দনাইশী বাবাজানের ছবি মোবারক দেখতে পান। এটা দেখে শাহাজাদী বেগমের বিরহ যন্ত্রনা নিবারণ হয়ে গেল। তারপর তাঁর স্বশুর বাড়ির লোকদের দেওয়ালের উক্ত ছবি মোবারক দেখান যা দেওয়ালের মধ্যে ছিল এবং বলেন তার পীর সাহেব কামেল। এমন দৃশ্য দেখার পরও তারা বিশ্বাস আনতে পারেন নাই। কিন্তু শাহাজাদী বেগমের মেঝো বোন, ছোটবোন ও দুই ভাই তারা সকলে দেওয়ালে বাবাজানের ছবি মোবারক দেখার পর বাবাজানের হাতে বায়াত গ্রহণের জন্য ব্যাকুল হয়ে পড়েন। এর পরে ঢাকা থেকে চন্দনাইশ দরবারে চলে আসেন। দরবারে এসে দেখেন যে ছবি মোবারকের মধ্যে যাকে দেখেছিলেন উনি সেই চন্দনাইশী বাবাজান। এরপর শাহাজাদী বেগমের ছোট ভাইগন ও ছোট বোনগন বাবাজানকে নিজেদের মুরশিদ হিসেবে গ্রহণ করেন।

বর্ণনাকারী : শাহাজাদী বেগম

বাসা: ঢাকা মুন্সীগঞ্জ।

ওয়ার্ড: ১৫

২২.হারানো যৌবন ফিরে পাওয়া

চামুদরীয়া স্কুলের পার্শ্বে পাঠানদভী গ্রামে বাবাজানের আশেক আহমদ উল্লাহ ফকিরের (প্রকাশ মজুর মিঞার বাবা) চায়ের দোকান ছিল। আনোয়ারায় বাবাজানের ভক্তগণ চন্দনাইশ দরবারে আসার সময় উক্ত চায়ের দোকান এর পাশ দিয়ে আসা যাওয়া করত। সেরকম একদিন আনোয়ারা থেকে বাবাজানের এক ভক্ত আবদুস ছবুর পাঁয়ে হেঁটে চানখালী ঘাট পার হয়ে চামুদরীয়া স্কুলের পাশ দিয়ে দরবারে আসার সময় পীর ভাইয়ের দোকান হিসেবে আবদুস ছবুর মিস্ত্রী আহমদ উল্লাহ ফকিরের দোকানে বসলেন। জনৈক সামগুল আলম নামক এক ব্যক্তি ঐ দোকানে মন খারাপ করে বসে ছিলেন। ঐ ব্যক্তি আবদুস ছবুর মিস্ত্রীর দুঃসম্পর্কের শালা ছিলেন। সামগুল আলমের মন খারাপ দেখে আবদুস ছবুর মিস্ত্রী তার কারণ জানতে চাইলে সে লজ্জা ত্যাগ করে বললেন যে, “বিয়ে করার পর আমি আমার বৌ এর কাছে লজ্জা পাচ্ছি। এক কথায় আমি পুরুষত্বহীন হয়ে গেছি। আমার স্ত্রী এখন আমাকে তালাক দেওয়ার ভয় দেখাচ্ছে। অনেক চিকিৎসা করেও আমি কোনো ফল পাচ্ছি না। আচ্ছা আমি আপনাদের দরবারে গেলে ফল পাব কি?” তখন আহমদ উল্লাহ ফকির এবং আবদুস ছবুর দুইজনে বলে উঠলেন যে, “তুমি যদি বিশ্বাস কর তাহলে গিয়ে দেখে আসতে পার।” তারপর একদিন আবদুস ছবুর ও আহমদ উল্লাহ ফকিরের ছেলে মজুর মিঞার সাথে সামগুল আলম দরবারে আসেন। ঐ সময় বাবাজান বাইরে হাঁটতে ছিলেন। তখন বাবাজান আবদুস ছবুর ও মজুর মিঞার সাথে সামগুল আলমকে দেখে বলে উঠলেন, “তোমাদের আর কোনো কাজ নেই? এই পুরুষত্বহীনকে কোথা থেকে ধরে নিয়ে আসলে?” তখন ওরা দুইজন সামগুল আলমকে বললেন, “বাবাজানের পায়ে পড়।” তাদের কথা মতো তিনি পায়ের উপর তাজিম কররেন। এরপর বাবাজান তাকে প্রতি

সপ্তাহেই একদিন বাবাজানের দরবারে হাজিরা দিতে বললেন। পরবর্তীতে বাবাজানের দয়ায় তিনি পরিপূর্ণ সুস্থ হয়ে ৪/৫ সন্তানের বাবা হন।

বর্ণনাকারী :সামগুল আলম

গ্রাম : পাঠানদভী ,চন্দনাইশ।

ওয়ার্ডঃ ০৬

২৩.টিউমার বিলুপ্ত হয়ে যাওয়া

চন্দনাইশী বাবাজান জীবদ্দশায় থাকাকালীন সময়ে উনার মেজো ছেলে শাহজাদা সৈয়দ নজমুল আলমের সন্তান শাহজাদা কায়েমের বয়স যখন ২/৩ বছর ছিল। তখন শাহজাদা কায়েমের কণ্ঠনালীর এক পাশে একটি টিউমার হয়। টিউমার হওয়ার কিছুদিন পর শাহজাদা কায়েম এর মা চন্দনাইশী বাবাজানকে এসে বলেন, “আমার ছেলের কণ্ঠনালীতে টিউমার হয়েছে।” এ কথা বলার পর চন্দনাইশী বাবাজান উনার নাতি কায়েমকে ডেকে কণ্ঠনালীতে হাত বুলিয়ে দেন। এর কিছুদিন পর শাহজাদার কণ্ঠনালী থেকে টিউমার বিলুপ্ত হয়ে যায়।

বর্ণনাকারী : মোছাম্মৎ কামরুন নাহার।

২৪.গোলামীর মধ্য দিয়ে নতুন জীবন

১৯৭৫ ইংরেজীর ঘটনা। ফটিকছড়ি মাইজভান্ডারের পূর্ব দিকে আধার মানিক গ্রামে বাবাজানের কিছু সংখ্যক ভক্ত ছিলেন যে গ্রামে বাবাজানের যাতায়াত ছিল। ঐ গ্রামে আলী নামক একজন মানুষ বিয়ে করার পর যৌবন শক্তি

হারিয়ে ফেলেন। তখন তার স্ত্রী তার গৃহ ত্যাগ করে বাপের বাড়ি চলে যান। তখন আলীর বাবা বিভিন্ন ডাক্তার করিবাজ দ্বারা তাকে চিকিৎসা করানোর পরও কোনো ফল না পাওয়ায় নিরুপায় হয়ে তাকে বাবাজানের দরবারে সেবায় পাঠিয়ে দেন। প্রায় দুই বৎসর কাল বাবাজানের সেবা করে তার হারানো যৌবন পুনঃফিরে পায়। তারপর বাবাজানের কাছ থেকে বিদায় নিয়ে বাড়িতে গিয়ে পুনঃবিবাহ করে সুখের সংসার করতে শুরু করেন। আলী পরবর্তীতে সন্তান সন্ততির বাবা ও হন।

বর্ণনাকারীঃ আলী , গ্রামঃ আখার মানিক, ফটিকছড়ি, চট্টগ্রাম

২৫. “সামনে উপস্থিত থাকা সত্ত্বেও না চেনা”

বৈলতলী নিবাসী জনাব আব্দুল বারী মিস্ত্রি দরবারে আসেন (আসবাবপত্র বানানোর জন্য)। আব্দুল বারী মিস্ত্রি তখন বাবাজানকে পীর হিসেবে মানতেন না, তবে অনেক সম্মান করতেন। বাবাজানের অনেক কারামাত নিজ চোখে দর্শন করে তিনি বাবাজানকে মনে মনে মানতে শুরু করেন। ভক্তদের ভক্তি এবং আচার আচরণ দেখে আব্দুল বারী মিস্ত্রির এশক বাবাজানের প্রতি আরও উন্নত পর্যায়ে পৌঁছে এবং এক পর্যায়ে বাবাজানের ফয়েজ বরকতে ছাহেবে কাশফের ও অধিকারী হন। তিনি দরবারে আসলে খুব কম কথা বলতেন। শুধু বাবাজানের দিকে চেয়ে থাকতেন। বাবাজানের অন্য ভক্তরা ও তাকে বেশ ইজ্জত করতেন তার ছাহেবে হাল ও মকামের কারণে। বাবাজান ছাড়া তাঁর কোন কিছু ভাল লাগত না। ৭০ বছর বয়সে আব্দুল বারী মিস্ত্রি অসুস্থ হয়ে পড়েন। এত বেশি অসুস্থ হয়ে পড়েন যে দরবারে উপস্থিত হওয়া অসম্ভব হয়ে

ওঠে। তখন আব্দুল বারী মিস্ত্রি উনার নাতিকে বলেন, “তুমি দরবারে যাও এবং বাবাজানকে গিয়ে বল আমার নানা আপনাকে একটু দেখতে চাই।” তদানুযায়ী নাতি আব্দুল আজিজ চন্দনাইশ দরবারে আসেন। বাবাজানকে তাঁর বিষয়ে বিস্তারিত বলেন। উত্তরে বাবাজান বলেন, “তোমার নানাকে বলিও আমি ঐখানে আছি।” ঐদিন দরবারে ওরশ ও ছিল। রাতে বাবাজান আব্দুল বারী মিস্ত্রির নাতি আজিজকে ডাকলেন এবং তার হাতের মধ্যে অল্প তাবারুক দিয়ে বাবাজান আদেশ করলেন, “তোমার হাতের মধ্যে যে তাবারুকটা দিয়েছি ঐটা তোমার নানাকে খাইয়ে দিবে। তোমার নানা এই তাবারুক খাওয়ার কয়েক দিন পর এই দুনিয়া ছেড়ে চলে যাবে আর তোমরা সবাই এ কয়েকদিন উনার সেবা যত্ন করবে”। আব্দুল আজিজ তাবারুক নিয়ে বাবাজানের কাছ থেকে বিদায় গ্রহণ করে চলে যান। বাবাজান যেভাবে আব্দুল আজিজকে নির্দেশ দিয়েছেন সে মোতাবেক তা করেন। তার নানাজানকে বাবাজানের নির্দেশনার বিষয়ে হুবহু অবহিত করে। দেখা গেল তাবারুকটা খাওয়ার দুইদিন পর আব্দুল বারী মিস্ত্রি পৃথিবী থেকে শেষ নিশ্বাস ত্যাগ করেন। মৃত্যুর আগে আব্দুল বারী আব্দুল বারী মিস্ত্রি উনার নাতিকে বলে যান যে, “আমার জানাযার নামাজ আমার বাবাজান পড়াবেন।” উনার নাতি উনার নানাজানের কথা মতো দরবারে আসেন এবং বাবাজানকে বলেন, “আমার নানা আপনাকে জানাযা পড়ানোর জন্য বিশেষ ভাবে আরজি পেশ করেছেন।” এই কথা শোনার পর বাবাজান আব্দুল বারী মিস্ত্রির নাতিকে বলেন, “আমি তো একজন আলেম পাঠিয়ে দিয়েছি, তুমি চলে যাও। চন্দনাইশ বাগিচা হাটে সে তোমাকে খুঁজে নিবে”। এই কথা শুনে আজিজ চন্দনাইশ বাগিচা হাটে এসে দাঁড়ায়। হঠাৎ একজন অপরিচিত আলেম এসে বললেন, তুমি কী আজিজ?” উত্তরে আজিজ বললেন, “হ্যাঁ।” একটা রিকশা করে উভয়ই আব্দুল বারী মিস্ত্রির বাড়িতে যান এবং ঐ আলেমের ইমামতিতে আবদুল বারি মিস্ত্রির জানাযার নামাজ শেষ করেন। জানাজার পর আজিজ সহ চন্দনাইশ দরবারের অন্য ভক্তবৃন্দ ঐ আলেমকে নজরানা প্রদান করতে গেলে তিনি হঠাৎ অদৃশ্য হয়ে যায়। তখন

তারা সকলে বুঝতে পারেন যে, ঐ আলেমটা কে ছিলেন। স্বয়ং চন্দনাইশী বাবাজান জানাযায় উপস্থিত থেকেই নিজেই জানাযার নামাজের ইমামতি করেছেন। তারা আর কোনদিন ঐ আলেমের দেখা পায়নি। এই বিষয়ে পরবর্তীতে দরবারে এসে বাবাজানের কাছে ঘটনাটি বর্ণনা করলে বাবাজান মুচকি হাসলেন। আর কোন কিছু বললেন না।

বর্ণনাকারীঃ- আজিজ, বৈলতলি, চন্দনাইশ।

২৬. নদীর গতি পরিবর্তন

সে চন্দনাইশ বৈলতলী নিবাসী বাবাজানের ভক্ত জনাব আব্দুল বারী মিস্ত্রি যখন পৃথিবী ছেড়ে চলে যান, তখন উনার মাজার তৈরি করা হয়। উনার মাজার শরীফ এর অবস্থান শংখ নদীর পাড়ে। শংখ নদী ভাগতে ভাগতে মাজারের কিনারায় চলে আসে। মাজারের এই অবস্থা দেখে, আব্দুল বারী মিস্ত্রির নাতি আজিজ দরবারে আসেন এবং বাবাজানকে বলেন, “আমার নানার মাজার রক্ষা করতে হবে।” বাবাজান কয়েক দিনের মধ্যে কয়েক জন আশেকদের নিয়ে শংখ নদীর কিনারে যান। ভক্ত আব্দুল বারী মিস্ত্রির মাজারের পাশে কিছু সময় অতিবাহিত করেন। বাবাজান যেখানে দাড়িয়ে ছিলেন সেখান পর্যন্ত এসে নদীর ভাংগন বন্ধ হয়ে যায়। আজিজ বাবাজান এর হুকুম মতো গরু হাদিয়া আদায় করেন। বাবাজান বেলায়তি শক্তির মধ্য দিয়ে আব্দুল বারী মিস্ত্রির মাজার রক্ষা করেন এবং নদীর ভাংগনের গতি পরিবর্তন করে দেন। বর্তমানে ও নদীর সেই গতি একই অবস্থায় বিদ্যমান যা বাবাজান করে গিয়েছিলেন।

বর্ণনাকারীঃ- আজিজ।

গ্রামঃ- বৈলতলি

ওয়ার্ডঃ-০৩

২৭. আশেকের রুহানী জগতে ছায়ের ও মৃত্যুর সময় স্বশরীরে উপস্থিতি

চন্দনাইশী বাবাজানের জামাতা কাজী মোহাম্মদ আবদুল মালেক বাবাজানের খুব স্নেহধন্য ছিলেন। তিনি ছাহেবে হালের একজন। তিনি এত আশেক ছিলেন যে একদিন চন্দনাইশী বাবাজান জামাতা আবদুল মালেককে রুহানী জগৎ ছায়ের করান। আবদুল মালেক রুহানী জগৎ ছায়ের করার পর থেকে পৃথিবীর মোহ মায়া ত্যাগ করেন। তখন ধীরে ধীরে আবদুল মালেক অসুস্থ হয়ে পড়েন। একদিন আবদুল মালেক চন্দনাইশী বাবাজানকে বলেন, “আপনি আমাকে একটা বিষয়ের ব্যাপারে ওয়াদা করেন।” তখন চন্দনাইশী বাবাজান জিজ্ঞেস করলেন, “কি ওয়াদা?” আবদুল মালেক বললেন, “আপনি আমাকে যে স্থরে নিয়ে গেছেন। ঐ স্থর থেকে আমি আর ফিরে আসতে চাই না।” চন্দনাইশী বাবাজান অনেকক্ষণ চুপ থাকার পর বললেন, ঠিক আছে। কিন্তু আবদুল মালেক পৃথিবীতে আর থাকতে চান না। এর কিছুদিন পর আবদুল মালেক বলেন, “আমি অন্য দেশে চলে যাব (এ কথার দ্বারা বুঝায় আবদুল মালেক পৃথিবী ছেড়ে চলে যাবেন)।” আবদুল মালেক কোনদিন চলে যাবেন তা সবাইকে বলে দেন। আবদুল মালেক যে দিনটির কথা উল্লেখ করেছিলেন ঐদিন সকালে আবদুল মালেক খাটের মধ্যে শুয়ে পড়েন। যখন সকাল ১১.০০ ঘটিকা হয় তখন আবদুল মালেক বলেন, “আমি ট্রেনে উঠেছি।” তখন উনার আশে পাশে যারা বসেছিলেন তারা সবাই বুঝতে পারলেন যে আবদুল মালেক শেষ নিশ্বাস ত্যাগ করতেছেন। তখন আব্দুল মালেক সরাসরি বলছেন উনার মুর্শিদ চন্দনাইশী বাবাজান (ক:) উনার সামনে। এরপর তিনি কলেমা পড়ে পৃথিবী থেকে শেষ নিঃশ্বাস ত্যাগ করলেন। অনুরূপ ঘটনা কাজী মোহাম্মদ

আবদুল মালেকের ভাই কাজী মোহাম্মদ আবু ছালেহের ছাকারাতের সময়ে ঘটে। আবু ছালেহের শেষ নিশ্বাস ত্যাগ করার পূর্বে উনার আত্মীয় স্বজন যখন উনার সামনে বসা ছিলেন তখন আবু ছালেহ বললেন চন্দনাইশী বাবাজান (ক:) আমার সামনে। তিনি আমাকে অভয় দিতে এসেছেন। এরূপ বলার ৫ মিনিট পর আবু ছালেহ কলেমা পড়তে পড়তে ইনতিকাল করেন। অথচ সে মুহুর্তে চন্দনাইশী বাবাজান (ক:) উনার আরেক আশেক ভক্ত ০৭ মাইল দূরবর্তী জনাব ওসমান গনির বাসা অবস্থান করছেন আর উনার সাথে ছিলেন চন্দনাইশী বাবাজানের ছোট ছেলে শাহজাদা সৈয়দ মুহাম্মদ মকছুদুল আলম এবং বাবাজানের বেশ কয়েকজন মুরিদ যারা প্রত্যক্ষভাবে বাবাজানকে বলতে শুনেছেন যে, আমার আবু ছালেহ এই পৃথিবী ছেড়ে চলে গিয়েছেন।

বর্ণনাকারী : ছোট শাহজাদা সৈয়দ মুহাম্মদ মকছুদুল আলম।

২৮. ফইত্তবর পুকুর দরগাহ

চন্দনাইশী বাবাজানের সেই আশেক ভক্ত আবদুল বারি মিস্ত্রির বিশেষ অনুরোধে চন্দনাইশী বাবাজান (ক:) উনার বাড়ি চন্দনাইশের বৈলতলীতে দাওয়াত খেতে যান। চন্দনাইশী বাবাজান উনার ভক্তবৃন্দ নিয়ে আবদুল বারির বাড়িতে যান। রাতে খাওয়া দাওয়া শেষ করতে করতে ১২ টা বেজে যায়। খাওয়া দাওয়া শেষে চলে আসার সময় চন্দনাইশী বাবাজান বৈলতলী জাফরাবাদ এলাকায় একটি বেত ঝাড়ের কাছে এসে উনার এক ভক্ত জামালকে বললেন, “তুমি বেত ঝাড়ের কাছে যাও। ঐখানে একটি মোমবাতি জ্বালিয়ে দাও এবং গিয়ে বলবে, অনেকদিন ঘুমিয়েছেন আর ঘুমাতে হবে না, এবার উঠে যান।” মোমবাতি জ্বালানোর পর ঐ জায়গার তোফর আলী শাহ নামক এক অলি আল্লাহর সাথে স্বপ্নযোগে অনেক মানুষের সাথে দেখা হয়। এরপর আস্তে আস্তে ঐ জায়গায় তোফর আলী শাহ নামক এক অলি আল্লাহর

মাজার প্রকাশিত হয়। বর্তমানে ঐ জায়গাটি “ফইত্তবর পুকুর দরগাহ” নামে পরিচিত। উক্ত দরগাহ চন্দনাইশী বাবাজান (ক:) এর বেলায়তি চক্ষুর বহিঃপ্রকাশ।

বর্ণনাকারীঃ- খালেকুজ্জান পিতাঃ-ছাবেত আলী।

গ্রামঃ- জাফরাবাদ ইউনিয়ন, চন্দনাইশ, চট্টগ্রাম।

২৯. বাংলাদেশ স্বাধীনের ভবিষ্যত বানী

১৯৭১ সাল, জনাব সিরাজুল ইসলাম (চন্দনাইশের বাংলাবাজারে) একটা সরকারি সেচ প্রকল্পে চাকরি করতেন। ঐ সময়েই দেশে যুদ্ধ শুরু হয় তখনও তিনি তাঁর অফিসে অবস্থান করছিলেন। অফিস থেকেই তিনি প্রতিদিন পাকিস্তানিদের গোলাগুলি শুনতেন এবং তাদের অরাজকতা দেখতেন। তা দেখে থাকতে না পেরে তিনি চাকরি ত্যাগ করে পাকিস্তানিদের বিরুদ্ধে যুদ্ধে যোগ দেন। তিনি চট্টগ্রামের কালুরঘাটে কিছুদিন যুদ্ধ করার পর বাড়িতে আসেন। একদিন সকাল দশটার সময় মিজির দোকানের একটা দোকানে বসে তিনি চা পান করছিলেন, ঐ সময় দোকানে চন্দনাইশী বাবাজানের মেঝে সন্তান শাহজাদা সৈয়দ নাজমুল আলম শাহ (রা:) ও ছিলেন। শাহজাদা সৈয়দ নাজমুল আলম শাহ দোকান থেকে চলে আসার সময় সিরাজুল ইসলামের উদ্দেশ্যে বললেন, “আসো, চলে যাই।” জবাবে সিরাজুল ইসলাম বললেন, “আমাকে একজন কিছু টাকা দিতে আসবে, ওগুলো নিয়েই আমি চলে আসবো।” তা শুনে মেজ শাহজাদা দোকান থেকে চলে আসলেন। তৎকালীন সময়ে চন্দনাইশে হাজির পাড়ার কিছু লোক রাজাকার ছিলেন। তারা সিরাজুল ইসলামের খবর পাকিস্তানি সেনাদের জানিয়ে দেন। তা জানতে পেরে পাকিস্তানিরা চায়ের দোকানে হামলা চালায় এবং সিরাজুল ইসলামের দিকে

অস্ত্র তাক করে। সিরাজুল ইসলাম বাঁচার কোন উপায় না পেয়ে চন্দনাইশী বাবাজানকে (ক:) স্বরন করেন এবং দোকানের শিকবিহীন জানালা দিয়ে দোকানের পিছনে লাফ দেন। দোকানের পিছনে ছিলো পুকুর যা বেত ঝাড়ে ছিলো ভর্তি। যার কারনে সিরাজুল ইসলামের সারা শরীর কেঁটে ছিড়ে যায়। পাকিস্তানিরা সিরাজুল ইসলামকে অনেক্ষন গুলি করে। কিন্তু কোন হৃদিস করতে না পারায় সৈন্যরা চলে যায় এবং সিরাজুল ইসলাম ওই যাত্রায় বেঁচে যান। এর কিছুদিন পর সিরাজুল ইসলাম অস্ত্রসহ চন্দনাইশী বাবাজানের সাথে দেখা করতে আসেন। তখন চন্দনাইশী বাবাজান হুজরা শরিফের সামনে পায়চারি করছিলেন। ঐ সময় সিরাজুল ইসলামকে দেখে চন্দনাইশী বাবাজান বলে উঠলেন, “তুমি যুদ্ধে যাও। ভয় পেয়ো না, বাংলাদেশ স্বাধীন হবে।” তা শুনে সিরাজুল ইসলামের মনে স্বস্তি ফিরে আসে এবং পরে আবারও যুদ্ধে যোগ দেন। দেখা গেল চন্দনাইশী বাবাজান (ক:) এর কথাই সঠিক হলো। মাত্র ০৯ মাসেই বাংলাদেশ স্বাধীন হয়ে যায়।

বর্ণনাকারী : মুক্তিযোদ্ধা সিরাজুল ইসলাম

গ্রাম : মির্জার দোকান ৭নং ওয়ার্ড, চন্দনাইশ পৌরসভা, চট্টগ্রাম।

৩০.ভক্তের আর্জি পূরণ

ফাতেহ পুরী শাহ বাবাজানের ভক্ত আব্দুল আজিজ এর বিশেষ আমন্ত্রণে বাবাজান চন্দনাইশ ধোপাছড়িতে উনার বাড়িতে যান। ৭ই আশ্বিন আব্দুল আজিজের বাড়িতে ওরশ হতো। ওরশটি ছিল হযরত বাচা শাহ (ফাতেহ পুরী শাহ বাবাজান) এর। আজিজ ওরশ উপলক্ষে একটি গরু জবেহ করেন।

ওখানে ফাতেহ পুরী শাহ এর ভক্তবৃন্দও ছিলেন। যখন গরুর চামড়া আলাদা করা হচ্ছিল, ঐ সময় আকাশ অনেক মেঘাচ্ছন্ন হয়ে যায়। এই অবস্থা দেখে আব্দুল আজিজ চন্দনাইশী বাবাজানকে বললেন, “বাবাজান বৃষ্টি হতে পারে মনে হয়।” আব্দুল আজিজের এই কথা শুনে ফাতেহ পুরী সাহেবের ভক্তবৃন্দের মধ্যে একজন বললেন, “বৃষ্টি আমি বন্ধ করে দিয়েছি, বৃষ্টি আর হবে না।” এ কথা শোনার পর চন্দনাইশী বাবাজান খুবই পেরেশান হয়ে যান। কারণ যার মুখ যত বড় নয় তার মুখে অত বড় কথা বলা বাবাজান পছন্দ করতেন না। তাই বাবাজান আব্দুল আজিজ এর বাড়ি থেকে বের হয়ে আরেক ভক্ত কালা মিয়ার বাপের বাড়িতে চলে যান। কালা মিয়ার বাপের বাড়িতে প্রবেশ করার পর মুখলধারে বৃষ্টি শুরু হয়ে যায়। যখন বৃষ্টি শুরু হয় তখন আব্দুল আজিজ চন্দনাইশী বাবাজানকে তার বাড়িতে খুঁজে না পেয়ে অস্থির হয়ে পড়েন। পরে আব্দুল আজিজ শুনলেন যে, বাবাজান কালা মিয়ার বাপের বাড়িতে আছেন। তখন ওখানে গিয়ে আব্দুল আজিজ বিনয়ের সুরে বাবাজানকে বললেন, বৃষ্টির মধ্যে এত বড় আয়োজন পন্ড হয়ে যাবে। তখন বাবাজান বললেন, “তুমি চলে যাও বৃষ্টি বন্ধ হয়ে যাবে।” আব্দুল আজিজ কালা মিয়ার বাপের বাড়ির সামনে থেকে আসতে না আসতে বৃষ্টি বন্ধ হয়ে যায়। বৃষ্টি বন্ধ হয়ে যাওয়া দেখে আব্দুল আজিজ বাবাজানকে তাজীম করেন। তারপর আকাশ আগের মতো পরিষ্কার হয়ে যায়। চন্দনাইশী বাবাজানের বেলায়তি কৃপায় ঐদিন মহাসমারোহে ওরশ সম্পন্ন হয় এবং কাউকে কোন ধরনের সমস্যায় পড়তে হয়নি। ছেমা মাহফিলের পর বাবাজান সবাইকে ইশারা দিয়ে বুঝিয়ে দিয়েছেন যে, যার মকাম যত বড় নয় তার মুখে লাগামহীন কথা বলাটা খোদার বিরুদ্ধাচারণ। যে কেউ চাইলে প্রকৃতির উপর প্রভাব বিস্তার করতে পারেনা।

বর্ণনাকারীর নামঃ শফি পিতা মনিরুজ্জামান, ধোপাছড়ি, চন্দনাইশ, চট্টগ্রাম।

৩১.বৃষ্টিহীন জানাযার নামাজ

চরণদ্বীপ দরবার শরীফের খলিফা হযরত মুয়াজ্জিন শাহ (রাহ:) প্রায় সময় চন্দনাইশ দরবারে আসতেন। একদিন মুয়াজ্জিন শাহ (রাহ:) চন্দনাইশী বাবাজানকে বললেন যে, “আপনাকে আমার জানাযার নামাজের ইমামতি করতে হবে।” একথা বলার কিছুদিন পরই মুয়াজ্জিন শাহ (রাহ:) দুনিয়া থেকে পর্দা নেন। মুয়াজ্জিন শাহের ওসিয়ত অনুযায়ী একজন ব্যক্তি চন্দনাইশী বাবাজানকে নিতে আসেন। সময়টা তখন বর্ষাকাল ছিল। ঐ সময় মুষলধারে বৃষ্টি ও হচ্ছিল। আগন্তুক ব্যক্তি চিন্তা করতে লাগলেন যে কিভাবে চন্দনাইশী বাবাজান মুষলধারে বৃষ্টির মধ্যে বের হবেন। ঐ ব্যক্তিকে চন্দনাইশী বাবাজান বললেন, “তুমি একটা রিক্সা নিয়ে আসো।” তখন চন্দনাইশী বাবাজান হুজুরা শরীফ থেকে বের হয়ে তিনবার পাঁয়চারী করলেন। সাথে সাথে বৃষ্টি বন্ধ হয়ে যায়। বৃষ্টি বন্ধ হতেই চন্দনাইশী বাবাজান রিক্সা চড়ে মুয়াজ্জিন শাহের জানাযায় গিয়ে উপস্থিত হয়ে জানাযার নামাজের ইমামতির মাধ্যমে জানাযা সম্পন্ন করেন। চন্দনাইশী বাবাজানের বিশেষ নজরে দাফন কার্য সম্পন্ন হওয়ার পূর্ব পর্যন্ত আর কোন বৃষ্টি হয় নাই এবং পুরোদিন বৃষ্টিহীন ছিল।

বর্ণনাকারী : মোহাম্মদ শফী কাওয়াল

ঠিকানা :- ইউছুপ তালুকদারের বাড়ি, সাতবাড়িয়া বহরম পাড়া, ২ নং ওয়ার্ড, চন্দনাইশ, চট্টগ্রাম।

৩২.“যুদ্ধ সম্পর্কে ভবিষ্যতবার্ণী(১৯৭১)”

চন্দনাইশী বাবাজান একদিন গাছবাড়ীয়া খাঁনহাট বাজারে আসেন। বাজার শেষ করে চন্দনাইশী বাবাজান রিকশায় করে বাড়িতে যাচ্ছিলেন। রিকশা করে বাবাজান যখন আরকান সড়ক অতিক্রম করেছিলেন, তখন ঐ রাস্তা দিয়ে পাকিস্তানি মিলিটারিদের গাড়ি আসছিল ২৫-৩০ টি। তাদের গাড়িগুলো যাওয়ার জন্য বাবাজানের রিকশা প্রদান সড়ক থেকে সরে যাওয়ার কথা। কিন্তু বাবাজান রিকশার চালককে সরাসরি অগ্রসর হতে নির্দেশ দেন। বরং পাকিস্তানি মিলিটারির গাড়ি প্রদান সড়ক থেকে সরে বাবাজানের রিকশা কে সাইড দিয়ে রাস্তার পাশ দিয়ে যায়। তখন চন্দনাইশী বাবাজান সেই রিকশা বসা ছিলেন। বাবাজান নিজ দরবারে এসে পৌছলে জনৈক রিকশা চালক গাড়ি থেকে নেমে দাঁড়ান এবং চন্দনাইশী বাবাজানকে বললেন, “পাকিস্তানি মিলিটারিদের গাড়ি দেখে আমার জান যায় যায় অবস্থা।” তখন চন্দনাইশী বাবাজান বললেন, “ওদেরকে রাস্তা হতে নামিয়ে দিয়েছি।” (উক্ত কালাম দ্বারা বুঝায়-পাকিস্তানি বাহিনীদের পরাজয়ের লক্ষণ)। এ ছাড়া যুদ্ধ চলাকালীন অনেক ভক্তবৃন্দরা চন্দনাইশী বাবাজানের দরবারে আশ্রয় গ্রহণ করেন। ডঃ বাবাজানের আশেক শামসুল হক স্ব-পরিবারে দরবারে ছিলেন। একদিন বিকালে ডঃ শামসুল হক চন্দনাইশী বাবাজানকে জিজ্ঞেস করেন, বাবাজান “বাংলাদেশ কী স্বাধীন হবে?” উত্তরে চন্দনাইশী বাবাজান বললেন, “বাঙালিরা কিছু মানুষের ওপর অত্যাচার-অনাচার করেছিল।” মানুষগুলো ছিল বিহারী ও মূন্সায়ী। (ব্যবসায়িক কাজে এসেছিল) বাঙালিরা ওদেরকে মেরে সমুদ্রে ভাসিয়ে দিয়েছিলো। বাঙালিদের পাপের প্রায়শ্চিত্ত হয়ে গেলে আগামী ৮-৯ মাসের মধ্যে দেশ স্বাধীন হয়ে যাবে। যুদ্ধ চলাকালীন সময়ে যখন চন্দনাইশী বাবাজানের দরবারে ভক্তবৃন্দের সংখ্যা বেড়ে যায় তখন বাবাজান উনার এক ভক্তকে আদেশ করেন, “তুমি শহরে গিয়ে চালের বস্তা নিয়ে আসো।”

বাবাজানের হুকুম মতো পেছু মিয়া নামক জনৈক আশেক শহরে যান। শহর থেকে আসার পথে এক জায়গায় পাকিস্তানি বাহিনীরা অনবরত গুলি বর্ষণ করতে শুরু করে। গুলি বর্ষণের কারণে অনেক মানুষ নিহত হন। বাবাজানের কৃপায় পেছু মিয়ার গায়ে গুলি না লেগে কাপড় ছেদ করে গুলি বের হয়ে যায়। পেছু মিয়া অনেক কষ্টে দরবারে চলে আসেন। বাবাজান গভীর রাতে পেছু মিয়াকে জিজ্ঞেস করলেন, “তুমি কী ভয় পেয়েছিলে?” উত্তরে তিনি বললেন, “আমি মনে মনে আপনাকে স্বরণ করেছিলাম।” বাবাজান বললেন পাকিস্তানিরা আর এ দেশে থাকতে পারবেনা। দেখাগেল দ্রুত বাংলাদেশ স্বাধীন হয়ে গেলো।

বর্ণনাকারী : পেছু মিয়া

বাসা : পাঠান টুলী রোড, নাজিরপুর, ২৮নং ওয়ার্ড, চট্টগ্রাম।

৩৩. হুকুম নল দিয়ে প্রহার

চন্দনাইশী বাবাজান জীবদ্দশায় থাকতে দরবারে সবসময় চেমা মাহফিল হতো। একদিন রাতে দায়রা ঘরের মধ্যে ছেমা মাহফিল চলছিল। ঐ সময় চন্দনাইশী বাবাজান দায়রা ঘরে আসন শরীফে বসা অবস্থায় ছিলেন এবং দায়রা ঘরের আগুিনায় চন্দনাইশী বাবাজানের ছোট ছেলে “শাহাজাদা হৈয়দ মুকছুদুল আলম ” বসা অবস্থায় ছিলেন। চেমা মাহফিলে বানু ফকির, জামাল ফকিরসহ আরো অন্যান্য ভক্তবৃন্দ ছিলেন। তখন ওদের মনোযোগ ছেমা মাহফিলে ছিলনা। সেই সময় বাবাজান হুকুম গ্রহণ করছিলেন। ওদের অমনোযোগী অবস্থা দেখে চন্দনাইশী বাবাজান জজবা হালে গিয়ে হুকুম নল দিয়ে বানু ফকির, জামাল ফকির সহ আরো অন্যান্য ভক্ত বৃন্দের মারতে শুরু করেন। বাবাজান যখন তাদের প্রহার করেন তখন বাবাজানের পা মোবারকদয়

ছিল শূন্যের উপর উড়ন্ত অবস্থা। ঐ অবস্থা দেখে চন্দনাইশী বাবাজানের ছোট ছেলে ঐখান থেকে সরে যান। যখন ওদের মনোযোগ মাহফিলে ফিরে আসে, তখন চন্দনাইশী বাবাজান আসনে বসে যান। তখন সবাই ছেমা মাহফিলে পুনরায় মনোযোগ দেন। ছেমা মাহফিল শেষ হলে বাবাজান বললেন, ছেমার সময় অন্য মনস্ক থাকলে খোদার রহমত থেকে বঞ্চিত হয়। ছেমার সময় অন্য মনস্ক থাকা উচিত নয়, বরং খোদার প্রতি একাগ্রহচিত্ত থাকা উচিত।

**বর্ণনাকারী : ছাদেক হোসেন, পিতা: বদি আলম চৌধুরী,
ঠিকানা :- লালির বাপের বাড়ি, ৭ নং ওয়ার্ড, চন্দনাইশ, চট্টগ্রাম।**

৩৪. মোমের আলো

বাবাজান একবার ফকির খিল হয়ে চন্দনাইশ ধোপাছড়ি যাত্রা করেন। তিনি চকিদার বাড়ি পার হয়ে তিন মাইল দূরে শিলঘাটা গিয়ে একটি বৃক্ষের নিচে কিছুক্ষণ বসে বিশ্রাম নেন। বিশ্রাম নেওয়ার সময় বাবাজান বললেন, “এখানে একটি রাস্তা হবে।” (বর্তমানে রাস্তাটি বিদ্যমান)। বিশ্রাম শেষে ধোপাছড়ি বাজারে গিয়ে বাজারের একটি জায়গায় দেখিয়ে বলেন যে, সেখানে সোলায়মান নামক একজন আল্লাহর অলি আছেন। আব্দুল আজিজ নামক জনৈক আশেকের ছেলে জুলফিকারকে সেখানে একটি বড় মোমবাতি জ্বালাতে আদেশ করলেন। জুলফিকার তা পালন করেন। সেখান থেকে আজিজ সাহেবের ঘরে গিয়ে আজিজ সাহেবকে বলেন, “ধোপাছড়ি বাজারের একটি জায়গায় আমি জুলফিকারকে মোমবাতি জ্বালানোর জন্য আদেশ করেছি। ঐ জায়গায় সোলায়মান শাহের মাজার হবে। তুমি প্রতি বছর ঐ মাজারে ওরশ পালন করবে।” বাবাজান আধ্যাত্মিক চক্ষু দিয়ে কবরে শায়িত সোলায়মান শাহকে দেখে ছিলেন বিধায় তিনি এ নির্দেশ দিয়েছিলেন। বর্তমানে সেখানে রীতিমতো জাকজমক ভাবে ওরশ হয়।

বর্ণনাকারীঃ- আবদুল আজিজ
গ্রামঃ-ধোপাছড়ি

৩৫. গলা ব্যথা থেকে মুক্তিদান

চন্দনাইশী বাবাজান জীবদ্দশায় থাকাকালীন সময়ে উনার মেজো ছেলে শাহজাদা সৈয়দ নজমুল আলম শাহ (রাহ:) এর স্ত্রী মোহাম্মৎ কামরুন্নাহার এর কণ্ঠনালী ফুলে যায়। কণ্ঠনালী ফুলে যাওয়ার কারণে উনার গলা ব্যথা শুরু হয়। যার কারণে তিনি অনেক কষ্ট পাচ্ছিলেন। তিনি বাবাজানকে গিয়ে বলেন, “কণ্ঠনালী ফুলে যাওয়ার কারণে আমি অনেক বেশি কষ্ট পাচ্ছি।” তখন চন্দনাইশী বাবাজান কামরুন নাহারের কণ্ঠনালীর উপর হাত বুলিয়ে দেন। বাবাজানের বিশেষ কৃপায় কণ্ঠনালী ফুলা কমে যায় এবং ব্যথা উপশম হয়। এরপর থেকে কামরুন্নাহার গলা ব্যথা থেকে মুক্তি পান এবং সুস্থ হয়ে যান।

বর্ণনাকারীঃ মোহাম্মৎ কামরুন নাহার।

৩৬. “রোগ থেকে মুক্তিদান”

১৯৭৭ সালের কানাইমাদারী নিবাসী বাবাজানের ভক্ত জনাব কাসেম এর ছোট বোনের বিবাহ হয়। বিবাহের কয়েক বছর পর তিনি অসুস্থ হয়ে পড়েন। উনার স্বামী উনাকে অনেক ডাক্তার এবং কবিরাজ দেখান। উনি কোনো ভাবেই সুস্থ হচ্ছেন না। উনি সুস্থ হচ্ছেন না তাই উনার স্বামী উনার ওপর রাগান্বিত হয়ে বাপের বাড়ি পাঠিয়ে দেন। তখন উনি এতবেশি অসুস্থ ছিলেন যে, উনি হাঁটতে পারতেন না। দুইজন ব্যক্তি ধরে উঠাতেন - বসাতেন। এই অবস্থা দেখে

কাসেম ও তার মা, কাসেম এর বোনকে দোলনায় করে মহাজান ঘাটা পর্যন্ত নিয়ে আসেন। ঐখান থেকে কষ্ট করে রিকশায় করে দরবারে আসেন। দরবারে এসে কাশেম এবং তার মা বাবাজানের সাথে কথোপকথন করেন। কাসেম এর মা বাবাজানকে বলেন, “আমার মেয়ে খুবই অসুস্থ। তাই আমার মেয়ের স্বামী মেয়েকে আমার বাড়িতে পাঠিয়ে দিয়েছেন। তাই আপনার নিকট আর্জি, আমার মেয়েকে সুস্থ করে দিতে হবে।” বাবাজান কাসেম এর বোনকে কিছু মিষ্টি খেতে দেন। মিষ্টি খাওয়ার পর কাসেম এর বোন আস্তে আস্তে সুস্থ হয়ে যান। এরপর কাসেম এর বোন দরবার থেকে হেঁটে সুস্থ অবস্থায় বাড়িতে চলে আসেন।

বর্ণনাকারীঃ নূরনাহার

গ্রাম : নজড় মোহাম্মদ চৌধুরি বাড়ি, ৫নং
ওয়ার্ড, কানাইমাদারি, চন্দনাইশ, চট্টগ্রাম।

৩৭. বাবাজানের কালামের বাস্তব রূপ

মাইজভান্ডারী এক ভক্ত যার নাম ছিল আব্দুল বারী এবং বাড়ি ছিল চন্দনাইশ হাশিমপুর। তিনি সব সময় চন্দনাইশী বাবাজানের নিকট আসা-যাওয়া করতেন। তিনি যখন অসুস্থ হয়ে পড়েন তখন অসুস্থ অবস্থায় একদিন দরবারে আসেন এবং বাবাজানকে ওয়াদা করান যে, তাঁর জানাযার নামাজের ইমামতি বাবাজানকে করতে হবে। এ কথা বলার পর তিনি বাড়িতে চলে যান। এর কিছু দিন পর আব্দুল বারী মারা যান। মারা যাওয়ার পূর্ব মুহূর্তে উনার বড় ছেলে কাশেমকে ওসিয়ত করেন “আমার জানাযার ইমামতি চন্দনাইশী বাবাজান করবেন।” যখন আব্দুল বারী মৃত্যু বরণ করেন তখন উনার বড় ছেলে কাশেম চন্দনাইশী বাবাজানকে নিয়ে যাওয়ার জন্য দুইজন ব্যক্তি পাঠান। চন্দনাইশী বাবাজান জানাযায় পৌঁছানোর পূর্বেই আব্দুল বারীর অন্য ছেলে (মেঝ ও ছোট) অন্য ইমাম দ্বারা জানাযার নামাজ সম্পন্ন করে

ফেলেন। তখন চন্দনাইশী বাবাজান জানাযার স্থানে পৌঁছে কালাম করলেন, “আজ থেকে এই এলাকায় প্রত্যেক ঘরে ঘরে ভান্ডারী হবে।” এর পর হতেই এলাকাটি ভান্ডারী পাড়া নামে পরিচিত লাভ করে।

বর্ণনাকারী : কবির আহমদ পিতা ইয়াকুব আলী।

গ্রামঃ সাতবাড়িয়া বহরম পাড়া, মাঝীর পাড়া (প্রকাশ নয়্য পাড়া)

চন্দনাইশ, চট্টগ্রাম।

৩৮. কবরস্থানের উপর মাজার

ধোপাছড়ি নিবাসী বাবাজানের আশেক জনাব মনিরুজ্জামান একদিন চন্দনাইশী বাবাজানের সাথে কাঞ্চননগর মুন্সিবাড়ি নিবাসী বাবভান্ডারীর কেবলা কাবার(ক:) আশেক জনাব তাহালেজ চৌধুরী মাইজভান্ডারী (রাহ:) এর দাওয়াত রাখতেই উনার বাড়িতে যান। সেখানে খাওয়া-দাওয়ার পর জিকির মাহফিল অনুষ্ঠিত হয়। অনুষ্ঠান শেষে বাবাজান মনিরুজ্জামানের সাথে নিজ দরবারের উদ্দেশ্যে যাত্রা করেন। কিছু দূর এসে কাঞ্চননগর বাদামতলী সংলগ্ন উত্তর পার্শ্বস্থ “একুল্যা” নামক গোরস্থানে এসে চন্দনাইশী বাবাজান দাঁড়িয়ে পড়েন। বাবাজান মনিরুজ্জামানকে পাশের বাঁশঝাড় থেকে একটি কঞ্চি বাশের সরু ডাল নিয়ে আসতে বললেন। বাবাজান মনিরুজ্জামানকে আদেশ করেন, “তুমি কবরস্থানের এই স্থানে কঞ্চি দিয়ে তিনটা আঘাত করো।” বাবাজানের হুকুম মতো মনিরুজ্জামান ঐ জায়গায় তিনটা আঘাত করেন। আঘাত করার পর মনিরুজ্জামান বাবাজানকে জিজ্ঞেস করলেন, “ঐখানে আঘাত করার কারণটা কি?” উত্তরে বাবাজান বললেন, “ঐখানে এক জন আল্লাহর অলি আছেন। তাই উনাকে উঠিয়ে দিলাম।” বাবাজান ঐ মুহূর্তে কালাম করেন, “মাইজভান্ডারী যুগে কোন আউলিয়া লুকায়িত থাকতে পারবেন না, সবাই উঠে যাবেন।” কিছু দিন পর ঐ জায়গায় একটি মাজার হয়। ঐ মাজারের নাম

“শাহ সুফী সৈয়দ আমিন উল্লাহ শাহের (রাহ:) মাজার যা বাবাজান তার আধ্যাত্মিক চোখ দিয়ে দেখেছিলেন বিধায় উক্ত আল্লাহর অলী আর গোপনে থাকতে পারেন নাই।

বর্ণনাকারীঃ- মনিরুজ্জামান।

গ্রামঃ- ধোপাছড়ি, চন্দনাইশ, চট্টগ্রাম।

৩৯. “পাগলের স্মৃতি”

চন্দনাইশী বাবাজানের আশেক জনাব আহমদ উল্লাহ ফকির (মনজুরের বাপ) এক সময় মির্জাখীল দরবারের ভক্ত ছিলেন। হঠাৎ একসময় তিনি পাগল হয়ে যান। উনার পীর আবদুল ওয়াহাব সাহেব উনাকে মির্জাখীল দরবারে নিয়ে যান। প্রায় ৯ মাস থাকার পরও সেখানে তিনি ভালো হননি। তখন তার মরণাপন্ন অবস্থা হয়ে গিয়েছিলো। মির্জাখীল দরবারের পাশে চন্দনাইশী বাবাজানের এক ভক্ত ছিলেন। তিনি আহমদ উল্লাহকে বললেন, “তোমার এলাকায় তোমাকে ভালো করার মানুষ আছে। তুমি এখানে কেন এসেছো?” তখন আহমদ উল্লাহ বলল, “কে?” উত্তরে উনি বললেন, “চন্দনাইশী বাবাজান।” একথা শুন্যর পর আহমদ উল্লাহ অনেক কষ্ট করে মজনু অবস্থায় নিজ বাড়ীতে ফিরে আসেন। বাড়িতে এসে অনেক চিকিৎসা করা হলেও ভালো হয়নি। একদিন এক ব্যক্তি আহমদ উল্লাহকে বললেন, “তুমি চন্দনাইশ দরবারে যাও ভালো হয়ে যাবে।” তখন আহমদ উল্লাহ’র মির্জাখীল নিবাসী সে লোকের কথা মনে পড়ল যে তাকে চন্দনাইশী বাবাজানের কথা বলেছিলেন। তখন তার বড় ভাই আহমদ উল্লাহকে নিয়ে চন্দনাইশ দরবারে আসেন। তখন বাবাজান আহমদ উল্লাহর বড় ভাইকে সরিষার তৈল নিয়ে আসতে বলেন। বাবাজানের কথা অনুযায়ী তৈল নিয়ে আসা হলো। বাবাজান আহমদ উল্লাহকে নিজ লাঠি দিয়ে বেত্রাঘাত করেন এবং সরিষার তৈল এর উপর ফুহ দিয়ে

বলেন , এ তৈল যেন প্রতিদিন আহমদ উল্লাহর চোখে মুখে মাখা হয়। এতেই আহমদ উল্লাহ ফকির সুস্থ হয়ে উঠেন। তিনি দীর্ঘ ৯৭/৯৮ বছর বেছে ছিলেন। জীবনে আর কোন দিন অসুস্থ হন নাই এবং পাগল হন নাই। তিনি চিরতরে চন্দনাইশী বাবাজানের (ক:) আশেক হয়ে যান।

বর্ণনাকারী : মঞ্জুর মিয়া,পিতা- আহমদ উল্লাহ ফকির

৪০. নূরের আলো "

মীর শফিকুল ইসলাম চন্দনাইশী বাবাজানের বড় ছেলের শালা। তিনি দরবারে সব সময় আসা যাওয়া করতেন। তেমনি একবার ১৪৭৭ বঙ্গাব্দে ২২শে মাঘ ওরশে আসেন এবং সারারাত দরবারে অবস্থান করেন। সকালে মীর শফিকুল ইসলাম বাড়িতে চলে যাওয়ার জন্য চন্দনাইশী বাবাজানের সাথে দেখা করতে যান। তখন চন্দনাইশী বাবাজান হুজুরা শরীফে বসা ছিলেন। সেখানে আর কেউ ছিল না। মীর শফিকুল ইসলাম হুজুরা শরীফে ঢুকার পর যখন চন্দনাইশী বাবাজানকে পায়ে ধরে সালাম করবে ওই মুহূর্তে চন্দনাইশী বাবাজান অদৃশ্য হয়ে যান আর হুজুরা শরীফ আলোয় আলোকিত হয়ে যায়। এই দৃশ্য দেখে মীর শফিকুল ইসলাম হতভম্ব হয়ে যান। কিছুক্ষণ পর মীর শফিকুল ইসলাম দেখলেন চন্দনাইশী বাবাজান আসনে বসে আছেন। তিনি মীর শফিকুল ইসলামকে বললেন, “তুমি কি বাড়িতে চলে যাবে?” তখন মীর শফিকুল ইসলাম বলল “হ্যাঁ”। বাবাজান বলল, “ঠিক আছে যাও।” সে চন্দনাইশী বাবাজানকে সিজদা করে বের হয়ে যান।

বর্ণনাকারী : মীর শফিকুল ইসলাম
গ্রাম : জঙ্গলখাইন, মীরবাড়ী,পটিয়া।

৪১.খোদার পাগল

কাঞ্চননগর নিবাসী জনাব সেকান্দর হোসেন এর পুত্র জামাল ফকির ১০ম শ্রেণীতে পড়ালেখা করার সময় বাসায় না জানিয়ে একদিন এলাকার কিছু মানুষের সাথে মাইজভান্ডার দরবারে বাবা ভান্ডারী কেবলা আলমের ওরশ শরীফে চলে আসেন। যখন জামাল বাবা ভান্ডারী কেবলা আলমের রওজা শরীফের সামনে যান, তখন জামাল রওজা শরীফের ভিতর থেকে চন্দনাইশী বাবাজানকে বের হয়ে আসতে দেখেন। চন্দনাইশী বাবাজানকে দেখেই জামাল সম্বোধিত হয়ে পড়ে। জামালকে এক দৃষ্টিতে হতবুদ্ধ হয়ে রওজা শরীফের দিকে তাকিয়ে থাকতে দেখে এক ব্যক্তি তাকে ডাকতে শুরু করেন। ঐ ব্যক্তির কোনো কথাই জামালের বোধগম্য হচ্ছিলো না। অনেকক্ষণ পর জামালের হুঁশ ফিরে আসে তখন ঐ ব্যক্তি জিজ্ঞেস করেন, “তোমার বাড়ি কোথায়?” জবাবে জামাল বললেন, “আমার বাড়ি কাঞ্চননগর।” তখন ঐ ব্যক্তি জামালকে বললেন, “তোমার বাড়ি যাওয়ার গাড়ি ভাড়া আছে?” জামাল বললেন, “আমি এলাকার কিছু লোকের সাথে এসেছি। ওরা হয়তো এতক্ষণে আমাকে রেখে চলে গেছে।” তা শুনে ঐ ব্যক্তি জামালকে বাড়ি ফেরার ব্যবস্থা করে দেন। বাড়িতে আসার পরদিন থেকেই জামালের কথাবার্তায় অসংগতি দেখা দেয়, তখন জামালের পিতা মোহাম্মদ সেকান্দার হোসেনইন ছেলে পাগল হয়ে গেছে বলে মনে করেন, অনেক ডাক্তার কবিরাজ দেখান, কিন্তু তাতে জামালের কোনো উন্নতি হয় না।। জামালের বাবা কোনো ওলি -আউলিয়া মানতেন না তারপরও তিনি নিরুপায় হয়ে জামালকে নিয়ে চন্দনাইশী বাবাজানের কাছে

আসেন, চন্দনাইশী বাবাজান জামালের বাবাকে বললেন, “ও তো পাগল না , ও খোদার পাগল।” এ কথা বলার পর চন্দনাইশী বাবাজান জামালের পিতাকে বললেন, “ আপনার ছেলে ভালো হয়ে যাবে। ” এর কিছুদিন পর জামাল ভালো হয়ে যান। জামাল চন্দনাইশী বাবাজানের আশেক হয়ে আস্তে আস্তে মজ্জুবে এ পরিণত হয়। সে মজ্জুবে হালতে পদার্পন করে ঠিকই কিন্তু সে লেখাপড়া চালিয়ে যায়। এরই মধ্যে জামালকে নিয়ে বাবাজানের এক অস্বাভাবিক কারামাত সংঘটিত হয়। জামাল যখন এসএসসি পরীক্ষার সময় বাবাজানের কাছে আসে বাবাজান তখন জামালকে দরবারে থেকে পরীক্ষা দিতে বলেন। জামাল তখন খুবই খুশী হয়। প্রথম দিন জামাল দরবার থেকে পরীক্ষা দিতে যায় এবং যথাসময়ে পরীক্ষা দিয়ে ফিরে আসে। দ্বিতীয় দিন জামাল পরীক্ষা দেয়ার জন্য চন্দনাইশী বাবাজানের অনুমতি নিতে গেলে জামাল তখন দেখে বাবাজান জালালী অবস্থায় আছে। জামাল আর কিছু না বলে দাড়িয়ে থাকে। হঠাৎ করে বাবাজান বলেন সামনে মাঘ মাসের ওরশ, গাছগুলোকে লাকড়ী বানিয়ে ঠুকরো করতে হবে। জামাল আর দেরি না করে গাছগুলোকে কুড়াল দিয়ে লাকড়ী বানাতে থাকে। হঠাৎ বাবাজানের অন্যএকজন আশেক নাম মোহাম্মদ শফিকুল ইসলাম বাড়ি ডবলমুড়িং চট্টগ্রাম বাইরে থেকে এসে দেখছে জামাল লাকড়ী বানাচ্ছে। সে জামালকে প্রশ্ন করেন , জামাল, তোমার না আজ ১০ পেপারের মধ্যে দ্বিতীয় পরীক্ষা ? তুমি পরীক্ষার হ'লে যাওনাই কেন ? জামাল প্রতি উত্তরে বলল পরীক্ষা দিচ্ছিতো। শফিকুল ইসলাম আর কিছু না বলে সে ও লাকড়ী বানাতে থাকে। এভাবে জামাল বাকী ০৯ পেপারের প্রতি পেপার পরীক্ষার দিন জামাল শুধু গাছগুলোকে কুড়াল দিয়ে লাকড়ী বানাতে থাকে এবং দরবারের অন্যান্য কাজ করতে থাকে। এদিকে বাবাজান ও জামালকে আর কিছু বলছেন না। অন্যদিকে জামালের বাবা প্রতি পরীক্ষার দিন পরীক্ষার সেন্টারে আসে কিন্তু জামালের সাথে দেখা হয় না। তাই শেষ পরীক্ষার দিন জামালের বাবা পরীক্ষার সেন্টারে যাওয়ার পূর্বে সোজা চন্দনাইশ দরবারে চলে আসে। এসে

দেখে জামাল কুড়াল দিয়ে গাছের লাকড়ী বানাচ্ছে। সময় তখন ১০ টা পার হয়েছে। তিনি যেন আকাশ থেকে পড়েছেন। মনে মনে ভাবতে লাগলেন দরবারে এসে ছেলেটা শেষ হয়ে গেল। তাই তিনি বাবাজানের সাথে দেখা ও করলেন না। তিনি বাড়িতে গিয়ে পরিবারের সবাইকে বলতে লাগলেন তার ছেলে দরবারে গিয়ে জীবনটা বরবাদ করে ফেলেছে কারণ সে এসএসসি পরীক্ষার একটি পরীক্ষা ও দে নাই। তাই তিনি এতদিন পরীক্ষার সেন্টারে তাকে দেখতে পান নাই। পরীক্ষা না দিয়ে পীরের দরবারের কাজ করছিলো। উনার মতো পরিবারের অন্য সদস্যরা হতাশ হয়ে কান্নাকাটি করতে লাগল। জামালের বাবা যেখানে যেতেন সেখানে চন্দনাইশী বাবাজানের বদনাম করে বেড়াত। তিনি পরিবারের সবাইকে বলেন জামাল যেন আর ঘরে আসতে না পারে। জামাল ও তিন মাস বাড়িতে যায় নাই। এদিকে এসএসসি পরীক্ষার রেজাল্ট বের হলে স্কুলের হেড মাষ্টার জামালের বাবার নিকট খবর পাঠালো তার ছেলে এসএসসি পরীক্ষায় প্রথম স্থান লাভ করেছে। জামালের বাবা কথাটা শুনে আকাশ থেকে পড়লেন। তিনি বললেন এটা কিভাবে সম্ভব। জামাল তো পরীক্ষা ও দে নাই। তাই তিনি হেড মাষ্টারের সাথে দেখা করতে গেলেন খবরটা সত্যি কিনা। রোল নং ও নাম মিলিয়ে দেখলেন। দেখা গেল খবরটা সত্যি। তার মুখ দিয়ে আর কোন কথা যেন বের হচ্ছে না। পরিবারের নিকট গিয়ে ব্যাপারটা জানালেন। তারা ও অবাক হলেন। সমাজের অন্যরা এসে জামালের বাবাকে অভিনন্দন জানালেন। তিনি এখন কি করবেন বুঝতে পারছেন না। অবশেষে তিনি বাজারে গিয়ে দুটো ছাগল কিনে সোজা চন্দনাইশী বাবাজানের নিকট নিয়ে আসলেন এবং বাবাজানের কদমে সিজদায় পড়ে কাদতে লাগলেন। এ দিকে বাবাজান মুচকি হেসে বললেন, জামাল তো অনেক দিন বাড়িতে যায় নাই তাকে বাড়িতে নিয়ে যান। কলেজে ভর্তি করাতে বললেন। জামালের বাবা চন্দনাইশী বাবাজানকে তার বাড়িতে দাওয়াত দিলে বাবাজান ও দাওয়াত কবুল করলেন। জামালের বাবা চন্দনাইশী বাবাজানের

আশেক হয়ে গেলেন। অন্যদিকে জামাল মজ্জুবে পরিণত হয়ে পড়েন এবং মজ্জুব অবস্থায় ১৯৯৪ সালে এই পৃথিবী থেকে শেষ নিশ্বাস ত্যাগ করেন।

বর্ণনাকারীঃ কাশেম ভান্ডারী গ্রামঃ নজড় মোঃ চৌধুরি বাড়ি, ৫নং ওয়ার্ড, কানাইমাদারি চন্দনাইশ, চট্টগ্রাম।

এবং

শফিকুল ইসলাম, বাড়ি -ডবলমুড়িং, চট্টগ্রাম

গ্রামঃ নজড় মোঃ চৌধুরি বাড়ি, ৫নং ওয়ার্ড, কানাইমাদারি চন্দনাইশ, চট্টগ্রাম।

৪২. পাপ কাজ থেকে বিরত রাখা

সাতকানিয়া উপজেলার কালিয়াইশ নিবাসী জনাব ওসমান গণি মাষ্টার একদিন চন্দনাইশী বাবাজানের সাথে মাইজভান্ডার দরবার শরীফে যান ওরশ শরীফ উদযাপনের লক্ষ্যে। তখন ছিল ১৯৫২ সাল। ওসমান গণি ছিলেন উচ্চ মাধ্যমিকের ছাত্র। ওসমান গণি সিনেমা দেখার উদ্দেশ্যে পাঁচ টাকা আলাদা করে রেখেছিলেন এবং মনে মনে ভাবছিলেন মাইজভান্ডার শরীফ থেকে ফেরার পথে ৫ টাকা দিয়ে সিনেমা দেখবেন। চন্দনাইশী বাবাজান এবং ওনার ভক্তবৃন্দরা যখন নাজিরহাট পৌঁছান তখন বাবাজান নাস্তা করার জন্য ভক্তবৃন্দের নিয়ে চায়ের দোকানে প্রবেশ করেন। নাস্তা করা অবস্থায় ওসমান গণি এই ভেবে খুশি হলেন যে, “নাস্তার বিল বাবাজান পরিশোধ করবেন।” নাস্তা শেষ হতে না হতেই ঘটল আরেক ভিন্ন ঘটনা। বের হবার সময় বাবাজান ওসমান গণিকে আদেশ করলেন বিল পরিশোধ করতে। ওসমান গণি বাবাজানের আদেশ পেয়ে সিনেমা দেখার জন্য রাখা ৫ টাকার

নোটটি দোকানদারকে দিয়ে দেন। দোকানদার ওসমান গণিকে ৬ পয়সা ফেরত দেন। দোকান থেকে বের হবার পরে বাবাজান ওসমান গণিকে নির্দেশ দিলেন একশলা ক্যাপস্টেন কিনতে। ক্যাপস্টেন এর মূল্য ছিল ৪ পয়সা। ফলশ্রুতিতে ওসমান গণির হাতে রইল মাত্র ২ পয়সা। ওসমান গণি তখন ভাবতে লাগলেন, “দেখি বাকী ২ পয়সা কোথায় খরচ করা যায়?” নাজির হাট থেকে আহমদীয়া গেইটে যেতে না যেতেই বাবাজান নির্দেশ দিলেন, “হযরত কেবলার নামে দুই পয়সা দিয়ে দাও।” ঐ দিন এবং ঐ রাত ওসমান গণি বাবাজানের সাথে দরবার শরীফের ওরশ শরীফে কাটিয়ে দেন। পরের দিন সকালে বাবাজানের সাথে চট্টগ্রামের উদ্দেশ্যে রওয়ানা দেন। ট্রেন থেকে নেমে বাবাজান সবাইকে বিদায় দিলেও ওসমান গণিকে সাথে রেখে দেন। ট্রেন থেকে নেমে উজ্জল সিনেমা হলের সামনে পৌঁছতে না পৌঁছতেই চন্দনাইশী বাবাজান ওসমান গণিকে মুচকি হেসে সিনেমা দেখার নির্দেশ দেন। ওসমান গণি তখন নিজের ভুল বুঝতে পেরে বাবাজানের কাছে ক্ষমা চান এবং পরে প্রায় দুপুর আড়াইটার দিকে চন্দনাইশ দরবার শরীফে চলে আসেন। এভাবে বেলায়তের শক্তির মাধ্যমে চন্দনাইশী বাবাজান অন্যের মনের খবর রাখেন এবং অন্যায় ও পাপ কাজ থেকে বিরত রাখেন।

বর্ণনাকারী : ওসমান গণি (বি.এ.বি.টি)

গ্রাম : কালিয়াইশ ইউনিয়ন, ৫নং ওয়ার্ড,

সাতকানিয়া, চন্দনাইশ, চট্টগ্রাম।

৪৩. অফিসে উপস্থিত না থাকা সত্ত্বেও হাজিরা

চন্দনাইশ মিঞ্জীর দোকান নিবাসী জনাব ইব্রাহিম ফকির বাবাজানের মুরিদ সন্তান ছিলেন। তৎকালীন ব্রিটিশ আমলে তিনি কলকাতায় পোষ্ট অফিসে চাকরি করতেন। তিনি বাবাজানের এত ভক্ত ছিলেন যে একবার বাড়িতে আসলে আর যেতে চাইতেন না। কিন্তু সরকারী চাকরী না গিয়ে পারতেন না। এছাড়া ইব্রাহিম কলকাতায় চাকরি করলে ও তার পরিবার থাকতো চন্দনাইশে। তাই ইব্রাহিম পরিবার ফেলে প্রায়ই চাকরিস্থলে যেতে গড়িমশি করতেন। যাওয়ার সময় কান্নাকাটি করতেন। একবার ইব্রাহিম ফকির কলকাতা থেকে বাড়িতে আসেন। এসে চন্দনাইশী বাবাজানের সাথে দেখা করেন। বাড়িতে কিছুদিন থাকার পর ইব্রাহিমের যখন ছুটি শেষ হয়ে যায় তখন কলকাতায় চলে যাওয়ার আগে চন্দনাইশী বাবাজানের সাথে দেখা করতে যান। তখন চন্দনাইশী বাবাজান ইব্রাহিম কে বলেন "তোমার ছুটি শেষ?" তিনি বললেন, হাঁ, বাবাজান। বাবাজান বললেন, তোমার কলকাতায় যেতে হবে না, তুমি দরবারের খেদমতে থাকো। এ কথা শোনার পর ইব্রাহিম অফিসে ছুটির জন্য একটা দরখাস্ত লিখে বাবাজানের হাতে দেন, তখন বাবাজান দরখাস্তটা আসন শরীফের বেডের নিচে রাখার জন্য আদেশ দেন। এরপর ইব্রাহিম অনেকদিন দরবারের থেকে যায়। কিছুদিন থাকার পর চন্দনাইশী বাবাজানের হুকুম মতো কলকাতায় চলে যান। কলকাতায় গিয়ে সবাইকে বলল বাড়িতে কাজ ছিল তাই আসতে পারিনি। তখন অফিসের সবাই ইব্রাহিমকে বলল তুমি তো প্রত্যেকদিন অফিস করেছ। আমাদের সাথে মজা করতেছো না কি? তখন ইব্রাহিম মনে মনে ভাবতে লাগলেন আমিতো বাড়িতেই ছিলাম কিন্তু আমার হাজিরা ঠিকই হয়ে গেলো কিভাবে? ইব্রাহিম ফকির আমি লেখককে অনেকবার বলেছেন যে বাবাজানের খেদমতে নিজেকে নিয়োজিত করার পর প্রয়োজনের অতিরিক্ত ছুটি কাটিয়ে তিনি যতবারই বাড়ি থেকে যেতেন তার হাজিরা হয়ে যেতো।

বর্ণনাকারীঃ মোহাম্মদ ইব্রাহিম ফকির।

গ্রামঃ মধ্যম চন্দনাইশ মিঞ্জীর দোকান।

ওয়ার্ডঃ ০৭

৪৪."ওষুধ ব্যতীত পেটের ব্যথা বন্ধ"

সাতবাড়িয়া বহরম পাড়া নিবাসী জনাব কবির আহমদ, বাবা ইয়াকুব আলী। ইয়াকুব আলীর সাত সন্তানের মধ্যে কবির আহমদ ষষ্ঠ সন্তান। কবির আহমদ নিজে বর্ণনা করেন যে, ছোট বেলা থেকেই তিনি পেটের ব্যথা ভুগছিলেন। তিনি একবার তার বাবার সাথে দরবারে আসার চিন্তা করলেন। তখন প্রতি মাসের চাঁদের ২২ তারিখ মাসিক ওরস শরীফ হতো। দরবারে আসার সময় কবির আহমেদের মা কবির আহমেদের বাবাকে বলেন, আপনি বাবাজান কে একটু বলেন কবির আহমেদ এর পেটের ব্যথা ভালো করে দিতে। এ ব্যাথা থেকে তো সে নিস্তার লাভ করতে পারছেন। এসুখ যেন জন্মের। ইয়াকুব আলী দরবারে এসে বাবাজানকে বললেন আমার ছেলেটা কে আপনি একটু ভালো করে দেন। সে আর সহ্য করতে পারছেন। অনেক ডাক্তার এবং কবিরাজের কাছে নিয়ে গিয়েছিলাম। কিন্তু কোন ফল হয়নি। বাবাজান কবির আহমেদ থেকে জিজ্ঞেস করেন, তোমার কি পেট ব্যথা করে? কবির আহমদ উত্তরে বলল হ্যাঁ। বাবাজান কবির আহমেদের পেটে হাত দিলেন। পেট ব্যথা বন্ধ হয়ে গেল। বাবাজান কবির আহমেদ কে বললেন দায়রা ঘরে যাও। দায়রা শরিফে এসে পেট ব্যথা আবার বেড়ে গেল। বাবাজান আবার ডাকল এবং আবার পেটে হাত দিলেন। পেট ব্যথা বন্ধ হয়ে গেল। আবার দায়রা ঘরে আসলো তারপর আবার পেট ব্যথা বেড়ে গেল, আবার বাবাজান ডাকলেন, বাবাজান কিছু পানি তাবারুক হিসেবে পান করতে দিলেন এবং বাবাজানের চিবানো এবার কিছু পান দিলেন। তা খেতে বললেন। এগুলো খাওয়ার পর কবির আহমেদ সুস্থ হয়ে গেল। এখন ও পর্যন্ত বাবাজানের দয়ায় কবির আহমেদের আর কোন রোগ-বলাই হয়নি।

বর্ণনাকারীঃ- কবির আহমদ, পিতা: ইয়াকুব আলী ফকির।

গ্রামঃ- বহরম পাড়া

ওয়ার্ডঃ-০২

৪৫.পঁচা আঙ্গুর

কাজীর দেউরী নিবাসী জনাব আবুল কালাম বাবাজানের বেলায়তী শক্তি পরীক্ষা করার জন্য চন্দনাইশ দরবারে আসেন। আসার সময় প্যাকেটের মধ্যে কিছু পঁচা আঙ্গুর নিয়ে এসে বাবাজানের হাতে দেন। প্যাকেটটি হাতে না নিয়ে বাবাজান মুচকি হেসে বললেন, "তোমার হাতের পঁচা আঙ্গুর গুলো তুমি রেখে দাও।" এই কথা বলার সাথে সাথে আবুল কালাম ভয় পেয়ে যায়। পরের দিন বাড়িতে আসলে তার শরীরে জ্বর আসে। তার সারা শরীরে আঙ্গুরের দানার মতো বসন্তের গুটি দেখা দেয়। তিনি মনে মনে চন্দনাইশী বাবাজানকে স্বরণ করতে লাগলেন এবং ক্ষমা চাইলেন। ধীরে ধীরে সুস্থ হয়ে উঠেন। এরপর থেকে বাবাজানের প্রতি তার বিশ্বাস আসে এবং বাবাজানের কাছে এসে বায়াত গ্রহণ করেন। তিনি বাবাজানের আশেকে পরিণত হন।

বর্ণনাকারীঃ- আবুল কালাম

বাসাঃ ব্যাটারি গলি

৪৬.কাজীর দেউরী হুজুরা শরিফ প্রতিষ্ঠা

বাবাজান চন্দনাইশী কেবলা (ক:) মাঝে মাঝে চট্টগ্রাম শহরের ব্যাটারি গলি নিজের মেয়ের শশুর বাড়িতে মেয়েকে দেখতে যেতেন। সেখানে একদিন আবুল কালাম নামক জনৈক ব্যক্তি বাবাজান চন্দনাইশী কেবলার (ক:)চেহারা মোবারক দেখে খুবই আকৃষ্ট হয়ে যায়। তিনি তার বাড়িতে নিয়ে যাওয়ার জন্য পীড়াপীড়ি করতে থাকেন। অবশেষে বাবাজান মেয়ে ও অন্যদের অনুরোধে রাজি হন। জনাব আবুল কালাম বাবাজানকে তার বড় ভাই আবুলের বাসায় নিয়ে একটি লোহার খাটের উপর বসালেন এবং তার ভাইয়ের বউ জামিলা খাতুন কে বললেন ইনি একজন কামেল বুজুর্গ লোক। আমি উনাকে অনেক অনুরোধের পর এখানে আনতে সক্ষম হয়েছি। সম্মান সহকারে খানা পিনার আয়োজন করতে হবে। খাওয়ার পর একটি হুক্কাতে তামাক সাজিয়ে বাবাজানের সামনে দিলেন। আবুল কালামের সব ভাই বাবাজানের কাছে দোয়ার জন্য আসেন। এদিকে জামিলা খাতুনের মা যিনি এক কঠিন রোগে আক্রান্ত ছিলেন (জামিলা খাতুনের মার রোগের কারণে নাক দিয়ে সব সময় রক্ত আসতো) তিনি ও বাবাজানের কাছে রোগ মুক্তির আরজি নিয়ে আসেন। বাবাজান তাকে তার সেবনকৃত হুক্কার নল দিয়ে নিশ্বাস নিতে বলেন। একদিন বা দুইদিন থাকার পর বাবাজান যখন দরবারে চলে আসলেন, তখন জামিলা এর মা ভক্তি করে হুক্কার নলের ধোয়া নাক দিয়ে টানতে লাগল। এরপর থেকেই জামিলার মার নাকের রক্ত পড়া চিরতরে বন্ধ হয়ে ভালো হয়ে গেল। এছাড়া বাবাজানের অবস্থানকালে বাবাজানের বেশকিছু কারামাত তাদের নজরে পড়ে। এতে তাদের পরিবার বর্গের সবাই বাবাজানের উপর বিশ্বাস বেড়ে যায়। সবাই দরবারে এসে বাবাজানের হাতে বায়াত গ্রহণ করল। এরপর থেকেই ব্যাটারি গলির ওই জায়গার মধ্যে বাবাজানের হুজুরা শরীফ প্রতিষ্ঠিত হয়।

বর্ণনাকারী : পেচু মিয়া, মোগলটুলী ,চট্টগাম।

৪৭. অনাহারের সময় খাওয়ার পরিবেশন

কানাইমাদারী নিবাসী বাবাজান কেবলা চন্দনাইশীর (ক:) আশেক জনাব আহমদ উল্লাহর আর্থিক অবস্থা খুবই সংকটময় ছিল। উনার বড় ছেলে মনজুর মিঞা পান নিয়ে বাবাজানের সাথে একদিন দেখা করতে আসে। তখন বাবাজান মনজুর মিঞাকে বলেন, “তুমি খাওয়া দাওয়া কর” উত্তরে মনজুর মিঞা বলল, “আমি খাব না। আমার বাড়িতে সবাই না খেয়ে বসে আছে আমি কীভাবে খেতে পারি?” তখন বাবাজান বললেন “তোমার বাড়িতে সবাই মাংস দিয়ে খাওয়া দাওয়া করতেছে। তুমিও খাও।” মনজুর মিঞা বাবাজানকে দাদাজান বলে সম্বোধন করত। মনজুর মিঞা বলতে লাগল যদি বাড়িতে সবাই না খেয়ে উপোশ থাকে দাদাজান আমি আপনার সাথে আর কথা বলব না। বাবাজান বললেন “তুমি খাও আগে” মনজুর মিঞা খাওয়া দাওয়া শেষ করে বাড়িতে গিয়ে দেখে পরিবারে সবাই মাংস দিয়ে ভাত খাচ্ছে মনজুর মিঞা তার মাকে জিজ্ঞেস করল। “মাংস কোথায় থেকে এসেছে?” মনজুর মিঞার মা বলল “পাশের বাড়িতে আকিকা হয়েছে সেখান থেকে মাংস পাঠিয়েছে”। তখন মনজুর মিঞা বুঝতে পারল চন্দনাইশী বাবাজান যা দেখেন তা আমরা দেখিনা।

বর্ণনাকারী : মনজুর মিঞা

গ্রাম : কানাইমাদারী

ওয়ার্ড : ৫নং

৪৮. ভক্তের মনের ইচ্ছা পূরণ

চন্দনাইশী বাবাজান জাহেরী হায়াতে থাকাকালীন সময়ে প্রতি চাদেঁর ২২ তারিখ চন্দনাইশ দরবারে ওরশ শরীফ উদযাপন হত। ওরশ শরীফের দিন রাতে চন্দনাইশী বাবাজান যখন কিছু আহার গ্রহন করতেন ঐখান থেকে কিছু আহার তবারোক হিসাবে হাজদ ও মকসুধীদের থেকে যাকে ইচ্ছা তাকে খেতে দিতেন। চন্দনাইশী বাবাজানের এক ভক্ত মোহাম্মদ সাহাবুদ্দীন চন্দনাইশী বাবাজানের ওপর অনেক বেশি রাগান্বিত হয়ে যায়। সাহাবুদ্দীন মনে মনে ভাবতে লাগলেন বাবাজানের তবারুক আমাকে কেন খেতে দিচ্ছেন না। সাহাবুদ্দীন মনে মনে ভাবলেন যে কোন এক চাদেঁর ২২ তারিখ ওরশ শরীফের দিন বাবাজান যাকে উনার তবারুক খেতে দিবেন সেই ব্যক্তির কাছ থেকে আমি তবারুক নিয়ে খেয়ে ফেলব। সে রকম সময় ও আসল যখন চন্দনাইশী বাবাজান আহার গ্রহন করতেন। ঐ সময় বাবাজান উনার এক ভক্ত আজম সাহেব কে বললেন এই আহার গুলো সাহাবুদ্দীনকে দাও। সাহাবুদ্দীন মনে মনে অনেক খুশি হলো আর ঐ তবারুক গুলো খাওয়া শুরু করলো সাহাবুদ্দীন। সাহাবুদ্দীন তবারুক গুলো প্রায় ৩ ঘন্টা ধরে খাওয়ার পরও তবারুক গুলো শেষ হচ্ছিলো না। সাহাবুদ্দীন মনে মনে ভাবলেন কি ব্যাপার এ খাওয়ার তো শেষই হচ্ছেনা। এই গুলোতো বাবাজানের দেওয়া তবারুক ফেলেও দেওয়া যাবে না। তখন সাহাবুদ্দীন ঐ তবারুক গুলো দেওয়ার জন্য কাউকে খুজতে ছিল তখন চন্দনাইশী বাবাজান উনার এক ভক্তকে ডেকে বললেন সাহাবুদ্দীন এর কাছে কিছু তবারুক আছে যাও তুমি গিয়ে ওগুলো নিয়ে খেয়ে ফেলো। যে তবারুক সাহাবুদ্দীন তিন ঘন্টা ধরে শেষ করতে পারলো না ঐ ব্যক্তি সেই তবারুক গুলো ৫মিনিটের মধ্যেই খেয়ে ফেললেন। সাহাবুদ্দীন মনে মনে বাবাজানের নিকট ক্ষমা চাইলেন আর ভাবলেন মুরশিদের কাছ থেকে জোর করে চাইলে বিপদ। কারণ তিনি যা দেখেন ভক্তরা তা সহজে বুঝতে পারেনা।

বর্ণনাকারী : মোহাম্মদ সাহাবউদ্দীন

বাসা : হালিশহর

ওয়ার্ড নং : ০৭

৪৯. অল্প সময়ে চন্দনাইশী বাবাজানের (ক:) ফয়েজ লাভ

তৎকালীন পাকিস্তানি আমল ১৯৬৬ সাল। চন্দনাইশী বাবাজানের (ক:) আশেক কানাইমাদারী নিবাসী আহমদুল্লাহ ফকিরের এর ভাইপো আব্দুর রহিম এর মাথার সমস্যা দেখা দেয়। আব্দুর রহিমের মাথার সমস্যা ভালো হওয়ার জন্য অনেক ডাক্তার, কবিরাজ দেখান। আব্দুর রহিমের মাতা খুবই চিন্তিত হয়ে পড়লেন। তাই তার মা আব্দুর রহিমকে চন্দনাইশী বাবাজানের (ক:) এর কাছে নিয়ে যাওয়ার জন্য আহমদুল্লাহ ফকিরকে অনুরোধ করলেন। কারণ একসময় আব্দুর রহিম এর চাচা আহমদুল্লাহর ফকিরের ও মাথার সমস্যা ছিল। চন্দনাইশী বাবাজানের কাছে গিয়ে উনার মাথার সমস্যা নিরসন হয়েছিল। আহমদুল্লাহ ফকির আব্দুর রহিমকে সাথে নিয়ে চন্দনাইশী বাবাজান এর কাছে আসেন। তখন আব্দুর রহিম বাবাজানের খেদমতে থাকতে শুরু করেন। বাবাজানের ছোঁহবতে থাকতে থাকতে বাবাজানের ফয়েজ এণ্ডেহাদীর কারণে একসময় আব্দুর রহিমের কাশফ শক্তি সৃষ্টি হয়। সে বাবাজানের প্রচণ্ড আশেকে পরিণত হয়। সে বাবাজানকে ছাড়া একাকী থাকতে নারাজ। একদিন বাবাজান তাকে বললো সামনে ২৭ শে আশ্বিন বাবা ভান্ডারীর খোশরোজ শরীফ। আমি মাইজভান্ডার শরীফে যাবো। চন্দনাইশী বাবাজান আব্দুর রহিমকে বললো, তুমি বাড়িতে চলে যাও। কথাটি শুনে আব্দুর রহিম বাড়িতে চলে যান। ঐ দিন ছিল শবে বরাত। সে খুবই অস্থির হয়ে পড়েন। আব্দুর রহিমের মা তাকে কানাইমাদারী শান্তির হাট বাজার থেকে মাংস নিয়ে

আসতে বললেন। মাংস নিয়ে আসার পথে যার সাথেই দেখা হয় তাকেই আব্দুর রহিম বলেন, আমি আজ রাতে মারা যাবো, তোমরা আমরা জানাযায় আসিও ঐ দিন রাতেই আব্দুর রহিম ইস্তেকাল করেন। আব্দুর রহিম অল্প সময়েই চন্দনাইশী বাবাজানের কৃপা লাভে ধন্য হয়ে ইহজগত ত্যাগ করেছিলেন।

বর্ণনাকারী : মনজুর আহমেদ, পিতা:- আহমদ উল্লাহ ফকির

গ্রাম : কানাইমাদারী, চন্দনাইশ।

৫০. হুজরা শরীফ থেকে অদৃশ্য

পাকিস্তান আমলের কোন একদিন বাবাজান চন্দনাইশী (ক:) দরবারে একাকী অবস্থায় ছিলেন। যে সকল ভক্তরা প্রায় সময় দরবারে থাকতেন তারা ও বিভিন্ন প্রয়োজনে বাইরে ছিলেন। শুধু মাত্র ছাদেক হোসেন ও বাবাজানের স্ত্রী (মা জান) দরবারে ছিলেন। সময়টা ছিল শীতকাল। মাগরিবের সময় বাবাজানের ভক্ত আশেক জনাব মোহাম্মদ মোখতার মিয়া যিনি ছিলেন রিয়াজুদ্দীন বাজারের মালিক রফিক উদ্দীন সাহেবের ম্যানেজার, তিনি চট্টগাম শহর থেকে দরবারে আসেন। তিনি দরবারে আসেন আধ্যাত্মিক বিষয়ের উপর বিশেষ একটি প্রশ্ন নিয়ে যা তাকে নিজ ঘরে অবস্থান করতে দিচ্ছেনা। হুজরা শরীফে বাবাজানকে তাজীম পূর্বক নাস্তা গ্রহন করে বাবাজানের সাথে কথাবার্তা শুরু করেন। কথা বলতে বলতে প্রায় রাত নয়টা বেজে যায়। কিন্তু তিনি যে কারণে এসেছিলেন সে বিষয়ের উপর তখনো পর্যন্ত বাবাজানকে বলতে পারেন নাই। এক পর্যায়ে বাবাজান ছাদেক হোসেন কে রাতের খাওয়ার পরিবেশন করতে বলেন। তদানুযায়ী ছাদেক হোসেন খাওয়ারের কথা বলতে বাবাজানের স্ত্রীর (মা জানের) কাছে গেলেন। বাবাজান নিজ আসন শরীফে কম্বল গায়ে দিয়ে সামান্য বিশ্রামের জন্য শুয়ে পড়েন। আর জনাব মোহাম্মদ মোখতার মিয়া বাবাজানের হুজরা শরীফ থেকে

কিছুক্ষণের জন্য বের হয়ে হুজরা শরীফের সামনে উঠানে দাড়ান এবং খাওয়ার জন্য অপেক্ষা করতে থাকেন। ইতিমধ্যে রাতের আহার বাবাজানের সামনে টেবিলে রাখা হলো। ছাদেক হোসেন মোহাম্মদ মোখতার মিয়াকে ডাকার জন্য হুজরা শরীফ থেকে বের হলেন। মোখতার মিয়া যেহেতু উঠানে দাড়ানো অবস্থায় ছিল ডাকার সাথে সাথে তিনি হুজরা শরীফে প্রবেশ করলেন। ছাদেক হোসেন ও মোখতার মিয়া উভয়ে বাবাজানকে শোয়া অবস্থায় থেকে ডাকার জন্য আসন শরীফের নিকটে গেলে দেখেন বাবাজান আসন শরীফে কম্বলের ভিতর নাই। তারা উভয়ে হতভম্ব হয়ে যায় এবং একে অপরের দিকে থাকিয়ে থাকেন। জনাব মোখতার মিয়া ছাদেক হোসেনকে বললেন যে, বাবাজানকে কম্বল মুড়িয়ে শুইতে দেখে তিনি হুজরা থেকে বের হয়ে মাত্র উঠানে দাড়ালেন। বাবাজান যদি বের হতেন তাহলে তিনি অবশ্যই দেখতেন। যা হোক তারা মনের শান্তির জন্য একজন বাথরুমের দিকে অন্যজন পুকুর ঘাটের দিকে গেলেন। দুই জায়গাতে তারা বাবাজানকে না পেয়ে আবারো হুজরা শরীফে আসলেন এবং আসন শরীফের কম্বলটাকে ভাজ করে রাখলেন। অবশেষে তারা বাবাজানের স্ত্রী অর্থাৎ মা জানকে বিষয়টি জানালে তিনি ও বললেন যে, উনাকে তো আসনে শুইতে তিনি ও দেখেছেন। তাহলে মূহূর্তের মধ্যে গেলেন কোথায়। সবাই খুবই চিন্তিত হয়ে পড়লেন। আর কোন উপায় দেখে জনাব মোখতার মিয়া ও ছাদেক হোসেন হুজরা শরীফের ভিতরে অস্থির হয়ে পায়চারী করতে থাকেন। এদিক ওদিক তাকাতে তাকাতে হঠাৎ দেখেন যে, বাবাজান আসন শরীফেই কম্বলের মধ্যে নড়াছড়া করছেন এবং গলার স্বরে আওয়াজ দিয়ে শোয়া থেকে উঠে বসলেন এবং বললেন যে, তারা এখনো কেন উনার টেবিলে খাওয়ার রেখে শোয়া থেকে তাকে ডাকেন নি। মা জান, মোখতার মিয়া ও ছাদেক হোসেন সবার আর কোন আওয়াজ নাই। তারা শুধু বাবাজানের দিকে তাকিয়ে থাকেন। আগ বাড়িয়ে তারা বলতে পারছেন না যে, ২০-২৫ মিনিট ধরে তারা বাবাজানকে আসনে না দেখে খুজতেছেন এবং অস্থির হয়ে পড়েছেন। বাবাজান তাদেরকে আর কিছু না

বলে তাদেরকে রাতের খাওয়ার খেয়ে নিতে বলেন। বাবাজান ও আহার পর্ব শুরু করলেন। এদিকে জনাব মোখতার মিয়া আহার করতে করতে ভাবতে লাগলেন যে, তিনি বাবাজানকে আসন শরীফে কম্বলের মধ্যে না দেখে তো কম্বলখানা ভাজ করে রাখলেন। তাহলে বাবাজান মূহূর্তের মধ্যে কিভাবে কম্বল মোড়ানো অবস্থায় শোয়া থেকে উঠলেন অথচ তারা দুজনেই আসন শরীফের সামনে দাড়ানো অবস্থায় ছিলেন এবং বাবাজানকে বাইরে থেকে ও আসতে দেখেন নি। পরে তিনি বুঝতে পারলেন যে, বাবাজান তার বেলায়তী শক্তির মাধ্যমে হুজরা শরীফ থেকে অদৃশ্য হয়ে কোথায় যেন গিয়েছেন। যা হোক বাবাজান সহ তারা সকলে আহার পর্ব সারলেন। জনাব মোহাম্মদ মোখতার মিয়া পুনরায় বাবাজানের সাথে আধ্যাত্মিক বিষয়ের উপর কথোপকথন শুরু করলেন। কথা বলতে বলতে যখন রাত ১১ টা তখন ছাদেক হোসেন ও মোখতার মিয়া দেখলেন চন্দনাইশ সাতবাড়ীয়া ইউনিয়ন যা ০৫ মাইল দূরবর্তী এলাকা ওখান থেকে ২০-৩০ জন বাবাজানের ভক্ত মুরিদান উপস্থিত। তারা সকলে বাবাজানকে তাজীম পূর্বক বলতে লাগলেন যে, শীতকালীন সময়ের এত রাতে ঘন্টা দুই এক পূর্বে কেন বাবাজান সাতবাড়ীয়া গিয়ে সবার সাথে দেখা করে কথা না বলে এবং কিছু না খেয়ে চলে আসলেন। তারা বাবাজানের সাথে কোন বেয়াদপি করেছেন কিনা। তাই তারা মনের অশান্তি নিয়ে রাতের খাবার না খেয়ে সোজা দরবারে চলে আসলেন। বাবাজান তখন মুচকি হাসলেন এবং ছাদেক হোসেনকে ডেকে সাতবাড়ীয়া থেকে আসা সবার জন্য খাওয়ার প্রস্তুত করতে বললেন। সকল আশেকগন বাবাজানের সামনে জিকরে ছেমা শুরু করলেন যা প্রায় ঘন্টা দেড় ঘন্টা চলতে থাকে। জনাব মোখতার মিয়া সাহেব পরিস্কারভাবে বুঝে গেলেন যে, রাত নয়টার সময় যে ২০-২৫ মিনিট তারা বাবাজানকে দেখেননি তখন বাবাজান তার বেলায়তী শক্তির মাধ্যমে ০৫ মাইল দূরবর্তী সাতবাড়ীয়া ইউনিয়নে আশেক ভক্তদের কোন বিপদ থেকে বাচাতে মূহূর্তের মধ্যে গিয়েছিলেন এবং তাদের সাথে দেখা করে মূহূর্তের মধ্যে চলে আসলেন। আর তিনি যে প্রশ্ন নিয়ে সে

রাত্রে বাবাজানের কাছে এসেছিলেন তার উত্তর বাবাজানের মূর্ত্তে অদৃশ্য হওয়ার ঘটনার মধ্যে পেয়ে গেলেন অর্থাৎ আউলিয়াগণ পলকে দূরদেশে ছায়ের করতে পারেন। জনাব মোখতার মিয়াকে বাবাজানের কাছে আর কোন প্রশ্ন করার প্রয়োজন হয় নাই। তিনি মনে মনে রহানী শান্তি অনুভব করেন এবং বাবাজানের আরো চরম আশেকে পরিনত হন।

বর্ণনাকারী: ছাদেক হোসেন, পিতা:-বদি আলম
চন্দনাইশ পৌরসভা, ০৭ নং ওয়ার্ড, চন্দনাইশ, চট্টগ্রাম।

৫১. দুনিয়া থেকে পর্দা দেওয়ার পরেও স্ব-শরীরে দেখা করা

১৯৮৪ সালের ঘটনা। চন্দনাইশ মিঞ্জির দোকান নিবাসী জনাব আবদুর রহমান সওদাগর যিনি কাপ্তাই অঞ্চলে ব্যবসা করতেন। একদিন বেলা দুপুর ১২টায় উনি প্রতি দিনের ন্যায় ঐদিনও দোকান করেন। বাবাজান উনার দোকানে উপস্থিত হয়ে উনার সাথে কথা বলা শুরু করেন। কথা বলতে বলতে বাবাজান বলেন, “আগামীকাল মাঘ মাসের ২২ তারিখ ওরশ, তুমি কালকে দরবারে গিয়ে তোমার দাদিজানের সাথে দেখা করে আসবে।” দোকানের মালিক বাবাজানকে দাদা বলে সম্বোধন করতেন। বাবাজানকে নাস্তা করার জন্য অনেক আকুতি মিনতি করেন। বাবাজান দোকানের মালিকের সাথে কথা শেষ করে ঐখান থেকে চলে যান। বাবাজান ঐখান থেকে চলে যাওয়ার কিছুক্ষণ পরে দোকানের মালিক কাজ ভুল করতে থাকেন। উনার অবস্থা দেখে দোকানের ছেলে মালিককে জিজ্ঞেস করল, “আপনার কী হয়েছে?” উত্তরে দোকানের মালিক বলেন, “তুমি এখানে একজন বৃদ্ধ লোককে দেখেছো?”

দোকানের ছেলেটি বলল, “হ্যাঁ দেখেছি।” দোকানের মালিক ছেলেটিকে বললেন, “দাদাজান পৃথিবী থেকে চলে গিয়েছে ২ বছর আগে।” উনি একজন আল্লার অলি। ওফাত হওয়ার পরে আমার সাথে দেখা করতে এসেছেন। কালবিলম্ব না করে ওরশের দিন আবদুর রহমান দরবারে আসেন এবং দাদিজানের হাতে নজরানা প্রদান করেন। এর পর থেকে আবদুর রহমানের মনে চন্দনাইশী বাবাজানের (ক:) প্রতি ভক্তি বেড়ে যায়।

বর্ণনাকারীঃ- আবদুর রহমান সওদাগর।
গ্রামঃ- মিঞ্জির দোকান ৭নং ওয়ার্ড, চন্দনাইশ পৌরসভা, চট্টগ্রাম।

৫২. বাবাজানের জীবনী লিখে পাশ

১৯৮৬ সালে ব্যাটারি গলি নিবাসী বাবাজানের মেয়ের ঘরের নাতী জনাব কাজী মোঃ এনায়েত উল্লাহ ফারুক ডিগ্রী ফাইনাল পরীক্ষা দিচ্ছিলেন। পরীক্ষার মধ্যে কোন একটি পরীক্ষাতে কোনো প্রশ্ন কমন না আসায় ফারুক নিরুপায় হয়ে চন্দনাইশী বাবাজানের জীবনী খাতার মধ্যে লিপিবদ্ধ করেন। পরীক্ষার তিন মাস পর যখন ফলাফল বের হওয়ার সময় তখন ফারুক মনে মনে ভাবতেছেন, আমি পরীক্ষায় খারাপ করবো! যেদিন ফলাফল বের হয় ঐদিন দেখেন ফারুক ডিগ্রী পাস করেছেন। ফারুক অবাক হয়ে যান কারণ তিনি একটি পেপারে কোন প্রশ্নের উত্তরই লিখেন নাই। লিখে ছিলেন শুধু চন্দনাইশী বাবাজানের জীবনী। ফারুক বাবাজানের বিশেষ দয়ায় পরীক্ষায় পাশ করেন। তাই ফারুক তার নানা চন্দনাইশী বাবাজানের (ক:) প্রতি প্রচণ্ড বিশ্বাস ও ভক্তি রাখেন। জীবনের প্রতিক্ষেত্রে চন্দনাইশী বাবাজানকে (ক:) স্বরণ করতে থাকেন।

৫৩.ওফাতের পর চাহরম শরীফে আগমন

সাল ১৯৮২, চন্দনাইশী বাবাজান কেবলা আলম তখন দুনিয়া থেকে পর্দা নেন। সাহরম শরীফের দিন (চারদিনের দিন) রাতে হুজুরা শরীফে ছেমা মাহফিল শুরু হয়। রাত ১২ টায় মাহফিলের পর ক্লাস্ত হয়ে যাওয়ায় জরি আহমেদ, আব্দুচ ছবুর মিস্ত্রি, আব্দুল মোনাফ ফকির এবং সিরাজুল কবির ওরা চারজন হুজুরা শরীফ থেকে বের হয়ে হুজুরা শরীফের আগিনায় বসেন। কিছুক্ষণ বসার পর চারজনের মধ্যে সিরাজুল ইসলাম আকাশের দিকে তাকান। উনি তখন দেখতে পেলেন আকাশ থেকে কি যেন নেমে আসছে। উনি বাকিদেরকে ও বললেন। তারা ও আকাশের দিকে তাকালে, দেখতে পেল একটি আসন দ্রুত নিচে নামতেছে। নিচে নামার পর দেখতে পেলেন আসনের মধ্যে চন্দনাইশী বাবাজান। আসন থেকে নেমে বাবাজান হুজুরা শরীফে প্রবেশ করতেছেন। এটা দেখে ওরা চারজন হুজুরা শরীফের সামনে তাড়াতাড়ি জুতাগুলো সরিয়ে ফেললেন। বাবাজান হুজুরা শরীফের আসনে বসেন। সবাই মিলে পুনরায় ছেমা মাহফিল শুরু করলেন। ছেমা মাহফিল করতে করতে এক পর্যায়ে এক ভক্তের পায়ে সাথে বাবাজানের বদনা লেগে বদনার পানি মাটিতে পড়ে। যার কারণে মাহফিল বন্ধ হয়ে যায়। মাহফিল বন্ধ হওয়াতেই বাবাজান হুজুরা শরীফ থেকে বের হওয়ার দৃশ্য অনেক ভক্ত দেখতে পান। তখন সবাই বলতে লাগলেন, “বাবাজান চলে যাচ্ছেন।” এ ঘটনার পর অনেকে পর্যন্ত অন্যান্য ভক্তবৃন্দ বাবাজানের হুজুরা শরীফের মধ্যে যে আসনটিতে বাবাজান বসেছিলেন ঐ জায়গায় বাবাজানের বসার চিহ্ন সবাই দেখতে পান।

বর্ণনাকারীঃ- আব্দুল মোনাফ ফকির, জহির আহমেদ, আবদুছ ছবুর মিস্ত্রি, সিরাজুল কবির।

গ্রামঃ- মিজ্জীর দোকান, ৭নং ওয়ার্ড, চন্দনাইশ পৌরসভা, চট্টগ্রাম।

৫৪.গভীর রাতে আযান

১৯৮২ সালে চন্দনাইশী বাবাজান কেবলা আলম পৃথিবী থেকে পর্দা হওয়ার কিছুদিন পরে এক রাতে সুবহে সাদিকের অনেক পূর্বে চন্দনাইশী বাবাজানের বড় ছেলে শাহজাদা সৈয়দ মাওলানা জহুরুল আলম শাহ (রাহ:) এর বড় ছেলে শাহজাদা সৈয়দ দায়েম (এ গ্রন্থের লেখক) (বয়স তখন ০৫ বছর) মসজিদে গিয়ে ইমাম সাহেবকে ডাকেন এবং বলেন, “আপনাকে আমার দাদীজান ডাকছেন।” এ কথা শুনার পর ইমাম সাহেব এবং শাহজাদা দায়েম একসাথে হেঁটে চন্দনাইশী বাবাজানের হুজুরা শরীফে আসেন। এসে দায়েম হুজুরা শরীফের দরজায় হাত দেন। হুজুরা শরীফ ভেতর থেকে বন্ধ ছিল। হাত দেওয়ার সাথে সাথেই দরজা খুলে যায়। উনারা দুইজন হুজুরা শরীফে প্রবেশ করেন এবং ইমাম সাহেব দেখতে পান চন্দনাইশী বাবাজান আসন শরীফে বসা আছেন। এটা দেখার পর ইমাম সাহেব শাহজাদা দায়েমকে খুঁজেন। তিনি দায়েমকে আর দেখতেছেন না। এটা দেখার পর ইমাম সাহেব আযান দিতে শুরু করেন। আযানের ধ্বনি শুনে সবার ঘুম ভেঙে যায়। সবাই ইমাম সাহেবকে জিজ্ঞেস করেন, কি হয়েছে? তখন ইমাম সাহেব সবাইকে বলেন, আমি চন্দনাইশী বাবাজানকে আসন শরীফে বসে থাকতে দেখেছি। ইমাম সাহেব তখন ঐ অবস্থায় অস্থির হয়ে পড়েন এবং কান্না করতে করতে অসংলগ্ন কথাবার্তা বলতে থাকেন। অপরদিকে সবাই দায়েমকে খুঁজতে থাকে কিন্তু সে তার মায়ের পাশে গভীর ঘুমে আচ্ছন্ন। তিনি পরে বুঝতে পারলেন আল্লাহর অলীগণ দুনিয়া থেকে বিদায় গ্রহণ করার পর পৃথিবীর যে কোন প্রান্তে হফর করতে পারেন যা আল্লাহ প্রদত্ত বেলায়তি শক্তির কারণে সম্ভব। ইমাম সাহেব চন্দনাইশ দরবারের আশেক হয়ে পড়েন।

বর্ণনাকারী : কাসেম ভান্ডারী

গ্রাম: নজড় মোঃ চৌধুরি বাড়ি, ৫নং ওয়ার্ড, কানাইমাদারি চন্দনাইশ, চট্টগ্রাম।

৫৫. দুর্ঘটনা থেকে রক্ষা

সাল ২০০৫ মিজির দোকান নিবাসী জনাব জরি আহমদ, উনার স্বাশুরি সুফিয়া এবং চন্দনাইশী বাবাজান এর কন্যা শাহজাদী মোসাম্মৎ মোস্তফা খাতুন উনারা ৩ জন ঢাকার উদ্দেশ্যে রওনা হন। ঢাকার মধ্যেই তারা কয়েকদিন অবস্থান করেন। তারপর সৌদিয়া বাসে করে ঢাকা থেকে ফেরার পথে যখন ব্রাহ্মণবাড়িয়া পৌঁছালো, তখন ঢাকাগামী একটি সৌদিয়া বাস তাদের বাসের সামনে চলে আসে। ঐ মুহূর্তেই তারা তিন জনই বাবাজান কে স্মরণ করেন। ঐ মুহূর্তে জরি আহমেদ বাবাজান কে দুইটি গাড়ির মাঝখানের খালি জায়গায় দাড়ানো অবস্থায় দেখতে পান। ঐদিন বাবাজানের বিশেষ কৃপায় গাড়ি দুর্ঘটনা থেকে তারা বেঁচে যায়।

বর্ণনাকারী: জরি আহমেদ।

গ্রামঃ- মিজির দোকান

ওয়ার্ডঃ- ০৭

৫৬. রোগ থেকে মুক্তি ও পুত্র সন্তান লাভ

ঢাকা নিবাসী জনাব শাহজাদী বেগম (প্রকাশ টগরের মা) এর পুত্র মাহে আলমের স্ত্রী শেলী বেগম তিন কন্যা সন্তান এর মা হওয়ার পর ২০০৯ সালে ক্যান্সার রোগে আক্রান্ত হয়। ঢাকা সিটি হাসপাতালে মেডিকেল প্রফেসর ডাঃ শফি উল্লাহ তার গলব্লাডার ক্যান্সার অপারেশন করেন। একদিন চন্দনাইশী

বাবাজান এর ছোট ছেলে শাহজাদা সৈয়দ মকসুদুল আলাম এর বড় পুত্র শাহজাদা সৈয়দ মোহাম্মদ রিদওয়ানুল হক পারভেজ একদিন ঘুমের মধ্যে স্বপ্ন দেখেন যে, মাহে আলমের বউয়ের ক্যান্সার হয়েছে, স্বপ্নের মধ্যে কাউকে বলতেছে মাহে আলমকে বলো একটি গরু হাদিয়া আদায় করতে। তার ঘুম ভেঙে যায়। পরের দিন শাহজাদা তার বাবাকে এই স্বপ্নের বিষয়টি বললেন।

তখন চন্দনাইশী বাবাজান এর ছোট ছেলে শাহজাদা সৈয়দ মকসুদুল আলম মাহে আলমকে ডেকে একটি গরু হাদিয়া আদায় করতে বললেন। সে অনুযায়ী চন্দনাইস দরবারে গরু হাদিয়া ও আদায় করলেন। অপারেশনের পর তাকে থেরাপি দিতে হতো ঢাকায় গিয়ে। ইতিমধ্যে ঘটে গেল আরেকটা কাণ্ড। ছয়মাস ট্রিটমেন্ট চলাকালীন সময় শেলী বেগম গর্ভবতী হয়। অথচ ডাঃ বলেছেন যে সে কোনোদিন আর গর্ভধারণ করতে পারবে না। তাই ডাঃ শামসুল হকের সাথে দেখা করেন। তখন ডাঃসাহেব বললেন ছেলে মেয়ে যাই হোক না কেন ঐ ছেলে বা মেয়ে বিকলাঙ্গ হবে। কিন্তু বাচ্চাটি সম্পূর্ণ সুস্থ অবস্থায় জন্ম লাভ করেন। ঐ সময় থেকেই শেলী বেগম ক্যান্সার রোগ থেকে মুক্ত হয়ে যায়। বর্তমানে মা ও ছেলে দুইজনই সুস্থ জীবন যাপন করছেন।

বর্ণনাকারীঃ- মাহে আলম

বাসাঃ ব্যাটারি গলি

৫৭. কারাগার থেকে নির্দোষী মুক্তি

যখন দামপাড়া, ব্যাটারি গলি, নাসিরাবাদ এলাকার রাজা মিয়া, আবুল মিয়া, আবুল কালাম, ওছিউর রহমান ও ইসলাম মিয়া সহ তাদের পরিবারের সবাই চন্দনাইশী বাবাজানের (ক:) আশেকে পরিণত হয় তখন বাবাজান তাদের ওই জায়গায় হুজুরা শরীফে প্রতি বৃহস্পতিবার জিকির ও সেমা মাহফিল এর আদেশ দেন। রীতিমতো প্রত্যেক বৃহস্পতিবার সেমা ও জিকির মাহফিল বাবাজান কেবলা চন্দনাইশী (ক:) পর্দা করার আগ পর্যন্ত চালু ছিল। বাবাজান পর্দা করার পর সেমা ও জিকির মাহফিল বৃহস্পতিবারের পরিবর্তে প্রতি শনিবার রাতে আয়োজন করা হয়। উক্ত শনিবারের মাহফিলে চট্টগাম শহরের বিভিন্ন জায়গা থেকে মাইজভান্ডারী আশেকগণ এবং বিভিন্ন দরবার শরীফের ভক্তগণ কাজীর দেউরির হুজুরা শরীফে হাজির হত কলবি ফয়েজ হাসিল করার জন্য। এরূপ এক শনিবার রাতে মাহফিলে চলছিল। ছেমা চলাকালীন সময়ে পার্শ্ববর্তী কিছু দুষ্ট প্রকৃতির লোক শত্রুতামি করে কোতোয়ালী থানায় আপত্তি জানালেন। কোতোয়ালি থানার পুলিশ এসে সেমা মাহফিল থেকে হারমোনিয়াম ও অন্যান্য সরঞ্জাম নিয়ে যায়। মাহফিলের ৮/১০ জন জিকিরকারী ব্যক্তিকে থানায় নিয়ে যায়। থানায় নিয়ে যাবার পর উক্ত থানার কেশিয়ার সাহেব সবাইকে হাজত ঘরে না ডুকিয়ে হাজতের বাইরে চেয়ারে বসাই যথাযথ সম্মান প্রদর্শন করে। সবাইকে সকালে চা নাস্তা পরিবেশন করেন। পরেরদিন সকালে তাদেরকে যখন কোর্টে নিয়ে যওয়া হয় বিচারক সাহেব সবকিছু আমলে নিয়ে নির্দোষ মুক্ত করে দেন। এর কিছুদিন পর যারা শত্রুতামি করেছিল তাদের কেউ ক্যান্সার রোগে আবার কেউ মর্মান্তিক দুর্ঘটনাই মারা যায়। বর্তমানে উক্ত হুজুরা শরীফে শনিবার রাতের মাহফিল চলমান। আর কেউ বেয়াদপি করার সাহস করে না।

চন্দনাইশী বাবাজানের (ক:) দৈহিক বর্ণনা:

চন্দনাইশী বাবাজানের (ক:) দৈহিক বর্ণনা লিখতে গিয়ে আমি লেখকের কলম বন্ধ হওয়ার উপক্রম। কারণ বিভিন্ন আশেক বাবাজানকে বিভিন্ন রূপে দেখেছেন। বিভিন্ন হালতে বাবাজান ভিন্ন ভিন্ন রূপ ধারণ করেছেন। যার কারণে কার বর্ণনা গ্রহণ করব তা ভেবে ঠিক করতে সমস্যার সম্মুখীন হতে হয়। তথাপি আমি তাদের বর্ণনা অনুসারে লিখার চেষ্টা করেছি যারা সচরাচর চন্দনাইশ দরবারে বাবাজানের খেদমতে ছিলেন। সুতরাং তাদের বর্ণনা মতে, বাবাজান কেবলা চন্দনাইশী (ক:) প্রায় ৬ (ছয়) ফুট লম্বা ছিলেন। শারীরিকভাবে মোটা কিংবা অতিশয় চিকন ও ছিলেন না। একজন জলিলুল কদর আল্লাহর অলির রেয়াজতের কারণে শারীরিক গঠন যেরূপ থাকা দরকার বাবাজান সেরূপই ছিলেন। শোনা যায় যে, বাবাজান ছাত্র জীবন থেকে আধ্যাত্মিক চিন্তার কারণে প্রচণ্ড রেয়াজত সাধনা করেছেন তাই তিনি কখনো মোটা ছিলেন না। তাঁর মুখমন্ডল ছিল লম্বা আকৃতির ও দুই কানের লতি মুখমন্ডলের সাথে বেশ মানানসই। দাঁড়ির ও মৌচের ধরন ছিল নয় ঘন, নয় পাতলা। একমুষ্টি পরিমান দাঁড়ি সমগ্র গালের সাথে এমনভাবে সাজানো ছিল যে মনে হত পুরো মুখমন্ডল থেকে নুর চমকাচ্ছে বিশেষকরে বাবাজান যখন মুচকি হাসতেন। মাথার চুল ছিল বাবরী কাটা ও দুই কানের লতির নীচে গাঢ়ের প্রায় কাছাকাছি। চোখের ক্র ও চোখের পাতার পাপড়ী মোটামুটি ঘন ও বেশ পরিপাটি। এক কথায় পুরো চেহারায় ছিল স্বর্গীয় আবরণ। বাবাজানের সিনা মোবারক প্রশস্ত ধরনের। পেটের কোন মেদ ছিলনা। মোবারক হাতদ্বয় ও দুই পা এবং আংগুলগুলো শরীরের সাথে বেশ সামঞ্জস্যপূর্ণ। বাবাজানের গায়ের রং ছিল উজ্জল শ্যামবর্ণের। হাল ভেদে হলুদ ও রক্তিম বর্ণ ধারণ করত। বাবাজান যখন পর্দা করেন তখন তাঁর বয়স ৯১/৯২ বছরের উপরে। বৃদ্ধ বয়সে ও সমগ্র শরীরের উপর বয়স্কর যে চাপ থাকার কথা সে রকম

কোন ধরনের চাপ ছিলনা অর্থাৎ বয়সের বাড়ে শরীর নুয়ে পড়ার কোন রূপ দেখা যায়নি যা সাধারণত বৃদ্ধ লোকের ক্ষেত্রে দেখা যায়। কারণ বাবাজান যে লাঠি মোবারক ব্যবহার করতেন সেটার উপর কোন সময় ভর করে হাটেন নাই। শুধু মাত্র লাঠি হাতে নিতেন সুল্লাত পালনার্থে। যতবড় প্রভাবশালী ব্যক্তি বাবাজানের সামনে পড়তেন না কেন বাবাজানের সামনে আওয়াজ করার সাহস করতেন না। মাথা নুয়ে থাকতেন কিংবা বাবাজানকে এক নজরে বিনয়ীভাবে তাকিয়ে থাকতেন।

চন্দনাইশী বাবাজানের (ক:) স্বভাব প্রকৃতির বর্ণনা:

বাবাজান কেবলা চন্দনাইশীর (ক:) স্বভাব বৈশিষ্ট্যের বর্ণনা শুনে আমি লেখক বিস্মিত হয়েছি। বিভিন্ন বর্ণনাকারী বর্ণনা মতে তিনি এত গুনের অধিকারী ছিলেন যে, যা বর্ণনা করে শেষ করা সম্ভবপর নয়। তথাপি যৎসামান্য মানবকুলের হেদায়েতের জন্য প্রয়োজন ততটুকু আমি বর্ণনা করছি। বাবাজান কেবলা চন্দনাইশী (ক:) ছিলেন অমায়িক ও মার্জিত স্বভাবের অধিকারী। কথা বলতেন প্রয়োজনীয় বিষয়ে। আহার করতেন সামান্য। দানশীলতাই ছিলেন উদার। যত হাজত মকছুদি দরবারে আসত বাবাজান সবাইকে আপ্যায়ন করাতে খাদেমদের নির্দেশ দিতেন। দরবারে সবসময় আশেকভক্তগণ বাবাজানের তবারোকের অপেক্ষায় থাকতেন। পরিধানের কাপড় ছিল সাদা রংয়ের। পরিষ্কার ধবধবে সাধা লুংগি, পান্জাবি ও হাতওয়ালা গেনজী পড়তে বেশ পছন্দ করতেন। সুন্দর ও উত্তম চলাফেরা তাঁর হাঁটার মধ্যেই বুঝা যেত। ছফরে বাবাজান যখন হাটতেন তখন মনে হতো তিনি ধীরগতিতে হাটছেন কিন্তু আশেক ভক্ত ও মুরিদগন দৌড়ে বাবাজানের সাথে সমান ভাবে

চলতে পারতনা। অনেক পিছনে পড়ে থাকতেন। যা তাঁর বেলায়তি ক্ষমতার বহিঃপ্রকাশ। এক কথায় বাবাজান কেবলা চন্দনাইশী মাইজভান্ডারী (ক:) পরিপূর্ণ গুনের অধিকারী।

বাবাজান কেবলা চন্দনাইশী মাইজভান্ডারী (ক:) এর ওফাত।

মৃত্যু এক আল্লাহ কর্তৃক নির্ধারিত ও দ্রুত সত্য হুকুম যা কোন সৃষ্টি উপেক্ষা করতে পারে না। কোরানের বাণী :- (আরবি) অর্থাৎ আত্মা মরণশীল। মৃত্যুর স্বাদ সকলে গ্রহণ করতে বাধ্য। কিন্তু মৃত্যু যেমন অবধারিত তেমনি কারো জন্য কিয়ামাত এবং কারো জন্য নেয়ামাত। মৃত্যুর এ শ্রেণিবিন্যাস কোরান ও হাদিস দ্বারা প্রমাণিত। কুরআনের আয়াত:- (আরবি) অর্থ সাবধান আল্লাহর আউলিয়াদের কোন ভয় নায় তারা চিন্তিতও নয়। উল্লেখিত আয়াতের ভাবার্থ অনুধাবন করলে বুঝা যায়, আউলিয়া কেরামদের ইত্তিকাল হচ্ছে আনন্দদায়ক কেননা তা আল্লাহর সাথে মিলনের পথকে সুগম করে। বুঝা যায় মৃত্যু কারো জন্য বন্ধুর সাথে বন্ধুর মিলন যা মোমিন মোমিনী বান্দাদের কাম্য। আরেক ধরনের মৃত্যু যা কষ্টদায়ক। সাধারণত যে সকল মুসলমান বা গুনাহগার বান্দা ভোগ করে থাকে। মৃত্যুর পরবর্তী জীবনের কথা না ভেবে গুনাহে লিপ্ত থাকে। তারা তাদের ইমানের স্বাদকে গোনাহের কারণে নষ্ট করে ফেলে। সুতরাং অনুধাবন করা যায়, মৃত্যুর আরেক নাম ভয়ানক যন্ত্রণা। এছাড়া আরো ভয়ানক মৃত্যু আছে। যারা ইমানদার নয় তারা কাফের ও মুশরেক। তাদের জন্য মৃত্যু অসহ্য ও অসহনীয় বিষয়। তাই তারা বিশ্বাস করে যে, মৃত্যুর পর কোন জীবন বা কেয়ামত থাকতে পারে না। এ ব্যাপরে কোরানের বাণী – যদিও তারা মৃত্যু পরবর্তী জীবনকে অশিষ্টাস করে তথাপি মৃত্যু কামনা করে না। কারণ, তারা তাদের শাস্তির ব্যাপারে ভয়ে থাকে। সুতরাং তাদের এ ধরনের মৃত্যুর নাম (আরবি) কালো মৃত্যু। উপরিউক্ত মৃত্যুর বিভিন্ন প্রকার শ্রেণি বিবরণী এ ইশারা প্রদান করে যে, মৃত্যুর সবার জন্য একই রকম অর্থ বহন করে না। ভিন্ন ভিন্ন জনের নিকট ভিন্ন ভিন্ন তাৎপর্য বহন করে। তাই কারো মৃত্যু সম্পর্কে আলোচনা যেমন হেদায়তের দিক নির্দেশনা তেমনি কারো মৃত্যু বিষয়ে আলোচনা নিষিদ্ধ কারণ এতে হেদায়তের চেয়ে গোমরাহীর পথ উন্মোচন করে

এবং ভয়ের কারণ হয়ে থাকে। মৃত্যুর স্বাদ যে হেদায়তের পর্যালোচনা সে সম্পর্কে কোরানের এ আয়াত দ্বারা সুস্পষ্ট-(আরবি)। অর্থাৎ তোমরা (আল্লাহর প্রিয় বান্দাদের) মৃত বলিও না বরং তারা জীবিত কিন্তু তা অনুভব করতে পারো না। উপরিউক্ত আল্লাহ পাকের কালামের মমার্থ এই যে আল্লাহর আউলিয়াগণ হায়াতে জিন্দেগীর পর কবর জীবনেও জীবত। তাঁদের এ সুক্ষ জীবন শুধু অর্থনৈতিক নয় বরং উপকারার্থে আল্লাহ প্রদত্ত ক্ষমতা বলে বলীয়ান। যাদের মাজার শরীফে গেলে যেমন রুহানী ফয়েজ প্রাপ্ত হওয়া যায় তেমনি দুনিয়াবী মকছুদও হাছিল হয়। আখেরাতের নাজাতের আশা করা যায়। তাই আল্লাহর আউলিয়াগণের ইত্তিকালের সময় ও পর্দা করার দৃশ্য আলোচনা করা জরুরী ও তাৎপর্যপূর্ণ। অতএব অর্থবহ ও আধ্যাত্মিক বিষয়ের প্রতি গুরুত্ব প্রদানের উদ্দেশ্যে আমি (লেখক) গাউছে জামান হযরত ছৈয়দ মাওলানা আব্দুল লতিফ শাহ বাবাজান কেবলা চন্দনাইশী মাইজভান্ডারী (ক:)এর ইত্তিকালের কিছু ঘটনা নিম্নে বর্ণনা করছি-

বাবাজান কেবলা চন্দনাইশী মাইজভান্ডারী (ক:)এর ইত্তিকালের একমাস পূর্ব থেকে তাঁহার ভক্ত মুরিদান ছাড়া এলাকার সাধারণ আম জনতা যারা বাবাজানকে শুধুমাত্র মাওলানা সাহেবের দৃষ্টিতে দেখত, তারা স্বপ্ন দেখেছেন, চন্দনাইশী বাবাজান (ক:) মদিনা শরীফে চলে যাচ্ছেন। এ রকম এলহাম এলাকার বিভিন্ন জনের হয়ে থাকে। যা পরবর্তীতে তারা নিজেসই বর্ণনা করেন। এরকম আধ্যাত্মিকতা পূর্ণ স্বপ্ন সাধারণত আউলিয়া কেরামদের শানে হয়ে থাকে। বাবাজান চন্দনাইশী কেবলা (ক:) এর ইত্তিকালের ব্যাপারে বাবাজান নিজেই কথায় ও কাজে একমাস পূর্ব থেকে বলেছেন। বাবাজানের ভক্তদের

মধ্যে অনেকেই বাবাজানের ইশারায় ইত্তিকাল সম্পর্কিত কালাম শুনে অস্থির হয়ে পড়লে কিংবা মুর্ছিত হয়ে পড়লে বাবাজান তাদেরকে সরাসরি বলেছেন যে, তিনি অচিরেই দুনিয়া ত্যাগ করবেন। এমনকি কাউকে কাউকে পর্দা করার সময়টা বলে দিয়েছেন। ইত্তেকালের অনেকদিন পূর্ব থেকে স্বীয় হুজরা শরীফে অবস্থান করতেন কোন ছফরের দিকে মনোনিবেশ করতেন না। সকল ভক্ত, মুরিদ, আত্মীয় স্বজন ও খেদমত দার সবাইকে নিষেধ করেছেন যে, কেউ যেন তাঁর ইত্তিকাল মুহুর্তে কাছে যেন না আসে। শুধুমাত্র দূর থেকে তাকিয়ে থাকতে বলেছেন। অনেক হাজত মকছুদী সাধারণ মানুষ বাবাজান চন্দনাইশীর (কঃ) বেছাল শরীফকে স্বপ্ন দেখে সাক্ষাত লাভ ও দোয়ার জন্য আসতে থাকে। কিন্তু বাবাজান তাদেরকে ইশারায় বুঝিয়ে দিতে থাকেন যে, তারা যেন বিরক্ত না করে এবং বাবাজান তাদের উপর দয়ার দৃষ্টি রাখছেন। এভাবে ইত্তিকালের দিন যতই ঘনিয়ে আসছে বাবাজান ততই কথাবার্তা পরিহার করেন। এমনকি খুবই অল্প পরিমাণ আহার করতেন। তাও যেন দুই তিন দিন পর একবার। অবশেষে আওলাদ ভক্ত ও আশেক এবং মুরিদগণ বুঝে গেলেন যে, বাবাজান অচিরেই দুনিয়া থেকে বিদায় নিবেন। দরবারে তখন লোক সমাবেশ বেশি হতে থাকে। অপরদিকে মাইজভাইভারী তরিকার বিভিন্ন দরবারের ভক্তবৃন্দ ও আওলাদ ধীরে ধীরে অসহায় ও চিন্তিত হতে থাকেন। তাদের বিশ্বাস যে, সমগ্র পৃথিবী সূর্যের আলো থেকে বিচ্ছিন্ন হয়ে পড়ছে। এভাবে ওফাতের এক সপ্তাহ পূর্বের সময় হাজির। বাবাজান চন্দনাইশী (কঃ) ও পরিপূর্ণভাবে প্রস্তুতি গ্রহণ করতে থাকেন। আর সবসময় নিজ হুজরা শরীফে স্বীয় মুর্শিদ গাউছুল আজম

বাবাভারীর কেবলার (কঃ) দরবার তথা মাইজভাইভার শরীফের দিকে মুখ মোবারক রুজু করে ধ্যানে মগ্ন থাকেন। কোন কোন সময় সামনের দিকে ফিরে বিশেষ বিশেষ কোন ভক্তদের তলব করেন এবং দরবার সম্পর্কিত প্রয়োজনীয় নসীহত করে পুনরায় মাইজভাইভার শরীফের দিকে ফিরে মোরাকাবায় রত থাকেন। সময় দ্রুত সামনের দিকে অগ্রসর হতে থাকে বাবাজান শেষবারের মত অর্থাৎ ওফাতের দুইদিন পূর্বে সকল ভক্তবৃন্দ ও আওলাদ ও আশেকানদের দরবারে উপস্থিত হওয়ার জন্য নির্দেশ প্রদান করেন। প্রায় সকল আশেক ভক্তবৃন্দ ও মুরিদ সন্তান নির্দেশনা অনুযায়ী উপস্থিত হয়ে যায়। যাদেরকে উপস্থিত হওয়ার সংবাদ পাঠানোর সম্ভব হলো না তাদেরকে বাবাজান স্বয়ং স্বপ্নের মাধ্যমে নির্দেশ প্রদান করেন। তদানুযায়ী তারাও ওফাতের একদিন পূর্বে উপস্থিত হয়ে যান। পরিবেশ এমন ছিলো যে দরবারে লোকে লোকারণ্য। যেন ওরশ শরীফ অনুষ্ঠিত হতে যাচ্ছে। জনৈক আশেক বলেন, সকল ভক্তবৃন্দের এমন অবস্থা ছিল যে, সকলের থেকে ক্ষুধার জ্বালা পর্যন্ত গায়েব হয়ে যায়। সকলের জন্য ওয়াক্ত অনুযায়ী খাদ্যাদি প্রস্তুত করা হচ্ছে কিন্তু তারা আহার পর্ব সারছেন কিনা তা ও তারা অনুধাবন করতে পারছেন না। অবশেষে সেই শোকের সময় ঘনিয়ে এলো। সেইদিন ছিল ১৪০২ হিজরীর জমাদিউল উলা মাসের ৩ তারিখ, ১৩৮৮ বাংলা বর্ষের ফাল্গুন মাসের ১৫ তারিখ এবং ১৯৮২ সালের ফেব্রুয়ারীর ২৭ তারিখ রাত ১১টা ১৫ মিনিটে বাবাজান চন্দনাইশী কেবলা (কঃ) স্বীয় হুজরা শরীফে মোরাকাবা থেকে ফিরে সকলকে সামনে রেখে বসে অজু করেন। চারিদিকে পিনপতন শব্দ পর্যন্ত নাই। অজু শেষ করে বালিশের উপর হেলান দিয়ে পা মোবারক

শোয়ার মত করে লম্বা করে টানেন। ঠিক ১১:২০ মিনিটে থেকে ১১:২৫ মিনিটের মধ্যে স্বীয় মাথা মোবারক সামনের দিকে ঝুকিয়ে বিড়বিড় করে কি যেন উচ্চারণ করতে করতে চোখ বন্ধ করে শেষ নিশ্বাস ত্যাগ করেন। (ইন্না লিল্লাহে ওয়া ইন্না ইলাইহে রাজেউন)। উপস্থিত যারা বাবাজান কেবলা চন্দনাইশীর (রাঃ) এর সামনে অপেক্ষামান অবস্থায় দাড়িয়ে ছিল তারা একটু বুঝতে পারলেন না যে, বাবাজান চন্দনাইশী (রাঃ) ইন্তিকাল করেছেন। কিন্তু কয়েকজন বিচক্ষণ আশেক বুঝতে পারলেন বাবাজান আর নাই। পরিবেশ অন্য রকম হতে শুরু করল। চারিদিকে শোকাহত অবস্থায় ভক্ত আওলাদবৃন্দ এদিক থেকে ওদিক পানে ছুটাছুটি শুরু করল। এভাবে ঘন্টা খানেক পর তারা দিশেহারা অবস্থায় সিদ্ধান্ত গ্রহণ করলেন যে, পরদিন অর্থাৎ ২৮ ফেব্রুয়ারী ১৯৮২ সাল, ৩ জমাদিউল উলা বাদে আছর জানাজা শরীফ সম্পন্ন করে বর্তমানে যেখানে রওজা শরীফ স্থিত সেখানে দাফন করা হবে। এদিকে বাবাজানের ওফাতের খবর খুব দ্রুততার সাথে সমগ্র বাংলাদেশে ছড়িয়ে পড়ল। মনে হলো যে, ফেরেশতারা সংবাদ ছড়িয়ে দিয়েছে। মাইজভান্ডার দরবার শরীফে সংবাদ পৌছালে বাবাভান্ডারী কেবলা কাবার ছোট শাহাজাদা হযরত হৈয়দ মাওলানা শফিউল বশর আল-হাসানী-আল মাইজভান্ডারী (রঃ) চন্দনাইশী মাওলানার বড় ছেলে শাহাজাদা হৈয়দ মাওলানা জহুরুল আলম চন্দনাইশী মাইজভান্ডারীকে (রঃ) জানাযার ইমামতি করার দায়িত্ব অর্পণ করেন। জানাযার পূর্বে হৃদয় বিদারক দৃশ্যের অবতারণা করা যেন ভাষাহীন। অবশেষে মহাসমারোহে দরবারে নিজস্ব জমিতে জানাযা শরীফ অনুষ্ঠিত হয়ে মাগরিবের আগে দাফন কার্য সম্পাদিত হয়। দাফন কার্যের সেই

দিনকে অর্থাৎ ২৮ ফেব্রুয়ারী ধার্য করে প্রতিবছর চন্দনাইশ দরবার শরীফে বাবাজানের পবিত্র ওরশ শরীফ অনুষ্ঠিত হতে থাকে যা চলমান অবস্থায় আছে। দেশের বিভিন্ন স্থান থেকে হাজতী মকছুদী লোকগণ বাবাজানের রওজা মোবারক উক্ত দিন জেয়ারতের মাধ্যমে রুহানী ফয়েজ হাছিল করেন (আমিন)

বাবাজান কেবলা চন্দনাইশী (রঃ) সম্পর্কে মহামনীষীদের

মন্তব্য

১. বাবাভান্ডারী মাইজভান্ডারী (কঃ) এর বড় ভাই হযরত হৈয়দ মাওলানা গোলাম ছোবহান শাহ (রঃ) কর্তৃক বাবাজান চন্দনাইশী (রঃ) এর সম্পর্কে মন্তব্য বা কালাম:-

বাবাজান কেবলা চন্দনাইশী (রঃ) এর মুরিদ ও আশেক মনিরুজ্জামান (রঃ) বর্ণনা করেন যে, ১৯৪১-১৯৪২ সালে তিনি (বয়স ১৬ বছর) বাবাজান

চন্দনাইশী কেবলার (ক:) হুকুমে মাইজভান্ডার দরবার শরীফে কেবলা কাবার রওজা শরীফ জিয়ারতে যান। জিয়ারত শেষে মাজার শরীফ থেকে বের হওয়ার সময় বাবাজান কেবলা কাবার (ক:) এর বড় ভাই হযরত ছৈয়দ মাওলানা আবদুস ছোবহান শাহ মাইজভান্ডারী (র:) এর সাক্ষাৎ লাভ করেন। বাবাজান কেবলার (ক:) বড় ভাইকে দেখে তাজিম করার সময় গোলাম ছোবহান শাহ (র:) জিজ্ঞেস করেন যে, তিনি কোথা থেকে এসেছেন? জনাব মনিরুজ্জমান অতি নম্রভাবে বলেন যে, তিনি বাবাজান চন্দনাইশী (র:) এর মুরিদ। বাবা ভান্ডারী কেবলা (ক:) এর বড় ভাই অতিশয় জজবা হালে বলেন যে, মাওলানা চন্দনাইশী লতিফ শাহ (র:) একজন জলিলুর কদর মাওলানা যাকে বাবাজান কেবলা (ক:) বেলায়তী শক্তির মাধ্যমে ধরে নিয়ে এসে খেলাফত প্রদান করেছেন। অতএব বুঝায় যে, বাবাজান কেবলার ভ্রাতাগন বাবাজান চন্দনাইশীর (ক:) বেলায়ত সম্পর্কে সুউচ্চ ধারণা রাখতেন।

২. বাবাজান কেবলা চন্দনাইশী মাইজভান্ডারী (ক:) সম্পর্কে হযরত বাচা শাহ ফতেহপুরী বাবাজানের (ক:) মন্তব্য:- ফতেহপুরী বাবাজান নিজ ভক্তদের উদ্দেশ্যে বলেন যে, বাবাজান কেবলার কাবার (ক:) খলিফাদের মধ্যে চন্দনাইশী মাওলানা মাইজভান্ডারী তুরীকত জগতের একজন বাঘ যাকে আধ্যাত্মিক বিভিন্ন বিষয়ে হারানো অসম্ভব। ফতেহপুরী বাবাজানের উক্ত মন্তব্য বাবাজানের চন্দনাইশীর ভক্ত মুরিদ জনাব হাঁচি মিয়া, জনাব আব্দুস শুক্কর চেয়ারম্যান (সাতবাড়িয়া ইউনিয়ন) ও নুরুজ্জমান ফকির সহ অনেকেই ফতেহপুরী বাবাজানের নিজ জবান থেকে শুনেছেন। সুতরাং অনুধাবন করা যায় যে, চন্দনাইশী বাবাজান (ক:) একজন উচ্চ মাপের আল্লাহর অলি ছিলেন।

৩. বাবাজান কেবলা চন্দনাইশী সম্পর্কে বাবাজান কেবলা কাবার মেজ শাহজাদা হযরত ছৈয়দ মাওলানা আব্দুল বশর মাইজভান্ডারী (ক:) এর মন্তব্য :- বাবাজান কেবলার (ক:) মেজ শাহজাদা হযরত ছৈয়দ মাওলানা আব্দুল বশর শাহ মাইজভান্ডারী (র:) বাবাজান কেবলা কাবা (ক:) এর ওফাতের পর বাংলাদেশে মাইজভান্ডারী তুরিকার খলিফাদের দরবার সমূহে সফরে বের হন। একবার তিনি (র:) আহলা দরবার ও আমির ভান্ডার দরবার শরীফ সফর করে চন্দনাইশ দরবার শরীফে বাবাজান কেবলা চন্দনাইশী (র:) এর সাথে সাক্ষাতে আসেন এবং দরবারে বেশ কয়েকদিন অবস্থান পূর্বক মাইজভান্ডারী তুরিকার জিকির আজকার করেন। সে সময় তিনি (র:) বাবাজান কেবলা চন্দনাইশীর (র:) সাথে আধ্যাত্মিক বিষয়ে আলোচনা করেন। তখন চন্দনাইশের কিছু লোক মাইজভান্ডারী তুরিকার বায়াত গ্রহণ করার জন্য মনোবাসনা ব্যক্ত করলে তিনি বাবাজান কেবলা চন্দনাইশী (র:) এর দিকে দেখিয়ে বলেন যে মাওলানা চন্দনাইশী (র:) একজন বাবাজান কেবলা কাবার (ক:) অন্যতম প্রতিনিধি এবং তুরিকায়ে মাইজভান্ডারী জগতের সর্বশেষ ও শ্রেষ্ঠ ফুল যার মাধ্যমে মাইজভান্ডারী তুরিকার সুবাস ও পরিপূর্ণতা পাওয়া যায়। তাই তিনি বায়াত আত্মহী ব্যক্তিদের কে বায়াত করাতে অস্বীকার করেন এবং তাদেরকে বাবাজান চন্দনাইশী (র:) এর কদমে থাকতে অনুরোধ করেন। উপরিস্থ ঘটনা বাবাজান চন্দনাইশীর ভক্ত মুরিদ ও মাইজভান্ডার দরবার শরীফের অন্যান্য আশেকদের সামনে ঘটে। সুতরাং অনায়সে ধারণা করা যায় যে, বাবাজান কেবলা চন্দনাইশী (ক:) কত উচ্চমার্গের আল্লাহর অলি।

৪. বাবাজান চন্দনাইশী (র:) সম্পর্কে গাউছুল আজম মাইজভান্ডারী কেবলা কাবার নাতী হযরত ছৈয়দ দেলোওয়ার হোসেন মাইজভান্ডারী (র:) এর মন্তব্য:- বাবাজান চন্দনাইশী কেবলার একজন ভক্ত মুরীদ জনাব মোহাম্মদ মোখতার মিয়া কোনো বিশেষ প্রয়োজনে ফটিকছড়ি এলাকায় গমন করেন। স্বাভাবিকই মাইজভান্ডার দরবার শরীফে গিয়ে জিয়ারতের মনস্থির করলেন। অফিসিয়াল প্রয়োজন সেরে মাইজভান্ডার দরবার গিয়ে হযরত কেবলা (ক:) ও বাবাজান চন্দনাইশী (ক:) রওজা মোবারকদ্বয় জিয়ারত করে বের হওয়ার সময় হযরতের নাতি শাহজাদা হযরত ছৈয়দ মাওলানা দেলোওয়ার হুসাইন মাইজভান্ডারী(র:) সাথে দেখা হয়। স্বাভাবিকভাবে আওলাদ হিসাবে তাকে ভক্তি শ্রদ্ধা করেন। সৈয়দ দেলোওয়ার হুসাইন মাইজভান্ডারী (র:) তার নিকট পরিচয় জানতে চাইলে তিনি বাবাজান কেবলা চন্দনাইশীর (ক:) মুরীদ সন্তান বলে পরিচয় দেন। সাথে সাথে সৈয়দ দেলোওয়ার হুসাইন মন্তব্য করেন যে, মাওলানা চন্দনাইশী শাহ (র:) মাইজভান্ডারী ত্বরিকার একজন উচ্চ মর্তবার শক্তি। তিনি এতই সুক্ষ ও আধ্যাত্মিক আধার যে, তার কাছে কোন কিছু আদায় করতে গেলে অত্যন্ত নিষ্ঠার সাথে আবেদন করতে হয় অন্যথায় কোন কিছু আদায় করা কঠিন। সৈয়দ দেলোওয়ার মাইজভান্ডারীর (র:) এরূপ মন্তব্য দ্বারা বুঝা যায় যে, বাবাজান কেবলা চন্দনাইশী (র:) একজন মহান আল্লাহর অলি।

৫. বাবাজান চন্দনাইশী কেবলা সম্পর্কে তাঁরই পীরভাই হযরত ছৈয়দ মাওলানা আবদুচ ছালাম ইছাপুরী (র:) মন্তব্য:-

বাবাজান কেবলা চন্দনাইশী কেবলা কাবার ওফাতের পর চন্দনাইশ দরবার শরীফের মুরিদ তথা আহমুদুল হক, আবু তাহের ও ছাদেক হোসেন হযরত মাওলানা ইছাপুরী (র:) এর সাথে সাক্ষাত করতে গেলে তিনি তাদেরকে বাবাজান চন্দনাইশীর (র:) মুরিদ সন্তান হিসেবে অত্যাধিক আদর ও আপ্যায়ন করেন। তিনি তাদেরকে বলেন যে, বাবাজান চন্দনাইশীর খলিফাদের মধ্যে মাওলানা চন্দনাইশী (র:) একজন অন্যতম শ্রেষ্ঠ খলিফা। তার আধ্যাত্মিক মকাম সম্পর্কে যে কোন সাধারণের পক্ষে বুঝা খুবই কঠিন। তিনি আরো বলেন-মাইজভান্ডারী ত্বরিকায় এলেমের সাগর হিসাবে তিনি (বাবাজান চন্দনাইশী) সুখ্যাত। অতএব মাওলানা ইছাপুরী শাহ (র:) এর কালাম থেকে অনুধাবন করতে কষ্ট হয় না যে, বাবাজান চন্দনাইশী (র:) কিরূপ মর্তবা সম্পন্ন আল্লাহর অলি।

৬.হযরত ছৈয়দ হাফেজ ফজলুর রহমান শাহ্ মাইজভান্ডারী (ক:) এর মন্তব্য বাবাজান কেবলা চন্দনাইশী মাইজভান্ডারী (ক:) সম্পর্কে :

বাবাজান কেবলা চন্দনাইশী মাইজভান্ডারী (ক:) সম্পর্কে তাঁরই পীরভাই হযরত হাফেজ নগরী মাইজভান্ডারী (ক:) স্বীয় ভক্তদের উদ্দেশ্যে বহুবার বলেছেন যে, মাওলানা ছৈয়দ আব্দুল লতিফ শাহ্ চন্দনাইশী (ক:) গাউছুল আজম বাবা ভান্ডারী (ক:) এর আখেরী স্টেশন, স্বীয় মুরিদদের কে বাবাজান চন্দনাইশীর (ক:) ছোহবতে যাওয়ার জন্য তাগিদ দিয়েছেন। হাফেজ শাহ্ কেবলার ওফাতের পর ওনার প্রায় মুরিদগন স্বীয় পীরের নির্দেশ পালনার্থে চন্দনাইশ দরবার শরীফে বাবাজান চন্দনাইশী কেবলা (র:) চরণে হাজিরা

দিতেন। তাতেই বুঝা যায় যে, বাবাজান কেবলা চন্দনাইশী মাইজভান্ডারী আল্লাহর মহান বুজর্গ।

৭. রাজাপুর দরবার শরীফের হযরত অলি উল্লাহ শাহ মাইজভান্ডারী (ক:) কর্তৃক বাবাজান চন্দনাইশী সম্পর্কে কালাম :-

হযরত অলি উল্লাহ শাহ (র:) ওফাতের বছরে মাইজভান্ডার দরবার শরীফে হাজারো ভক্ত সমেত উপস্থিত হন। তাঁর বয়স তখন ১৬২ বছর। বাবাজান কেবলা চন্দনাইশী (র:) ও বিশেষ কয়েকজন ভক্তসহ মাইজভান্ডার দরবার শরীফে বাবাভান্ডারী কেবলার ওরশ উপলক্ষে উপস্থিত হন। হযরত কেবলা কাবা (ক:)ও বাবাভান্ডারী কেবলা কাবার (ক:) রওজা দ্বয়ের মধ্যখানে শাহী মাঠে উভয় আল্লাহর অলি তথা রাজাপুরী ও চন্দনাইশী (র:) এর সাক্ষাত হয়। বাবাজান চন্দনাইশী (র:), রাজাপুরী (র:) এর কানে কানে মৃত্যু সম্পর্কিত এমন কালাম করেন যে, রাজাপুরী শাহ (র:) বাবাজান চন্দনাইশী (র:) কে জড়িয়ে ধরার জন্য ব্যাকুল হয়ে ওঠেন এবং বাবাজান চন্দনাইশী (র:) সম্পর্কে স্বীয় মুরিদদের এমন কালাম করেন যে, উপস্থিত সকলে মনোযোগ সহকারে শ্রবণ করেন এবং সকলে বাবাজান চন্দনাইশী (র:) এর দিকে থাকিয়ে থাকেন। অতএব বাবাজান চন্দনাইশী (ক:) এর মর্তবা সম্পর্কিত এরূপ কালাম দ্বারা প্রমানিত হয় যে, বাবাজান চন্দনাইশী (র:) আলমে আরওয়াহ ও আলমে বরযখ সম্পর্কে খবর রাখেন।

৮. হযরত আজিজুল হক শেরে বাংলা (র:) কর্তৃক বাবাজান কেবলা চন্দনাইশী (র:) এর সম্পর্কে কালাম:- মাইজভান্ডারী ত্বরিকত বিরোধী কিছু লোক বাবাজান কেবলা চন্দনাইশী মাইজভান্ডারী সম্পর্কে জিজ্ঞাসা করলে

প্রত্যুত্তরে তিনি বলেন মাওলানা চন্দনাইশী (র:) বাবা ভান্ডারী কেবলার খোলাফাদের মধ্যে অন্যতম ফুল যাকে দেখলেও ছাওয়াব হবে। এছাড়া তিনি বাবাজান চন্দনাইশীর (র:) জনৈক ভক্ত জনাব মরহুম এনু ফকিরের সাথে দেখা হলে বলেন তিনি যেন তাকে চন্দনাইশী মাইজভান্ডারী (ক:) শের তথা কালাম শুনান যাতে তাঁর অন্তর খোদা তায়ালার প্রেমে সিক্ত হয়। বাবাজান চন্দনাইশী (ক:) সম্পর্কে আল্লামা আজিজুল হক (র:) এর এই উচ্চ মর্তবার বাণী থেকে অনুধাবন করা যায় যে, বাবাজান চন্দনাইশী (র:) একজন মহান আল্লাহর অলি।

৯. সাতকানিয়া বারদোনার মাওলানা আমিনুল্লাহ শাহ (র:) কর্তৃক বাবাজান কেবলা চন্দনাইশী মাইজভান্ডারী (র:) সম্পর্কে মন্তব্য:-

মাইজভান্ডারী ত্বরিকত বিরোধী কিছু মৌলভী বাবাজান কেবলা চন্দনাইশী মাইজভান্ডারী কেবলা (র:) এর বিরুদ্ধে এক বিশাল মাহফিলের এনতেজাম করে। সেই মাহফিলে সে সময়ের প্রায় শতানেক মাওলানা বাবাভান্ডারী (ক:) ও বাবাজান কেবলা চন্দনাইশী (র:) এর বিরুদ্ধে কাফের ফতোয়া দিতে প্রায় কুষ্ঠাবোধ করেনি। তন্মধ্যে বারদোনার মাওলানা প্রখ্যাত মুহাদ্দিদ হযরত আমিনুল্লাহ শাহর রায় জানতে চাইলে তিনি বলেন যে, মাওলানা আব্দুল লতিফ শাহ (র:) কে না দেখে ও সামনা সামনি কথা না বলে কোন কিছু মন্তব্য করতে নারাজ। তাই কয়েকজন সম্মানিত ব্যক্তি বর্গদের নিয়ে তিনি বাবাজান চন্দনাইশীর দরবারে উপস্থিত হয়। বাবাজান চন্দনাইশী তখন নিজ হুজুরায় অবস্থানরত ছিলেন। বারদোনার মাওলানা সাহেবকে দেখে বাবাজান বলেন মাওলানা সাহেব আমাকে আপনার ইলম দ্বারা বুঝাতে পারেন কিনা দেখেন।

আমিনুল্লাহ শাহ তখন বাবাজান চন্দনাইশী (র:) এর সাথে বিন্দ্র ভাবে দীর্ঘক্ষণ কোরান হাদিস ফিকাহ ইত্যাদি বিষয় আলোচনা করেন এবং বাবাজান চন্দনাইশী (র:) এর কাছ থেকে বিদায় গ্রহণ পূর্বক পুনরায় সম্মিলনে গিয়ে রায় প্রদান করেন যে, যতক্ষণ তিনি মাওলানা চন্দনাইশী (র:) এর সাথে ছিলেন ততক্ষণ তিনি তার মধ্যে নবী করিম (সা:) এর পূর্ণ আচার আচরণ দেখতে পান আর বলেন মাওলানা চন্দনাইশী এজগতের মানুষ নয় অন্য জগতের শক্তি। তিনি সকলকে বাবাজান চন্দনাইশী (র:) এর সাথে কোন ধরনের বেয়াদবি না করার জন্য তাগিদ দেন। বারদোনা মাওলানার এমন রায়ে মাহফিলের সবাই স্তব্ধ হয়ে যান।

১০ বাবাজান চন্দনাইশী কেবলা (র:) সম্পর্কে মাওলানা ফখরে বাংলার (রা:) মন্তব্য:-

যখন বাবাজান চন্দনাইশী কেবলা (র:) গাউছুল আজম হযরত মাওলানা হৈয়দ গোলামুর রহমান বাবাজান কেবলা কাবার (ক:) এর দস্ত বায়াত গ্রহণ পূর্বক খেলাফত লাভ করে মাইজভান্ডারী ত্বরিকত প্রচার ও প্রসারের জন্য নিজ মুর্শিদের নির্দেশনা লাভ করেন, তখন বহু গণ্য মাণ্য ব্যক্তি বর্গ ও আলেমে ওলামাগণ তৎকালীন সময়ের মাওলানা ও ইমাম ফখরে বাংলার নিকট বাবাজান চন্দনাইশী মাইজভান্ডারী (র:) এর বিরুদ্ধে অভিযোগ পেশ পূর্বক এরূপ মন্তব্য করেন যে, তিনি মাইজভান্ডারী ত্বরিকা দাখিল পূর্বক নিজ নাম, যশ, খ্যাতি ও ইমান আমল নষ্ট করে ফেলেছেন। এ জন্য তারা ইমাম ফখরে বাংলাকে (র:) বাবাজান চন্দনাইশী (র:) কে ডেকে শাসাতে অনুরোধ করেন। তদানুযায়ী ফখরে বাংলা সাহেব (র:) বাবাজান চন্দনাইশীকে (র:) নিজ ঘরে

দাওয়াত প্রদান পূর্বক আহবান করলে তথায় বাবাজান চন্দনাইশী (র:) দাওয়াত গ্রহণ করেন। রাত্রি বেলায় ফখরে বাংলা (র:) ও বাবাজান চন্দনাইশী (র:) একই চৌকিতে বসেন এবং তাঁদের সামনে অভিযোগ পেশকারীগণ ও বসে পড়েন। সবাইকে ইমাম ফখরে বাংলার নির্দেশে আহ্বাদি পেশ করা হয়। খাওয়ার পর ইমাম ফখরে বাংলা সাহেব বলেন যে, মাওলানা চন্দনাইশী (র:) একজন কলিকাতার আলীয়া থেকে উচ্চতর ডিগ্রী লাভ গ্রহণ করে আল্লামা হয়েছেন। তিনি না বুঝে মাইজভান্ডারী ত্বরিকত গ্রহণ করে নাই বরং জলিলুল কদর আলেম হয়ে বুঝে শুনে বাবাজান কেবলা কাবার (ক:) হাতে বায়াত গ্রহণ করে খেলাফত লাভ করেছেন। আমার এমন সাহস হয়নি যে, তাঁকে ইলমের মাধ্যমে পরাজিত করে মাইজভান্ডারী ত্বরিকত থেকে বিরত রাখব। কারণ তিনি ইলম জগতের সুক্ষ বিষয়ের অধিকারী। যার জন্য বাবাজান কেবলা কাবার (র:) বেলায়তী শক্তির মাধ্যমে তাঁকে মাইজভান্ডার দরবার শরীফ নিয়ে যান। ফখরে বাংলা সাহেবের (র:) এরূপ মন্তব্য উপস্থিত সকলে নিশ্চুপ হয়ে যান। ফখরে বাংলা সাহেবের উপরিউক্ত মন্তব্যের মাধ্যমে বুঝা যায় যে, হযরত বাবাজান চন্দনাইশী (র:) একজন আল্লাহর পক্ষ থেকে বেলায়াত প্রাপ্ত অলী।

মহামনীষীদের উপরিউক্ত মন্তব্য সমূহ ছাড়া ও অনেক মশায়েখে আ'লা ও বিভিন্ন ত্বরিকত পন্থী বুজগানে দ্বীন বাবাজান কেবলা চন্দনাইশী (র:) সম্পর্কে উচ্চতর কালাম পেশ করেন। গ্রন্থের কলেবর বৃদ্ধি পরিহার করতে শুধু মাত্র উপরে উল্লিখিত মন্তব্য সমূহের বর্ণনায় সীমাবদ্ধ করা হলো। উল্লেখ্য, তৎসময়ের সকল জ্ঞানী পরহেজগারদের একই বক্তব্য যে, মাওলানা চন্দনাইশী

(র:) কে কোরান ও হাদীসের জাহেরী ও বাতেনী ইলমের ক্ষেত্রে পরাজিত করা
অসম্ভব।

গাউছে জামান হযরত ছৈয়দ মৌলানা আবদুল লতিফ শাহ
চন্দনাইশী মাইজভান্ডারী কেবলার (ক:) পীরি শাজরা

১. ইলাহী বেহরমতে হুজুর সাইয়েদে আ'লম নূরে মুজাচ্ছাম সাইয়েদুল
মুরসালিন, ইমামুল আশ্বিয়া আহমদ মুজতবা মুহাম্মদ মুস্তাফা সাল্লাল্লাহু
আলাইহি ওয়াছাল্লাম।
২. ইলাহী বেহরমতে ইমামুল বেলায়ত শেরে খোদা মুশকিল কোশা আমিরুল
মোমেনিন হযরত মাওলা আলী কাররামাল্লাহু ওয়াজহাহু।
৩. ইলাহী বেহরমতে সৈয়েদুশ শোহাদা হযরত ইমামে আলী মক্বাম
সৈয়েদেনা হাসান রাঈয়াল্লাহু তা'আলা আনহু।
৪. ইলাহী বেহরমতে সৈয়েদেনা সৈয়েদুছ ছালেকীন হযরত সৈয়দ ইমাম
জয়নাল আবেদীন রাঈয়াল্লাহু তা'আলা আনহু।
৫. ইলাহী বেহরমতে সৈয়েদুল ওয়াসেলীন হযরত ইমাম মুহাম্মদ বাকের
রাঈয়াল্লাহু তা'আলা আনহু।
৬. ইলাহী বেহরমতে সৈয়েদুল কামেলীন হযরত ইমাম জাফর সাদেক
রাঈয়াল্লাহু তা'আলা আনহু।
৭. ইলাহী বেহরমতে সৈয়েদুল আলম হযরত ইমাম মুছা কাজেম রাঈয়াল্লাহু
তা'আলা আনহু।
৮. ইলাহী বেহরমতে সৈয়েদুস সাকলাইন হযরত ইমাম আলী মুছা রেজা
রাঈয়াল্লাহু তা'আলা আনহু।
৯. ইলাহী বেহরমতে সৈয়েদুল ওয়াসেলীন হযরত শেখ মারুফ কারখী
কাদ্দাহাল্লাহু ছিররাহুল আজিজ।
১০. ইলাহী বেহরমতে সোলতানুল মাহবুবীন শায়খ ছিররী ছাকতী কাদ্দাহাল্লাহু
ছিররাহুল আজিজ।
১১. ইলাহী বেহরমতে সৈয়েদুল আছফিয়া সৈয়েদুত ত্বায়েফ হযরত
জোনায়েদ বাগদাদী কাদ্দাহাল্লাহু ছিররাহুল আজিজ।

১২. ইলাহী বেহরমতে সুলতানুল আউলিয়া হযরত শায়খ আবু বকর শিবলী কাদাছাল্লাহু হিররাহুল আজিজ।

১৩. ইলাহী বেহরমতে মুহিব্বুস ছালেকীন শায়খ আবদুল আজীজ তামিমী কাদাছাল্লাহু হিররাহুল আজিজ।

১৪. ইলাহী বেহরমতে ইমামুল কামেলীন হযরত আবুল ফজল আবদুল ওয়াহেদ তামিমী কাদাছাল্লাহু হিররাহুল আজিজ।

১৫. ইলাহী বেহরমতে সৈয়েদুল আউলিয়া মাওলানা সূফী শায়খ আবুল ফরাহ ইউসুফ তরতুসী কাদাছাল্লাহু হিররাহুল আজিজ।

১৬. ইলাহী বেহরমতে সৈয়েদুছ ছাকলাইন হযরত মাওলানা সূফী শায়খ আবুল হাসান কারখী কাদাছাল্লাহু হিররাহুল আজিজ।

১৭. ইলাহী বেহরমতে ইমামুল আউলিয়া ওয়াত্ তুরীকুত গাউছুল আ'যম কুতুবুল আলম মাহবুবে ছোবহানী মুশকীল আছানী পীরানে পীর দস্তগীর শেখ সৈয়দ আবু মুহাম্মদ মীর মুহীউদ্দীন আবদুল কাদের জিলানী আল-হাসানী ওয়াল হোসাইনী আল- বাগদাদী কাদাছাল্লাহু হিররাহুল আজিজ।

১৮. ইলাহী বেহরমতে সুলতানুল আরেফিন শায়খ শাহাবুদ্দীন সোহরাওয়ার্দী কাদাছাল্লাহু হিররাহুল আজিজ।

১৯. ইলাহী বেহরমতে সৈয়েদুল আরেফিন হযরত নেজাম উদ্দিন গজনবী কাদাছাল্লাহু হিররাহুল আজিজ।

২০. ইলাহী বেহরমতে হযরত সূফিউল আছফিয়া সৈয়দ মোবারক গজনবী কাদাছাল্লাহু হিররাহুল আজিজ।

২১. ইলাহী বেহরমতে হাদিউল আশেকীন হযরত সূফী নাজিমুদ্দীন গজনবী কাদাছাল্লাহু হিররাহুল আজিজ।

২২. ইলাহী বেহরমতে সুলতানুল মাহবুবীন হযরত সূফী কুতুবদ্দীন রওশন জামির কাদাছাল্লাহু হিররাহুল আজিজ।

২৩. ইলাহী বেহরমতে হাদী ইলাল্লাহ হযরত সূফী ফজলুল্লাহ কাদাছাল্লাহু হিররাহুল আজিজ।

২৪. ইলাহী বেহরমতে জোবদাতুল কামেলীন শায়খ সৈয়দ মাহমুদ কাদাছাল্লাহু হিররাহুল আজিজ।

২৫. ইলাহী বেহরমতে সুলতানুল মোকাররবীন হযরত নাছিরুদ্দিন কাদাছাল্লাহু হিররাহুল আজিজ।

২৬. ইলাহী বেহরমতে ইমামুল মাশায়েখ হযরত সূফী তকিউদ্দিন কাদাছাল্লাহু হিররাহুল আজিজ।

২৭. ইলাহী বেহরমতে মাকসুদুত্তালেবীন হযরত সূফী নেজামুদ্দিন কাদাছাল্লাহু হিররাহুল আজিজ।

২৮. ইলাহী বেহরমতে সৈয়েদুল আরেফীন হযরত সৈয়দ আবদুল্লাহ কাদাছাল্লাহু হিররাহুল আজিজ।

২৯. ইলাহী বেহরমতে কুদওয়াতুছালেকীন হযরত সৈয়দ জাফর হোসাইনী কাদাছাল্লাহু হিররাহুল আজিজ।

৩০. ইলাহী বেহরমতে মতলুবুত তালেবীন সূফী খলিল উদ্দিন কাদাছাল্লাহু হিররাহুল আজিজ।

৩১. ইলাহী বেহরমতে কুতুবুল আকতাব হযরত মাওলানা মুহাম্মদ মোন্য়েম পাকবাজ (পাটনা) কাদাছাল্লাহু হিররাহুল আজিজ।

৩২. ইলাহী বেহরমতে ইমামে হযরত সূফী মুহাম্মদ দায়েম উল্লাহ কাদাছাল্লাহু হিররাহুল আজিজ।

৩৩. ইলাহী বেহরমতে হাদী ইল্লাহ হাজী সূফী সূফী আহমদ উল্লাহ কাদাছাল্লাহু হিররাহুল আজিজ।

৩৪. ইলাহী বেহরমতে মোতাওয়াককেল আলাল্লাহি হযরত সূফী লকিত উল্লাহ কাদাছাল্লাহু হিররাহুল আজিজ।

৩৫. ইলাহী বেহরমতে হাজীউল হারামাইন সূফী দেলাওর আলী লাহোরী পাকবাজ, কাদাছাল্লাহু হিররাহুল আজিজ।

৩৬. ইলাহী বেহরমতে হাজীউল হারামাইন গাউছে জমান হযরত সূফী সৈয়দ আবু শাহামা মুহাম্মদ সালেহ লাহোরী কাদাছাল্লাহু হিররাহুল আজিজ।

৩৭. ইলাহী বেহরমতে রুহুল আশেকীন মুরাদুল মোস্তাক্বীম ইমামুল আউলিয়া ওয়াত তুরীক্বত হযর গাউছুল আ'যম হযরত শাহসূফী মাওলানা সৈয়দ আহমদ উল্লাহ আল-হাসানী ওয়াল হোসাইনী আল-মাইজভান্দারী কাদাছাল্লাহু হিররাহুল আজিজ।

৩৮. ইলাহী বেহরমতে মাহবুবে নাজনীন, শেখে ফা'য়াল, ইউসুফে ছানী, ইমামুল আউলিয়া, গাউছুল আ'যম শাহসূফী মাওলানা সৈয়দ গোলামুর রহমান বাবাভান্দারী আল-হাসানী ওয়াল হোসাইনী আল-মাইজভান্দারী কাদাছাল্লাহু হিররাহুল আজিজ।

৩৯. ইলাহী বেহরমতে গাউছে জামান হযরত ছৈয়দ মৌলানা আবদুল লতিফ শাহ আল-চন্দনাইশী মাইজভান্দারী কাদাছাল্লাহু হিররাহুল আজিজ।

শেষকথা

আমি অধম (লেখক) আবারো আল্লাহর হামদ ও রাসূল (সঃ) এর উপর দরুদ পড়া সাপেক্ষে বাবাজান কেবলা চন্দনাইশী মাইজভান্দারী (রঃ) এর জীবনী সমাপ্ত করছি এ বলে যে, আল্লাহর অপরিসীম দয়া ও রাসূল (সঃ) এর নজরে করমে এবং বাবাজান চন্দনাইশী কেবলার (কঃ) সুনজরে ক্ষুদ্র জীবনটি সকলের তুষ্টির জন্য উপস্থাপন করতে পেরেছি। যদিওবা এ গ্রন্থখানি লিখতে গিয়ে আমার অনেক ভুল ভ্রান্তি হতে পারে। তাই সকলের নিকট ক্ষমার দৃষ্টি কামনা করছি এবং সকলের নিকট দোয়া প্রার্থনা করছি। উল্লেখ্য যে, এ জীবনী গ্রন্থ বহু তথ্য নির্ভর। প্রতিটি ঘটনা বিভিন্ন জনের নিকট যাচাই করেছি। আমাকে অনেকে বাবাজানের কারামাতের বিষয় অবহিত করেছেন কিন্তু গ্রন্থের কলেবর বৃদ্ধি পরিহার করার জন্য সকল ধরনের কারামত লিখতে ব্যর্থ হয়েছি। ভবিষ্যতে দ্বিতীয় সংস্করণ যদি সম্ভব হয় বাকী সকলের প্রদত্ত বাবাজানের কারামত সংযোজন করার চেষ্টা করব। কারো নিকট চন্দনাইশী বাবাজানের (কঃ) বিষয়ে আরো কোন ধরনের ঘটনা থাকলে আমাকে (লেখক) প্রদান করার জন্য অনুরোধ করছি। আল্লাহ পাক আমার এ প্রচেষ্টা কবুল করুক। এ গ্রন্থখানির মাধ্যমে যদি কারো হেদায়াতের পথ সুগম হয় তার জন্য মহান আল্লাহর দরবারে হাজারো শোকর। আল্লাহ আমাদের সকলকে দয়ার মাধ্যমে কবুল করুক (আমিন ছুম্মা আমিন)।